

深寧先生文
鈔摭餘編

四明張氏約園開雕

深寧先生文鈔摭餘編目錄

卷一 記 傳 序

昌國州重建大成殿記

重修鄞縣儒學記

慶元路建醫學記

義田莊先賢祠記

真逸閣記

奉化重修縣治記

九先生祠堂記

深寧文鈔摭餘編 目錄

一 四明叢書
約圖刊本

赤城書堂記

天興廟記

九里廟記

濟南陳公修東津橋記

廣恩崇福寺記

寶慶寺記

大隱楊先生傳

慈谿杜先生傳

鄞江王先生傳

城南樓先生傳

桃源王先生傳

廣平舒先生傳

定州沈先生傳

慈湖楊先生傳

絜齋袁先生傳

李猷傳

易康成注序

詩地理考序

深聖文鈔揀餘編

目錄

二四明叢書

約園刊本

諸經通義序

漢制考序

辭學指南序

小學紺珠序

戴氏桃源世譜序

漢保傅傳序

唐西南備邊序

卷二 後序 跋 書後 題辭 制 辨 銘

箴

周易鄭氏注後序

詩考後序

通鑑地理通釋後序

急就篇後序

爾雅翼後序

史彌鞏獨善先生文集跋

踐阼篇跋

姓氏急就篇跋

玉海跋

深寧文鈔撤餘編

目錄

三

四明叢書

約圖刊本

困學紀聞跋

書王庭秀磨衲集後

鄭鏐周禮解義題辭

寧江軍承宣使左驍衛上將軍金州駐劄御前諸

軍都統制授武康軍節度使右金吾衛上將軍

興元府駐劄御前諸軍都統制加食邑食實封

制

辨乾道四明圖經

辨州郡

辨餘姚郡

辨鄧

辨鄧

辨句章

辨甬東

辨西湖

至道朝元殿冊皇太子頌

唐觀德殿飲至頌

漢華平頌

深寧文鈔餘編

目錄

四明叢書

約圖刊本

堯衢室銘

商玉磬銘

周瑞節銘

漢典星箴

漢柱下令箴

卷三 贊 七詩

寶元紫微閣御篆贊

周七律詩

越大夫贊

八賢贊

四明七觀

元至元二十七年城中握蘭橋旁民家築室穿上
得誌石一片其文乃唐開成四年太原王夫人
之墓誌謂其曾祖王元浩在元宗時拜諫議大
夫左庶子慕巢由之志辭疾不就詩以紀事
九里廟

深寧先生文鈔披餘編卷一

宋四明王應麟伯厚撰

里後學葉熊輯

記

昌國州重建大成殿記

淳祐紀元之六年聖上首善崇化以四方風緣字穗書敷賁雖頻庠聲序音丕冒出日昌國大夫沈聲始至謁校宮時禮殿之建適六十禩矣朽蠹弗葺諸生進而言曰學肇基於縣治之東淳熙間王令沅遷於芙蓉洲西

深寧文鈔披餘編

卷一

一四明叢書

約園刊本

挹秀涵清氣勢閎偉俊人魁士含章挺生道原文脈實繫茲殿盍鼎新之對敷雲漢作人之休德君曰承流宣化職也敢不祗若嗇用鳩工士驩趨之參預應公嘉其意諭帥守顏公佐以郡少府錢經始於明年莫春越季夏殿成般爾獻公枚枚奕奕貌象惟肖如臨沂泗侑坐暇食端章儼莽降庭庭止式禮莫愆冠進衣逢瞻儀興敬觀摩麗習文風藹如明年君入監左帑相與祠於學既十年諸生思之請著石章應麟郵末學也辭弗獲嘗讀臨之象曰君子以教思無窮夫澤上有地猶君子之

近民也近民則教彌敷故周官族閭之讀法視州黨尤密今之學郡修而邑弛爲吏者政急而化緩期會訟獄日鯁鯁畏百適慮不越几案而夫子宮牆漫不省健者舞知怠者視蔭弁髦武城蒲密之言而諉曰難治教化不明醇澆樸散治不愈難與然非獨今日也漢東京儒雅最盛令長垂意學校者惟宋均楊仁者著於傳何其慨寂寥哉沈君能急所緩喟然興於學可謂知本矣昔孔子慨道不行託興於浮海是邦近天子之光家詩書入孝梯吾道其行矣乎縣大夫雖不得宿其業以候道化之成後之君子勿替引之率時髦士規聖矩賢毋以小成自畫學必正大志必高明言必仁義行必篤敬進而經綸天下之大經退而居賢德善俗俾耆老搢紳願瞻楹桷肅然改容曰此賢令教思之德也將見立於朝者爲皋稷入其里者比鄒魯尙當墨筆以頌化民成俗之功云

重修鄞縣儒學記

鄞在漢爲鄞屬會稽郡唐屬明州建夫子廟於縣東五代改鄞爲鄞宋始立學王文公宰縣因廟爲學教養縣

之子弟風以詩書衣冠鼎盛後遷縣西南兵燬久未復
主簿呂康年請於郡相舊址初禮殿設跪像堂曰養正
爲齋者四至元十九年增二齋二十六年郡城災茲學
歸若魯靈光斯文未墜道其泰乎二十八年濟南陳公
祥爲肅政廉訪副使分治於明崇庠序之教明年新郡
學顧邑校風摧雨圯榱榼將壓殿雖更坐像庫陋未合
古制爰命撤舊宇而新是圖夏六月鳩工經始規模崇
闓視昔增煥縣尹張君孝安提其綱丞王君閏捐祿米
以助主簿任君謙亦贊畫焉多士競勸佐厥費事鉅用
不給檄縣以義役租續之揭石爲門六扇有伉掄材爲
殿隆棟翬飛清池泱泱芹藻春意自堂及序以次繕修
實惟禮樂之使居德善俗啟迪化原以恢宮牆之壯觀
逢掖來游誦公教澤永永無斁始教諭趙必燮庀役未
克就巖得桂繼之出私橐帥先吳應酉聯事協力旣成
請識石章應麟居是邦不敢以髦疾辭惟古者百里有
師教以道藝孝弟仁義斯民也三代所興其學也闓爲
左右塾黨以正齒位時會於州序去民愈近施教愈密
自武城絃歌弗聞急爾絲而緩教化先政刑而後詩書

若密令舉善而教新城長延聚生徒何其寂寥哉無以表倡之也我思古人有行部先卽學宮見諸生試論有行縣學宮處士執經對講誰其嗣之賢使者新斯學也豈徒美宮室云爾將新士以新民也昔鄞有杜先生醇學行望一鄉縣大夫再書然後起其書謂斯道我先得之必推餘於古人願賜臨以爲之師其自重難致如此師道立善人多淵源有自爲師者盍以爲法乎鄧士漢書僅一見虞仲翔之言可考也陸士龍稱鄧之俗禮節恭謹蓋素履行願修其天爵是爲入德之基進道之階

深學文鈔撫餘編

卷一

四四明叢書

約園刊本

自學校之建俊乂興起鄉先生前後九人其四出于鄞皆以忠信爲本踐履爲實仰高蹈景其人若存爲士者不自勉乎師知所以教士知所以學朝而受業晝而講貫夕而復習思無愧于儒之名前哲有云學所以學爲人學爲君子學爲忠與孝也服膺三言是訓是行化海瀕爲洙泗以一邑爲天下式將自吾鄞始謹書其事詒夫敦學者式克用勸十三年秋八月壬寅記

慶元路建醫學記

醫之興也其于上古乎巫彭初作醫曷爲本于三皇古

三墳書倚相後無聞易以筮傳本草內經以醫傳天之
庸民至矣本草內經醫之原也易何與於醫坎離陰陽
參同納甲發其繼養生者宗焉是以言醫必曰羲農黃
帝云成周醫有師江左元嘉昉建學唐州郡有學助教
掌之宋崇觀間置學京師在外附職俟頒自古昔方技
爲王官之一守今朝廷崇獎蠲復悉與儒等諸路設校
立師教育之將躋斯民壽域德至渥也惟四明學猶闕
至元二十八年冬肅政廉訪副使陳公祥攬轡來臨察
民嗷呻尤以醫爲重願講習無所喟然思作新興起之
相攸胥宇鳩工經始愆祀三皇禮儀肅堂宇門廡奐奕
學成屬予以記余聞之前修醫之爲道推本五行六氣
寒暑日星考驗風土山川其于人也骨節經絡揲荒胸
穴內則藏府焦鬲井谷精微奧妙雖國工高手弗能究
豈庸夫俗子可與知世不輕試而苟得者鮮矣此學醫
者人費可不謹乎是故醫不可無學岐伯之師曰僦貸
季泰越人之師曰長桑君太倉公之師曰公孫光陽慶
蓋下學可以言傳上達必由心悟誦言未明於心讀古
人之糟魄斲輪猶議之矧壽天生死所繫乎然則學孰

爲要一言蔽之曰仁程子謂醫書以痿痺爲不仁最善
名狀仁者又云切脈可觀仁仁人心也天地生生之心
人得之以爲心心仁則疾痛切身若保赤子萬物一體
也不仁則善不勝利理汨於欲肝膽楚越也陟降庭止
前聖臨之在上以仁存心心合天如涪翁之不求報
宋清之不爲市龐安常之好施許叔微之陰功精義人
神將得不傳之妙於筌蹄之表惟貫道器德藝於一致
者可以語此其或專己臆決乃曰醫者意也是猶廢學
古入官之訓而曰何必讀書其害不止誤注本草而已

深寧文鈔餘編

卷一

六四明叢書

約園刊本

殆非敦學師古之意雖然余言耄矣僂以爲然願以爲
學者之箴石是歲九月旦日記

義田莊先賢祠記

古者祠先賢於學明之三賢何以祠於義田莊田以義
名三賢爲鄉里立也三賢者誰忠定史越王莊靖汪公
端憲沈公也始忠定里居篤於義仕者勉以勵廉隅學
者勸以修文行乃爲義田以濟婚葬而汪沈二公比善
協心聞者樂施其規約密其給授公立義以爲的一鄉
莫不知義自紹熙庚戌迄今百有四年而三賢有祠亦

七十有七年矣成畫猶存初意寔失濟南陳公祥寧繼
咨諏惟儒雅風教是崇是迪嘉前修之尙義慨實惠之
未徧謂職之冗員子孫之繼廩二弊不可不革維之以
鄉校必守舊規董之以鄉人必選宿望砥節首公永保
勿墜傳之百世可也於是屬郡博士蘇焱前軍器監丞
陳定孫總其綱學錄姜材之前壽春推官史徽孫主出
納凡故冢之裔名儒之後暨學校職生有喪貧不能舉
孤女不能嫁者采諸日評參諸輿論覈實而助之因時
度宜眎昔爲寬所與寡而所及者眾諸老之美意幾廢
而復續先是祠堂陋更爲三楹助田於斯者列侑於旁
春秋祀焉歲中稔頗有餘粟因繕葺門軒及亭築垣浚
池粲然一新應麟聞而歎曰義者天理之公人心之正
大學以是平天下然而行之一鄉愈近而愈不可欺我
思古人禮俗相交患難相卹藍田呂氏之爲鄉約也貧
窮相救婚喪相助古靈陳公之教其民也良心之存善
端之充義不可勝用比閭族黨保受調救之法千載一
日也是邦如昔義里前獻表率後進忠厚廉恥之俗成
閭閻無告若己痾瘵用敷遺無窮之澤藍田之爲約

蓋不專美矣。荆者本於義，既久而義之實不明，廉車之來振飭，扶植居賢，德善俗於古，靈有光焉。咸願識其事，詒永久。惟建莊始末，宣獻樓公紀載已備，而祠未之述。義理在人心，萬古無弊，秉彝好德，誰無義心。是心可泯，則是義可廢。續古之人，勿替引之，與者不爲私恩得者，不以他費相勸，以義無愧於心，斯無愧於先賢。敢著之石章，以諗來者。

真逸閣記

子王子自柱下史免歸爲句曲山祠官，夏日憩北窗夢

遊其處，一道士延入精舍，凝塵滿席，惟有道德經一卷。緇首章問焉，道士曰：無者感而寂，未嘗無也；有者寂而感，未嘗有也。願也，晏也以有無言道，而道隱矣。且子不聞華陽隱居之詩乎？架上取梁書傳讀之。至夷甫散誕，平叔談空之語，灑然悟曰：列仙之儒，知道若隱居，鮮矣。古之博大真人，尹聃是也。而誕者非真言，中倫行中慮，是曰逸民而空者，非逸爲誕。且空者謂萬有皆無，獨以執利爲真，有而身殉之邪？說波流變華而夷極於梁，而後止。易曰：知幾其神乎？隱居有焉。世以隱居比子房，蓋

有經世之學者爲能遺世而立於獨蟬脫滓濁不以富貴櫻其心寧學曳尾之龜而不鯨驕餌彼謂山中宰相者陋哉言未既遽然覺起至戶外有黃冠來謁眎其刺壽聖觀石宗玉也進而言曰觀在寶龜寺山隱居傳云嘗詣鄆縣育王塔自誓受五大戒是山蓋嘗游息焉今新三層樓放懋永元舊築上曰真逸以奉肖像傲松在其中伴雲在其下儲清聯邃鞅埃風而凌倒景恍如金陵華陽之天與三茅君拱揖不知猶吾鄆也嘗聞故老言吾邦山遠水秀神仙攸宅鄆大里黃公茹芝肥遯者也鄆之東有梅山子眞避世之地也浮海至翁洲安期生之遺跡可尋也樓上松風謾謾如聞吹笙聲意者隱居乘飈車羽輪從二三子期汗漫於九垓之外其亦樂於斯乎願紀其事與山石無極子王子謝不能因語其夢遂筆而爲記

奉化重修縣治記

越之東境爲鄆漢屬會稽唐合鄆於鄆開元中州以四明山名始建縣曰奉化其地則漢之鄆也古鄆城在焉鄆有大里黃公列於四皓卓乎千載人物之冠冕先賢

風流所被其俗純如其士邪如迪簡墨綬長吏保綏受命民非才足以撥煩廉足以砥俗仁足以摩拊疲瘵不輕以百里畀也縣治燬於丙子師旅饑饉相仍遺黎將焉困頓令長迫期會急繭絲慮弗及遠王君宗信僅克初聽事三楹李尹天益纒繕吏舍襄賁丁君濟宰茲邑惟武城之室單父之堂所以疏視淪聽清應物之原若昔董安于治晉陽一牆一柱猶不苟匪賁輪奐以爲華壯棟宇以自奉也爰契我龜經之營之任城王君澤爲丞比善協志而新是謀邑士大夫咸勸趨之庶工丕作民不知勞始事辛卯之冬考成壬辰之秋丁君以書曰一日必葺古有明訓百堵皆興詩人詠焉聽事東西吾名以節愛清安兩廡翼焉吾名以一清四畏堂曰得物以息以燕亭曰清斯有沼有荷挹爽西山扁以高清殖殖其楹轍轍其門胥吏攸處下逮園扉粲然一新曷敢視官舍如蓬傳而怠厥事願諭後之人俾勿壞余病髦不能文嘗謂君子爲政其本自相在爾室始于室之邑易治也一室之自治爲難子程子之視民如傷子張子之訓民善俗以一邑爲天下之式其本焉在惟暗室之

不欺而已巖谷深窈欲其疾痛必聞如接几席胥徒囂
悍欲其隱微必察如在戶庭堂上之一笑頰堂下之萬
休戚係焉若保赤子心誠求之推是心達於政蒞密中
牟之化可復也詩曰無已太康職思其居然則居此室
可不敬歟聞丁君律己首公愛民來吏日泣庠序惠訓
不倦多士訥訥誦子產之誨我弟子是能知本矣耆壽
俊民相與言曰茲不可不書乃不敢固辭書其事詒永
久用勉夫字民者至元二十九年八月前進士王應麟
記

九先生祠堂記

古之鄉先生祭於社近世祠於學社所以養學所以教
而教之功尤大秉彝好學之良心百世猶旦暮況其邇
者乎誦其詩讀其書尙友古之人非一鄉之望也天下
之望也四明鄉先生有九人焉宋慶曆建學之初楊杜
二王樓公以道德文行師表後進或授業鄉校或講道
閭塾衣冠文獻益盛以大五先生之功也淳熙之旣沈
楊袁諸公以尊德性求放心爲根本闡釋經訓躬行實
踐學者知操存持養以入聖賢之域四先生之功也郡

泮舊有祠因鬱攸之廢至元甲午季冬朔且廉訪使者
秋公桂屬郡博士戴君友始復茲祀觀者興起元貞丙
申月正元日廉訪使者完顏公貞至學宮謂祠宇隘陋
未稱相攸尊經閣之右規模一新府牧月列公提其綱
帥屬協力庀事以迄口成妥侑如禮多士訢訢周爰咨
諏章善扶教以穀我子弟惟二使者之賜亦惟承流宣
化之賢立師道以美風俗皆宜書凡我同志盍亦修孝
弟忠信尙禮義廉恥學必正大行必篤敬式時前哲訓
用對作新盛德可不懋歟

赤城書堂記

台之寧海其先賢曰赤城先生羅公德業爲元祐名臣
道義爲一鄉師表教思無窮踰二百年清風肅然聞者
興起舊祠於學猶未特祀邑之宿儒前進士胡君元叔
倡率鄉人倣古閭塾之制卽公游息之地初爲書堂合
鄉之俊秀子弟而淑艾之諏諸鄉評延篤學多聞之彥
前進士舒君岳祥爲之長前進士孫君鈞趙君孟禮胡
君三省前太學陳君應嵩劉君莊孫爲之錄訓之以孝
弟敬遜其規約如藍田麗澤而稽經訂史種學積文以

爲有用之實於佩濟濟絃誦洋洋鄒魯之風藹如也某
聞而歎曰美哉教學之意乎古者立教始於鄉仕焉而
已者歸教閭里謂之鄉先生上老庶老朝夕坐於塾是
爲左右師入而事親從兄出而誦詩讀書小而灑掃應
對大而明德新民上帝之衷蒸民之彝師徒所教之倫
冢宰所降之德少而習焉不見異物而遷焉是以禮義
興風俗淳成人小子皆士君子之行也昔有正素戚先
生講道睢陽始建學舍文忠富公文正范公皆游習於
斯爲一世偉人家法之粹延及後昆正素子孫若維綸

若舜賓舜臣世學相承睢陽遂爲四書院之冠簡策有
光焉今寧海耆德鴻生咸克憲慕前哲啟迪後進俾之
尊德性求放心以進於誠明養其原而卽理以應事孝
弟忠信培其根而餘力以學師道立善人多庶幾見睢
陽之盛詩云有斐君子終不可諼兮羅公有焉高山仰
止景行行止學子其懋哉某病不能文然居相邇他
日海瀕爲沂泗門人若安定孝友睦婣任恤如成周之
時家稷契而戶曾閔也行其野則冀缺之耨茅容之耕
攸介攸止日多髦士推家之教爲天下法將自茲始故

樂爲之書

天興廟記

句章漢縣也隋省入鄞唐以鄞爲明州其後名鄉曰句章鎮曰小溪山水清遠地靈旁薄丞相文節魏公杞國史吏部安公劉居焉吏部之子松陽主簿庶謂余曰鎮之士神自唐迄宋分派它山廟食朝陽里耄老相傳號爲天興惠我嘉師祥慶饗倉建炎兵燬祠宇歸存嘉熙庚子札瘥胥漸迺禱迺禳若有呵護家用平康咸淳甲戌旱暵苗將槁籲禱之翌日雲油雨沛甫田登成明年

盜弄鉏梃津涂梗塞闔境帖安繫神之休其弭災禦患施及鄰壤匪直福一方而已庶先君子率鄉士民控於郡守部使者轉聞於朝下儀曹奉常議奏賜廟額曰天興勅牒將頌而世故紛縕弗獲被成命然舊績具在願書以詔永久余昔者長春官實與聞斯事曷敢不諾相古先民有周命祀達於鄉遂水旱之不時於黨鄙乎禱之而正師涖焉疾癘之弗蠲於族鄰乎醑之而師長涖焉正辭薦信義之修而禮之藏惟以保艾受民自里社廢鄉里缺越望非鬼之祭雜糅貫瀆是故有功於民則

祀之著於祭法職在秩宗教民祈報勿替敬典無從匪
彝無卽怡淫禮之大經也惟茲有神式克敷祐天眎銷
沴爲和易歉爲豐咸曰耿耿社哉夫神聰明正直而壹
依人而行士競乎教農力乎穡修其孝弟忠信爲德馨
者愈加肅畏矣

九里廟記

明自唐開元爲州城西門外有祠者臺云大曆中州刺
史吳侯廟也侯諱謙字德裕官水部員外郎史策軼其
傳郡乘缺其蹟遺愛在民歆血奉嘗春秋薦蘭菊悠久

深寧文鈔

卷一

十五

四明叢書

約園刊本

弗懈余艤舟扶藜過廟下式瞻貌像問其故則曰侯守
是邦開西郊之湖膏澤滲漉甫田登成其地爲九里堰
因以名廟歷載縣邈民猶曰吾使君也召棠勿翦韋碑
未刻王文公宰鄞爲詩以識山色湖光之句遺黎誦之
余肅然欽歎斯所謂盛德至善民不能忘者乎語鄉父
老曰古者建祀以爲民也民功曰庸自稷以來是尊是
奉以水佐耕豐稼於野芍陂七門之祀芬至今未沫惟
明瀕海厥土瀉鹵歷選良守漑田興利孔內史之於句
章隔任刺史之於廣德湖皆載在簡牘今惟鄞令之王

列在祀典他無所紀侯之牧我民也不求焯焯之譽而
實德著於人心不爲皦皦之政而流澤被於後世若昔
河南守吳公治爲天下第一而史無可書之事言漢循
吏爲稱首侯豈其苗裔與河南治聲止一時侯自大曆
迄今五百有餘載民思無斁於前修有光焉咸以無心
爲感兌以無言爲說此秉彝好德之良心也越俗譏鬼
史巫紛若邪詭妖誘匪禮經攸迪無知氓不蠲絜亦罔
能穀於赫仁賢食報茲土正大昭明允合先聖王之祭
法粢醴馨潔永永烝享豐年叶氣惠我無疆其孰曰不

深寧文鈔餘編

卷一

十六

四明叢書
約園刊本

宜父老曰謚哉盍鑑諸麗牲之石時萬時億承神嘉祉
余旣書其事又作迎送神詩俾歌以侑其辭曰坎擊鼓
兮鄞水許思仁侯兮昔召父陽九里兮醜流爲雨水決
決兮芑芑麥黍鴻隄陁兮謠苴芋侯嘉蹟兮依其在渚
神之來兮廳輪下蘭觴勺兮薦椒醕民不忘侯兮歌且
舞侯不忘民兮俾寧宇神之歸兮娛瑤圃格顯穹兮降
多祐屢豐穰兮除疾苦年千世百兮保文吾土事侯如
存兮侯其福女敬其承祀兮無怠終古

四明自唐長慶初遷州治於鄞城東門之外瀕江民病
涉刺史應彪始建浮橋有虹景見雲表卽其地維舟隨
潮汐上下故橋以靈名其長爲丈五十有五廣尋有六
尺宋更名橋曰東津屢圯屢修郡乘備焉由長慶癸卯
迨今四百六十有九載橋之名雖存舟漏木朽鐵繩斷
竹索腐行人肩摩趨葦杭以濟迅颺駭浪瞬息淪爲魚
糜莫或省憂濟南陳公祥咨諏民瘼聞之嗟戚慘怛若
己納之溝更舊圖新以身帥之牧守掾屬協力競助士
庶風動不約而從飭材庀工治舟易木鼓鐵爲纜捷竹
爲竿規制鞏壯民不知勞昔之畏塗今履康莊波臣受
職罔有昏墊漕艦琛舶湊集城下夸矜初見仁人之利
溥哉公猶爲永久之慮擇民戶十有六家蠲徭役科調
隸局任橋事未做而修費約工省不止一時之謀而胎
無窮之利仁心遠矣邦人訢訢謂惠行政舉鄭子產有
愧焉百世之澤也嘗讀易之中孚曰利涉大川乘木舟
虛也蓋信發於中誠感於物上至誠以順於下有孚
以從其上惟悅而異可以化邦可以濟險公之新斯橋
也其得中孚之義乎造舟爲梁岐周肇端富平成橋元

凱垂績曰渭曰河非有江之險也江與海接至險不測
風濤震蕩鯨奔蛟橫是以橋難立而易圯君子敬保受
民命與利禦患推惻隱之心克施有政作事於始必將
爲法於後使繼者皆如始作之心朝計夕思日葺月繕
用惠我無疆遺愛在民與江不竭若洛陽橋大書深刻
孰曰不宜迺識其事俾後人勿墮

廣恩崇福寺記

浙河以東山水名天下四明爲最出四明西門至林村
行六七里曰桃源循源而入虬騰駟奔氣勢奇峭紫巖

深寧文鈔餘編

卷一

七六 四明叢書

約園刊本

爲最溪清谷窈楸檟鬱茂是爲太師袁衛公之阡公篤
厚好善用昌大厥家嗣子尹神京貳樞庭相攸紫巖之
陽俶建梵宇適承先志奉大士像而法華手澤藏焉請
於朝賜名廣恩崇福秀概瓌觀甲於諸方奧殿穹堂儼
然寶地林霏嵐翠獻狀几席松風澗泉與鐘魚相答朔
基鳩役匠成於心則住持僧可仁也輪奐之媿田疇之
闢仁皆躬服其勞雅人勝士來遊而嘉歎之惟古者禮
貌大臣推本德善之積廟祀其祖禰施於烝嘗彝鼎近
世又卽緇廬寓蓼莪寒泉之思於是錫命以寵靈之蓋

君子謹終追遠無不用其極而遇大臣之禮亦至矣哉夫秉彝好德人之良心釋氏以空寂爲教若外乎倫紀然其書有大報恩篇言孝與儒合是故致嚴致愨而宮室之以薦苾芬於九原禮可以義起也觀於斯者愛敬之心油然而生矣余謂善必有慶如殫斯穫非以徼福也教子以食其報可謂使爲善者勸一宜書仰飛雲而俯拱木著存不忘於以詔萬□子孫勿替引之二宜書披壤壤經營用力勤刻意專南豐所爲稱學佛者將以勉吾儒也三宜書寺經始於紹定庚寅之孟秋越淳祐乙巳季夏考成是歲之秋可仁請識歲月詔永久遂書其事於石郡人王應麟記

寶慶寺記

鄞之北十里曰青林面江背阜夷曠闕傲苾芻宗本始闢藜藿爲精藍三傳至廣清闢而大之開禧丙寅請於朝遷舊院額揭名寶慶宣獻樓公大書其額蔚爲叢林偉觀廣淨繼之輪奐鼎新祖架嗣事廣續前緒像以尊教樓以名鐘青林有亭雨花有軒拮拾鉄累日衍月盈一旦化庫陋爲瓌麗旣成架猶子智恭謁于書其事余

以學佛久而傳者心法也傲宮室末矣明此心之妙木
下一宿蓬藜而行可也恭其語采之徒俾歸而求之

傳

大隱楊先生傳

楊先生適字安道慈谿人隱居大隱山爲人醇厚介特
議論辯博平正人有善則稱之不善如未之聞爲學要
行乎己惟恐爲人所知毀譽榮辱不以動其心人莫得
而親疏蓋自比仲元叔度之流鄉人嚴憚之相語不以
名氏而尊之曰大隱先生衣食纔自給非義之餽一介

深寧文鈔餘編

卷一

二十四明叢書

約園刊本

不取躬耕養親族之貧者分賑之鄰盜其稼人告之先
生愀然曰彼窮厄而求其生爾勿治也盜聞之慚悔其
後無敢侮者善言治道究歷代治亂之原孫威敏公沔
自諫官出按浙東西刑獄欲見先生先生不肯見先生
之越時范文正公守越聞之就見焉輿致府中澹焉無
求公益賢之先生治經不守章句黜浮屠老子之說歌
詩卓越超邁容儀甚偉衣冠儼如始友錢塘林逋後與
同郡王致杜醇結交後進莫不師之退處四十年德行
益高名聞京師仁宗詔求遺逸太守鮑柯以名聞賜以

栗帛太守錢公輔又薦之授將仕郎試太學助教州遣從事致詔書袍笏輿從迎之先生辭不受遁去壽七十有六遺令冢石壙前曰宋隱人之墓熙寧二年榮陽張岫爲文表之

慈谿杜先生傳

杜先生醇越之隱君子居慈谿學以爲己隱約不求人知孝友稱於鄉里耕桑釣牧以養其親經明行修學者以爲模楷慶曆中鄞始建學縣令王文公安石請先生爲之師其書曰天之有斯道固將公之我先得之而不

深寧文鈔揀餘

卷一

五十四明叢書

納園刊本

推餘於人使同我所有非天意且有所不忍也願先生留聽而賜臨之安石與有聞焉先生引孟子柳宗元之說以辭再書強起之曰孟子謂好爲人師者謂無諸中而爲有之者豈先生謂哉柳宗元惡知道韓退之毋爲師其孰能爲師天下士將烏乎師哉先生始就焉慈谿令林肇立學又起先生爲師亦固辭王文公作師口以勉之二邑文風之盛自先生始先生談詩書不倦爲詩質而清當時謂學行宜爲人師者也

鄞江王先生傳

王先生致鄞人與同郡楊杜二先生爲友俱以道義化鄉里諸生子弟師尊之稱三人皆爲先生嘗與牧守言政事王公安石復書曰無事於職而愛民之心乃至於此可以爲仁矣年七十樂道安貧妻收遺秉子拾墮樵浩然無悶鄉人莫不高其行

城南樓先生傳

樓先生郁字子文自奉化徙鄞卜居城南志操高厲學以窮理爲先爲鄉人所尊處窮約屢空自樂慶曆中詔郡縣立學延致鄉里有文學行義者爲之先生掌教縣庠者數年又教授郡學前後三十餘年學行篤美信於士友一時英俊皆在席下門人之知名者清敏豐公稷光祿袁公穀天台羅公適也登進士第調廬江主簿自以祿不及親絕仕進意以大理評事終於家有遺集三十卷贈正議大夫子孫皆踵世科五世孫鑰德行文章爲時名臣仕至參知政事

桃源王先生傳

王先生說字應求鄞人鄞江王大隱先生之門人也與弟設皆著名教授鄉里三十餘年熙寧中以特恩補州

長史無田以食無桑麻以衣怡然自得子孫世其學子
珩宗正少卿孫勳提舉廣南市舶一錢之利皆歸有司
家人不識舶貨之名及卒賈胡率錢二百萬緡爲賻正
已卻之曰吾父以廉直聞雖貧猶能負喪以歸不媿廉
叔度也清白之傳實先生家訓正己終太府卿

廣平舒先生傳

舒先生璘字元質奉化人雅有大志恥以一善自名篤
實不欺無毫髮矯僞入太學師張宣公栻又從陸文安
公九淵與朱文公及呂成公兄弟講磨躬行愈力嘗曰

深寧文鈔披餘編 卷一

三五 四明叢書
約園刊本

吾非能一蹴而入其域也刻苦磨厲改過遷善日有新
功亦可以弗畔云爾第進士教授徽州以身率多士日
日詣學寒暑不少懈暮夜亦間往築風雩亭日有講求
涵泳之功質或不美未嘗忿疾端吾矩矱需其自新作
詩禮講解啟迪諸生徵人追思之曰吾鄉學問之源窒
而復通者先生實開之也因祠於學信道甚篤利祿之
念不萌宰平陽臨政聽斷人服其平終於宜州通守慈
湖先生銘其墓謂孝友忠實道心融明門人國子博士
李元白傳其經學淳祐中特諡文靖

定州沈先生傳

沈先生煥字叔晦自定海徙鄞偉儀觀尊視瞻音吐鴻
暢羣居鄉校以嚴見憚入太學行甄優諸生始與臨川
陸先生九齡爲友一日盡舍所學以師禮事焉晝夜鞭
策求友如不及務本趨實不自矜衒每語人曰當隆師
親友循規蹈矩以倡郡國第進士講學不倦自以資稟
剛勁非所以歡庭闈大書深愛和氣愉色婉容數語於
壁日觀省焉門人弟子決疑請益者自遠而至啟告簡
嚴昏者明柔者立鄙吝者意消中心悅服師道益尊爲
大學錄修教養法士爭歸之不肯詭隨苟容以取光寵
遂補外終於舒州通守先生非聖哲書未嘗誦習與朱
文公呂成公問辨凡世變之推移治道之體統明君賢
臣之經綸事業孳孳講求日益深廣追贈直華文閣特
諡端憲

慈湖楊先生傳

楊先生簡字敬仲慈谿人清明純一非禮不動燕私儼
恪如臨君師學以古聖爲的入太學第進士主富陽簿
日諷詠魯論孝經堂上不動聲色而民自化陸文安公

來富陽長先生二歲指以心學之要遂北面師事焉調
紹興府理掾朱文公持庾節首薦之每稱先生學有爲
已功夫宰饒之樂平謂教養茲邑欲使邑人皆爲君子
況學者乎誨之醇醇不倦爲講堂訓曰學者孝而已矣
時有古今道無古今時有古今性無古今聞者興起以
國子博士召講易乾卦發人心固有之妙趙忠定公汝
愚免相祭酒李祥抗辨之先生上書亦以學黨斥閒居
十三年以祕書召遷著作將作少監守溫州訪賢者禮
致之崇孝養明宗族相卹之令首行鄉口效周官敬敏

探軍文鈔餘編

卷一

三五四明叢書

約園刊本

任卹之類書善不書惡除工部郎將作監告老奉祠召
不起終於敷文閣直學士以寶謨閣學士致仕壽八十
有六諡曰文元有詩易春秋論語古文孝經傳孔子閒
居解又著己易輯先聖大訓先生至誠篤敬葺功之戚
下泊總麻服制喪期一以經禮爲則而容色稱之平居
接物從容和樂未始苟異於人而高遠自不可及北境
傳誦其文曰此江南楊夫子也

絮齋袁先生傳

袁先生變字和叔郵人少以名節自期入太學見陸先

生九齡德容粹盎親炙之同里沈楊舒三公皆歿於學朝夕以道義切磨第進士爲太學正時朱文公諸名儒已去先生知不爲時所容尋以學黨更歷外服入朝至太常丞兼考功郎知江州提舉江西常平以都官郎召遷司封又遷國子司業祭酒延見諸生迪以切己之學常病世學者襲先儒緒言未能自得於心不足以爲學吾心卽道不假外求忠信篤實是爲道本聞者竦然曰得以祕書監兼崇政殿說書遷禮部侍郎侍講猶兼祭酒講詩二南於先王正始之本自身而家自家而天下

者深寓規倣之意列國變風有關君德治道者亦託其義以諷立朝守正不阿時好議者指爲好名遂奉祠以歸著述弗倦或勸宜少休曰吾以此爲筮鑪管磬不知其勞也終於顯謨閣學士諡曰正獻先生嘗曰此心存則雖賤而可貴不存則雖貴而可賤大哉心乎與天地一本精思以得之兢業以守之則與天地相似每謂爲學當以聖賢自期仕官當以將相自任其所講明體用兼綜於書禮記論說尤詳成就後學甚眾子甫進士第一爲兵部尙書國子祭酒亦稱名儒

李猷傳

李猷字嘉仲一字獻夫鄞人建炎初以婦翁沒王事自京師詣南都行在所見友人陳東少陽從容謂曰東被召未有館舍子爲我圖之猷曰太僕陳寺丞正彙嘗相邀猷未敢往試同謁之既見少陽遂館焉少陽再上書不報有榜通衢斥附會李綱者猷知爲少陽設也錄示少陽勉以歸曰東以召來不敢私還太僕丞子大方倉皇過猷曰少陽已報赴應天府矣猷曰少陽其不免乎及暮乃知少陽已死於市猷哭於館所爲位祭且祈曰少陽以忠諫死勁節英氣當不與草木同腐吾欲收少陽歸葬先塋恨無由知之少陽有靈其啟我心越一日得之具棺衾焉又一日得其元面如生合而斂之欲買舟東下會其鄉人胡中行從太學來欲求護柩猷服其義併以行李付之猷亦不暇詢婦翁事遂還京師猷之私識云爾猷以婦翁恩補官終肇慶府節推

序

易康成注序

鄭康成學費氏易爲注九卷多論互體以互體求易左

氏以來有之凡卦爻二至四三至五兩體交互各成一卦是謂一卦含四卦繫辭謂之中文所謂八卦相盪六爻相雜惟其時物雜物撰德是也惟乾坤无互體蓋純乎陽純乎陰也餘六子之卦皆有互體坎之六畫其互體含艮震而艮震之互體亦含坎離之六畫其互體含兌巽而兌巽之互體亦含離三陽卦之體互自相含三陰卦之體亦互自相含也王弼尙名理譏互體然注睽六二曰始雖受困終獲剛助睽自初至五成困此用互體也弼注比六四之類或用康成之說鍾會著論力排互體而荀頴難之江左鄭學與王學並立荀崧謂康成嘗根源□□顏延之爲祭酒黜鄭置王齊陸澄詒王儉書云易自商瞿之後雖有異家之學同以象數爲宗數年後乃有王弼之說王濟云弼所誤者多何必能頓廢先儒今若宏儒鄭注不可廢河北諸儒專主鄭氏隋興學者慕弼之學遂爲中原之師此景迂晁氏所慨歎也易有聖人之道四焉理義之學以其辭耳變象占其可闕乎李鼎祚云鄭多參天象王全釋人事易道豈偏滯於天人哉今鄭注不傳其說間見于鼎祚集解及釋文

詩三禮春秋義疏後漢書文選注因綴而錄之先儒象
數之學於此猶有考云然康成箋詩多改字注易亦然
如包蒙爲彪積豕之牙爲互包荒讀爲康錫馬蕃庶讀
爲蕃遮皆甲宅之皆讀爲解一握爲笑之握讀爲屋其
說近乎鑿學者盍謹擇焉厥常喜新其不爲芟茲者幾
希浚儀王應麟識

詩地理考序

詩可以觀廣谷大川異制民生其間者異俗剛柔輕重
遲速異齊聲音之道與政通矣延陵季子以是觀之

深學文鈔餘編 卷一

二五 四明叢書

約園刊本

史公講業齊魯之都其作世家於齊曰洋洋乎固大國
之風也於魯曰洙泗之間斷斷如也蓋深識夫子一變
之意班孟堅志地理敘變風十三國而不及二南豈知
詩之本原者哉夫詩由人心生也風土之音曰風朝廷
之音曰雅郊廟之音曰頌其生於心一也人之心與天
地山川流通發於聲見於辭莫不繫水土之風而屬三
光五嶽之氣因詩以求其地之所在稽風俗之薄厚見
政化之盛衰感發善心而得性情之正匪徒辨疆域云
爾世變日降今非古矣人之性情古猶今也今其不古

乎山川能說爲君子九能之一毛公取而載於傳有意其推本之也是用摺傳箋義疏參諸禹貢職方春秋爾雅說文地志水經網羅遺文古事傳以諸儒之說列鄭氏譜十首爲詩地理考讀詩者觀乎此亦升高自下之助云王應麟伯厚甫自序

諸經通義序

諸經通義者漢五經課試之學也維漢以文立治以經選士鴻生傳業支蕃葉滋闡繹道真探索聖蘊決科射策則有通義之目以孟子明事則有博文之名趙岐題

深學文鈔餘編

卷一

三十四明菴書

約園刊本

詞物述大概謹稽合史傳而爲之說曰聖人作經載道學者因經明道學博而不詳說無以發羣獻之眇指說詳而不反約無以折眾言之殺亂故必曰正學之源而後能通乎聖人之海粵自木鐸聲寢經與道榛塞孟子闢邪距詖羽翼孔道七篇垂訓法嚴義精知性知天易之奧也以意逆志詩之綱也言稱堯舜書之要也井田爵祿之制可以知禮王霸義利之辨可以知春秋儒者稱之曰通五經噫孟氏斯謂之通矣嗟哉漢之尊經乎儒五十三家莫非賢傳也而孟子首置博士九流百八

十九家莫非諸子也而通義得述孟子斯文之統紀以
查多士之趣向以純非徒綴訓詁誦帖舉而已若稽前
載建元五年春五經始立博士元朔五禩通一藝者試
之孝元好儒通一經復之博士十四昉於建武選受四
經俶於建初科有甲乙試有家法或試經於太常或誦
說於博士永元十四年司空徐防建言開五十難解釋
多者爲上第演文明者爲高說所謂博久明事雖軼不
傳然建武中太子諸王欲爲通義而聘鄭眾建初四年
會諸儒白虎觀命史臣著通義曹褒傳慶氏禮亦纂通
義十二篇觀其名可求其略矣還觀有漢之盛鉅儒名
師開門授徒者錄至萬六千人經數家家數說章句多
者百餘萬言歷祀縣邈溼沒居多嘗卽詩禮訓注考之
小弁述親親之言王制述賁助之法爵德齒釋於太宰
經界釋於小司徒圭田市廬關譏釋於載師廛人司關
助有公田國中十一及函矢之說又詳列於考工記珠
貫絲組上下洽通蓋傳得其宗無越鄒孟求觀聖道必
自茲始否則續以華藻汨以韓侯□□詭辨稽古蔓詞
燕說郢書吾道秀矣焉得而通諸雖然經學至於通而

止漢儒之說何其紛紛也五經通義劉向輯之五經通論沛獻著之注丹易通專己黨同轍殊牖易君子已不能無難況課試之學以明經爲祿利之塗則通義乃諸儒之筌蹄也其不傳於今有以夫吁師異道人異論漢儒之說猶得以考異同析是非也暨唐貞觀十三年會釋章句爲正義百七十卷由是舉天下宗一說而無深造自得之切若明經又變爲口誦而口義墨義興焉君子又惜通義之不傳於今也

漢制考序

深寧文鈔餘編

卷一

三四明鏡書
約園刊本

漢制載於史者先儒考之詳矣其見他書者未之考也嘗謂法始乎伏羲而成乎堯三代損益至周大備夫子從周與從先進之言所謂百世可知者其法著於春秋東遷之初先王典章概有存者義和桓鬯之賚王命猶重也司徒緇衣之美王官猶賢也祭仲論京不度過制之城猶未眾也無駭卒始請族世官之敝猶未遠也泰山有祊則巡守之蹟猶可復也九宗五正有後則封建之制猶可尋也師服之言建國臧僖伯之諫觀魚則據經守古之士猶多也春秋何爲而作乎宰咺歸賙天衷

民彝大泯亂春秋所以始歟於獻六羽於稅畝皆曰初於上甲於三軍皆曰作於南門於雉門及兩觀皆曰新作夫子蓋傷之也秦作西時臚於郊祀魯惠公請郊禘史角實往而祀禮始僭矣其後齊作內政而兵制變晉作爰田而田制變晉作執秩而官制變鄭鑄刑書而刑制變大夫奏肆夏季氏旅泰山晉不知殺烝魯不知尙羔禮幾亡矣然名卿大夫講問故實三代文獻謫如也納鼎有諫觀社有諫申繻名子之對里革斷罟之規御孫別男女之贊管仲辭上卿之饗柳下季之述祀典單襄公之述夏令秩官魏絳之述夏訓虞箴邲子能言紀官州鳩能言七律子革倚相能誦祈招懿戒觀射父之陳祭祀閔馬父之稱商頌格言猷訓粲然可睹齊虞人之守官魯宗人之守禮懷懷秋霜夏日之嚴劉子所云天地之中子產所云天地之經胥臣敬德之聚晏子禮之善物又皆識其大者統紀相承淵源相續得夏時坤乾見易象魯春秋而知三代之禮所以扶持於未墜者豈一人之力哉戰國去籍之餘孟子言井地曰大略言班爵祿曰聞其略言諸侯喪禮曰未學而嘗聞若其宏

綱丕式因略而致詳推舊而爲新聖人復起不能易也
春秋大復古讖變古并牧變而阡陌畿服變而郡縣車
乘變而步騎什一變而箕斂佩玉變而帶劍蓋席變而
杯案生民之理有窮則聖王之法可改古其不可復乎
是意惟太史公知之於夏殷紀舉孔子正夏時善殷輅
卓然見損益之要指於高帝紀曰朝以十月車服黃屋
左纛蓋歎其襲秦也漢之止於爲漢自高帝之襲秦始
雖然兩漢之制文中子奚取焉吁三代遠矣漢詔令人
主自親其文猶近於書之典詰也郎衛執戟之用儒生
猶近於王宮之士庶子也司徒府有百官朝會殿以決
大事猶近於外朝之詢眾也牧守有子孫郡國有辟舉
庶幾建侯之舊丞相進見御坐爲起在輿爲下庶幾敬
臣之意三老掌教化孝悌力田置常員鄉遂之流風遺
韻亦間見焉是之取爾君子尙論古之人以爲漢去古
未遠諸儒佔畢訓故之學雖未盡識三代舊典而以漢
制證遺經猶幸有傳注在也冕服車旗彝器之類多以
叔孫通禮器制度爲據其所臆度無以名之則謂若今
某物及唐儒爲疏義又謂去漢久遠雖漢法亦不可考

蓋自西晉板蕩之後見聞放失習俗流敗漢世之名物
稱謂知者鮮焉况帝王制作之法象意義乎此漢制之
僅存於傳注者不可忽不之考也愚少嘗有聞老弗敢
墜因紬次爲編以俟後之君子自流遯源三代之禮庶
乎其可識矣辛巳夏五子王子序

辭學指南序

博學宏辭唐制也吏部選未滿者試文三篇

賦詩論

中者

卽授官韓退之謂所試文章亦禮部之類然名相如裴
陸文人如劉柳皆繇此選制舉又有博學通議博通境

深學文鈔庶餘編 卷一

三五

四明叢書

約園刊本

典學兼流略辭擅文場辭殫文律辭標文苑手筆俊拔
下筆成章文學優贖文辭秀逸辭藻宏麗文辭清麗文
辭雅麗藻思清華文經邦國文藝優長文史兼優之名
皇朝紹聖初元取士純用經術五月中書言唐有辭藻
宏麗文章秀異之科皆以眾之所難勸率學者於是始
立宏辭科二年正月禮部立試格十條

章表賦頌箴銘
誠諭露布檄書

序除詔誥赦敕不試又再立試格九條曰章表露布檄

書以上用

頌箴銘誠諭序記

以上依古今體
亦許用四六

四題分兩

場歲一試之大觀四年五月以立法未詳改爲辭學兼

茂科除去檄書增入制詔仍以四題爲兩場內二篇以歷代故事借擬爲題餘以本朝故事或時事蓋質之古以規記覽之博參之今以觀翰墨之華宣和五年七月職方員外郎陳磷奏歲試不無幸中乃有省闈附試之詔繇是三歲一試紹興三年工部侍郎李擢請別立一科七月詔以博學宏辭爲名凡十二體日制誥詔書表露布檄箴銘記贊頌序古今雜出六題分爲三場每場一古一今三歲一試如舊制

先是唯有科第者許試至是不以有無出身皆許應

詔先以所業三卷

每題二篇

納禮部上之朝廷下中書後省

考其能者召試其取人以三等五年王壁石延慶首與選嘉熙二年立辭學科以今題四篇分兩場行之三年而廢景定二年復辭學科至四年而止今唯存博宏一科蓋是科之設紹聖顛取華藻大觀俶尙淹該爰暨中興程式始備科目雖襲唐舊而所試文則異矣朱文公謂是科習諂誇大之辭競駢儷刻雕之巧當稍更文體以深厚簡嚴爲主然則學者必涵泳六經之文以培其本云

古者蒙養豫教罔不在初六年教之數與方名八年學
六甲五方書計之事九年教之數日十年請辨簡諒循
循有序繇是有名數之學陶靖節所以錄聖賢羣輔也
君子恥一物不知譏五穀不分七穆之對以爲洽聞東
帛之誤謂之寡學其可不素習乎迺采掇載籍擬錦帶
書始於三才終於萬物經以歷代緯以庶事分別部居
用訓童幼夫小學者大學之基也見末知本因略致詳
誦數以貫之倫類以通之博不雜約不陋可謂善學也
已浚儀王應麟伯厚甫自序

戴氏桃源世譜序

昔聞之東澗湯公自契敷五教而人倫始明是以學問
淵源在商湯學於伊尹高宗學於甘盤曰仁曰誠曰學
皆自商始箕子以之陳洪範傳之正考父校名頌以那
爲首而聖王之傳恭可見至夫子而集大成蓋湯氏本
殷氏故東澗之言云爾戴氏出宋戴公亦商後也盈之
不勝見孟子書譙國有達君於剡川明之有戴豈其苗
裔與余觀桃源世譜第進士者六人特科二人名薦書
上禮部者踵相躡也詩書文獻之嫩孝友淳實之風樸

袁沈諸老先生稱述詳矣若庸齋大府卿填伯仲接武
儒科先後持節將漕爲衣冠光燧彼黍離離故家與國
升降雖然義理在人心萬古不磨綱常在宇宙億世不
泯伏生申公高堂生之經學士不以秦而賤萬石君家
之孝謹魯兩生之節操俗不以秦而薄言良貴者不以
人爵言不朽者不以世祿修其在我而已世有升降道
有隆污紹聞衣德言各敬爾身弗過佚前人光呂成公
所謂素風存則凜凜乎若奉槃水而涉春冰晝誦夜思
無忝所生可不懋哉因書以遺戴情泳其纂乃祖考無

深寧三鈔掖餘編

卷一

三十四明叢書

約園刊本

敦

漢保傅傳序

保傅傳者漢梁太傅誼所作也漢朝之儒性賈生粹學
淵識通達治體謂元良天下之本本正而天下定若昔
大猷保身傳德罔匪正人涵養薰陶相觀而善用身遺
後人休迺往證今參經訂史總眇論以詔萬世孝昭
嗣服鄉學崇儒是傳與孝經論語尙書迭敷旃夏大義
之通見於始元五年六月之詔煌煇休茲毓德之淵原
典學之矩範也庸鋪繹要指而爲序曰聖人觀洊雷之

象是以詒孫謀燕翼子蓋取諸震觀山下出泉之象是
以選左右蚤諭教蓋取諸蒙相古先民丕若歷年罔不
在初自貽哲命禹戒湯訓文謨武謀啟迪後昆茲率厥
典立之師保謹輔道也教之禮樂頤德性也抗瀆以聳
其善齒胄以孫其志敦學之制文王世子備矣是傳尤
正於始而謹於微八歲入虎闈束髮就太學不待成人
而教也太子始生舉必以禮太師吹銅正聲太宰持升
正味不待就傅而教也胎教之道書玉版藏金鑽不待
初生而教也有道有充有弼有承史司過工誦諫巾車
有教膳宰有規不惟三公三少孝仁禮義之道習也始
嗽周秦之隆替終論賢佐之得失復以詩禮易春秋明
謹始敬終之義曰學禮曰明堂之位曰青史氏之記三
代文獻森然在目如且佚之立前後望爽之翼左右其
末章曰鏡所以察形古所以知今誼之意深矣傳亥匪
人羸轍未遠逸民翼惠亦罔克壽孝文初載肇立元子
越六年誼孰數於前曰選端士曰去邪人然智囊之進
刑名之習以規爲瑱聽之藐藐後九十餘年昭帝始誦
習之業隆於襁褓德牟於成后誼之書有助焉迺若大

夫進諫白虎通述之帝入五學邕宗元識之鸞在衡和在軾穎達詩疏又稱之勵與王度記太初篇韓詩內傳並言班史本傳概而未詳嘉言丕彝千載眇覲愚謂著翼善之記不如監是書而善自明譏養德之傳不如寶是書而德自進青宮之紀博矣讀是書知其寡要也搖山之則燉矣讀是書知其亡實也輔翼之臣有能采而獻之可以衍幼海之潤增前星之暉萬年惟王永保民蓋自茲始敢著謏聞於篇端按新書五十八篇是傳分爲傳職保傳容經胎教四篇文穎謂在禮大戴記今列于第四十八篇凡二章三千五百五十四字云謹序

唐西南備邊序

唐太和四年十月戊申制詔兵部侍郎臣德裕節度劍南西川維蜀西控戎索南接蠻服昔在中葉武尅不剛蝨賊內訌蛇豕薦食表撐裏拓猶懼侵軼未陰綱戶莫急二邊於是先事候情并謀合知料敵勢攬地險討軍實而備邊錄作焉卽十三卷之簡見萬里外之情所以制勝無形銷患未萌也茲不可亡序夫備敵于一方其策易倚敵於多方其謀難剗方旣城薄伐於西文王其

勤也獫狁旣攘鞠旅于南宣王其武也鉞芒寫氣蝨穴
潰隄知慮不周扞防不密則壇場之虞不生所備而生
所玩吁可懼哉然山川隄塞非圖莫見兵財盈虛非書
莫著是故軍防有錄譔於天寶九州別錄上於正元禦
戎新錄奏於元和元振述安邊之策敬輿條備邊之失
前英後傑帷籌幄畫詳已然之變忽未動之憂賸薪爲
安折柳爲固猷之不遠寇將生心德裕身佩西垂之任
得不爲南鄙慮乎方唐盛際德威溥暢北糜突厥東懽
遼海窮髮反景悉主悉臣文恬武嬉喪羊于易吐蕃間
蠻河隴失險締從南詔協以謀我岷江飲馬倚爲先鋒
井絡坤根我圉孔棘有守曰皋鑿青谿道要結蠻好掎
鹿效順纂集事狀爲卷十七質幣結轍闔戶誨盜戎膽
雖讐蠻旣始牙架入成都如升虛邑唐之君臣且盱食
矣疇咨良翰擢失刷恥爰命德裕抗旌秉鉞葺殘奮怯
改紀其政乃建籌邊之樓凡險要與蠻相入者圖之左
與戎密爾者圖之右而部落饋餽靡不察乃立雄邊之
軍其精兵曰南燕及連弩騎士曰飛星及突騎而農戰
器械靡不飭大度孰制城以杖義榮經孰控城以禦侮

西山孰昵城以柔遠復邛峽關徒越嵩治而蠻之齒寒
但謀納款維川歸壁而戎之氣奪猶慮敵去而備弛也
兵將糧械之數城鎮種落之名歲計經用之目講求利
病輯爲一書諸郡固實外夷情狀明分縷析粲如指掌
初立碑壘咸以朱書總會小圖標之首卷而第四卷敘
維州本末尤悉書成於太和六禩追會昌中秉國之均
始奏上之觀諸文集猶有可攷二邊方騷而金湯之二
虜孔熾而雷霆之匪石晝沈幾曷克臻茲藏之禁嚴副
在邊瑣日戒夕惕庶克有定大中而後稍憂好暇懷燕

安之毒玩鷲擊之形河湟歸疆西顧無騎墜矣厲階之
梗惟蠻爲甚餽糠及米繇劍而嶺乾符之季有臣雲虔
自邕管涉川陸四十七程至善闡以南詔錄三卷獻於
朝吁德裕之錄以蜀備蠻藩籬之冠也雲虔之錄以邕
備蠻則闐然入戶庭矣憂先於事事至而憂奚翅銖石
之差與據舊鑿新不可不愆患於微眇也易之筮曰利
西南必有六二匪躬之臣而後能濟蹇難德裕以之按
唐藝文志是錄列在兵書今館閣書目存者一卷餘軼
不傳我思古人愛莫起之撫陳編而三歎謹序

深寧先生文鈔摭餘編卷一

深寧文鈔摭餘編卷一

四明叢書
約四冊

深寧先生文鈔摭餘編卷二

宋四明王應麟伯厚撰

里後學葉熊輯

後序

周易鄭氏注後序

康成注易九卷多論互體江左與王輔嗣學並立苟崧謂其書根源口口顏延之爲祭酒黜鄭置王齊陸澄詒王儉書云易自商瞿之後雖有異家之學同以象數爲宗數年後乃有王弼之說王濟云弼所誤者多何必能

深寧文鈔摭餘編 卷二

一四明叢書

約園刊本

頓廢前儒河北諸儒專主鄭氏隋興學者慕弼之學遂爲中原之師唐因之今鄭注不傳此景迂晁氏所慨歎也李鼎祚云鄭多參天象王全釋人事易道豈偏滯於天人者哉合象象於經蓋自康成始其說間見於鼎祚集解及釋文易詩三禮春秋義疏後漢書文選注應麟讀易之暇輯爲此編庶幾先儒象數之學猶有考焉癸酉季夏哉生明汲古堂書

壽鏞按此卽卷一易康成注序乃深寧初稿而復輯者也

詩考後序

詩四家異同唯韓詩略見於釋文而魯齊無所考劉向

列女傳謂蔡人妻作芣苢周南大夫妻作汝墳申人女
作行露衛宣夫人作邶柏舟定姜送婦作燕燕黎莊公
夫人及其傅母作式微莊姜傅母作碩人息夫人作大
車新序謂伋之傅母作二子乘舟壽閔其兄作憂思之
詩黍離是也楚元王受詩於浮邱伯向乃元王之孫所
述蓋魯詩也鄭康成注禮記以于嗟乎騶虞爲歎仁人
以燕燕爲定姜之詩以生甫及申爲仲山甫申伯以商
爲宋詩維鵜在梁以不濡其翼爲才上天之載讀曰栽
至于湯齊讀爲躋注周禮六甸讀與惟禹噉之之噉同

深寧文鈔餘編

後二

一四明叢書
約園刊本

康成從張恭祖受韓詩注禮之時未得毛傳所述蓋韓
詩也賈誼謂騶文王之囿虞虞官也歐陽子從之韋昭
注國語謂采菽王賜諸侯命服之樂黍苗道召伯述職
勞來諸侯與朱子集傳合太史公以薄伐玁狁至於太
原出輿彭彭城彼朔方爲周襄王時之詩班固謂靡室
靡家之詩懿王時作城彼朔方之詩宣王時作白虎通
以相鼠爲妻諫夫之詩趙岐以小弁爲伯奇之詩漢儒
言詩其說不一如此關雎正風之始也魯齊韓以爲康
王政衰之詩楊子云傷始亂鹿鳴正雅之始也太史公

云仁義陵遲鹿鳴刺焉聖人刪詩豈以刺詩冠風雅之首哉楊子又云正考甫常晞尹吉甫矣公子奚斯常晞正考甫矣正考甫得商頌而以為作商頌奚斯作新廟而以為作魯頌此皆先儒所不取許叔重說文謂其稱詩毛氏皆古文也而字多與今詩異豈詩之文亦如書之有古今歟併綴而錄之伯厚甫後序

通鑑地理通釋後序

太極肇分天先成而地後定天依形地附氣地囿於天者也而言地理者難於言天何為其難也日月星辰之

深寧文鈔披餘編

卷一

二四明叢書

約園刊本

度終古而不易郡國山川之名屢變而無窮是故圖以經之書以緯之仰觀俯察其用一也虞書九共先儒以為九丘其篇軼焉傳于今者禹貢職方而止耳若山海經周書王會爾雅之釋地管氏之地員呂覽之有始鴻烈之墜形亦好古愛奇者所不廢然諸儒之傳注異歷代之區寓殊禹之九河班志僅得其三商之八遷孔疏未聞其四漢水東西之分積石大小之辨荆山之於荆豫梁岐之於冀雍潛在荆者未見蔡在圻內者未詳三江九江五邦三臺則書之說異焉還之為營欄之為坻

以著爲齊地以韓城爲涿郡自土之爲自杜倭遲之爲
郁夷騶虞之爲梁鄒二南之爲南郡南陽則詩之說異
焉揚紆在冀而爾雅以爲秦盧水在濟北而康成讀爲
雷漳水之爲潞吳山之爲嶽五湖混於具區潁湛列於
荆浸此職方之疑也豫章在江南而江北之地未知中
牟在河南而河北之地難考許田魯地而非近許鄆鄭
邑而非鄆陵穀小穀之有別父城城父之不同此春秋
之疑也二地而一名者若王城葵丘酒泉貝丘鍾離之
類一地而二名者若白羽夾谷夷垂葭發陽之類方城

細柳丹水之有三塗山歷山東陽武城之有四瞻彼洛
矣與東都之洛異導洛自熊耳與宜陽之熊耳殊首陽
空桐新城石門石城丹陽白沙硤石之屬其地非一畢
萬之魏爲河中之永樂而以元城爲大名失矣自廬振
廩爲襄陽之中廬而以合肥爲廬國失矣潘岳賦西征
不知成師之曲沃在河東韓臯論廣陵散不知魏之揚
州治壽春韓文公南陽人在河內之脩武而誤曰鄧州
史記卽關在漢中之長利而誤曰洵陽杜子美詩三奇
戍在彭州之導江而誤改曰三城荀卿蘭陵非常州也

孔明渡瀘非瀘州也公琰屯涪非涪州也公瑾赤壁非黃也元規南樓非鄂也郢都白雪誤於郢州東海二疏誤於海州以塗山爲會稽以鬻桑爲采桑以大別爲安豐以東陵爲廬江以楚丘爲成武以街亭爲南鄭襲訛踵繆不可殫紀漢沔一也而或二之吳會二也而或一之江統誤鄧於沛郡皇甫謐誤商丘於濮陽顏師古誤邛都於邛州青衣於嘉州南陵於宜州注文選不知夷庚注本草不知沙苑博見疆志者猶或失之舊蹟湮沒如濟絕于滎碣石淪於海昆明鑿而鎬京爲池隋城立

而漢都爲苑南北僑置如青有太原豫有廣陵六合之爲秦郡項城之爲秣陵玉門之爲會稽尋陽在蕪而移柴桑當塗在濠而寓姑孰郡名非古如雲之雲中平之北平薊之漁陽縣名非古如京兆之武功豐州之九原皆非秦漢之舊或若異而同或似是而非不可謂博識爲玩物而不之考也余閒居觀通鑑將箋釋其地名舉綱提要首以州域次以都邑推表山川參以樂毅王朴之崇論宏議稽左氏國語史記戰國策通典所敘歷代形勢以爲興替成敗之鑒大易設險守國春秋書下陽

彭城虎牢之義也河湟復而唐衰燕代割而遼熾述其事終焉若昔對白題羊腸帝丘內黃問松亭柳河者以該洽見稱今豈無其人乎孤陋寡聞未免闕誤以俟博雅君子山河不改陵谷叟遷亦以發攬古之一慨云上章執徐歲橘壯之月子王子書通釋後

急就篇後序

漢藝文志小學十家蒼頡篇見考工記注者唯鞞

四學反

鞞

人交反 柯楊張玉反

四字凡口見文選注藝文類聚者唯

黃潤纖美宜制禪鍾磬等笙筑坎侯二句訓纂見史記

藝文志鈔據餘編 卷二

六四明叢書

約園刊本

正義者唯戶扈鄂三字其廢存者急就篇而止耳隋周志始謂急就章崔浩寫以百數劉蘭入小學書之李鉉九歲入學書之月餘卽通李繪六歲亦通此章是以其學至唐猶傳顏師古祖之推嘗爲之注淵源有自來矣蓋君子恥一物之不知倫類不通不足謂善學當觀眾仲對氏族師服申繻論名子籍談忘司典之後景王以爲譏衛侯以辟疆爲名周人不肯受繫之以姓著於世本字而不名貴於春秋故始之以姓氏名字學詩多識鳥獸草木之名論語備錄衣服飲食之制陶宏景讀書

萬卷尤明醫術本草韓文公謂禮樂名數方藥之書未
有不通此而爲大賢致知在格物觀物以觀我生故次
之以服器百物周書言學古入官子產云學而後入政
董仲舒以春秋斷獄雋不疑以經術決事若授之以政
不達宋泉之孝經蘇威之五教人到於今蓋之故終之
以文學瀆理器無非道學無非事其義不可須臾舍也
鴻生鉅儒不敢以小書忽焉輯州名摭奇字悉放其體
諸經義疏引之者五周禮考工記疏引分別部居不雜
廟蒲蒨蘭席天官疏引司農少府
國之淵左傳正義引張敬傳注引
燕莢鹽豉頭町界畝後漢書注引之者一卓陶造獄法

深寧文鈔拾餘編 卷二

七

四明叢書
約圖刊本

律存韻書亦援以言姓氏班孟堅之用祿飾潘安仁之用
乘風王禹玉之用奇觚宋景文之用鞞釋朱文公之用
老復丁至於不借蓬條鳧翁無等雙之語臨川山谷詩
皆采掇之博觀而約取此難與耳學者言也古者保氏
教六書外史達書名漢猶有課試舉劾之法故馬尾之
書必謹自篆而隸自隸而篆鍾王之後以意行書先漢
遺文古事淺以晡昧急就雖存而曹壽劉芳豆盧氏顏
之推注解軼而不傳昔以是爲童蒙之學今有皓首未
覲者俗書溢於簡牘訛音流於諷誦襲浮踵陋視名物

數度若弁髦而大學之基不立迺因顏注補其遺闕擇
眾本之善訂三寫之差以經史諸子探其原以爾雅方
言本草辨其物以詩傳楚辭協聲韻以說文廣韻正音
詁若閎閭之相混得於釋文榘械之所出取於莊子稽
極之誤因說文通釋而知利親勝客之類因史記漢表
而見簧當作箇輦當作操壘當作至實事求是不敢以
臆說參焉疑者闕之以俟後之君子李斯作蒼頡篇後
人附益末章乃有漢兼天下此篇齊國山陽兩章亦然
峇解其義綴於下方夫物有本末理無小大循序致精
學之始事也雖然耄學而爲童習其能免玩物愛奇之
失乎

爾雅翼後序

爾雅翼三十有二卷欽羅公願端良誤惟大學始致格
物致知萬物備於我廣大精微一草木皆有理可以類
推卓爾先覺卽物精思體用相涵本末靡遺水華庭草
玩生意以自怡雜離觀仁乾坤具梅枝鉅而苞萬彙乎
觀物繼而析眾芳乎楚辭約不膚陋博不支離蓄德致
用一原同歸彼諛聞者誤荔挺杜若不識蟹螯牙重

常徒語怪而庶鴝售欺矧編絕簡脫之餘烏虎魚豕柳
卯莖茲至於菘綠棧莢蘋蕒薺茨芥菜聚熊能蝸萬
鴝鶴駮鷓雜揉而紛披設蕙導導彘蜂嬰鷲訓義之參
差芑有菜艸粟之別杞有梓柳櫨之殊名之相混獸則
蛭蝮蝦蛤艸則鼈龜藹離女摯之乘與榛異鳴埴之菴
與鶴異校諸經而多違小大同稱有鮠有鮪新雉之木
以爲草類苑紀鸞斯王會芣苢伊尹菁盧橘荒異物其
誰咨俶隅以音變烏啄以字迷堯韭舜榮儷句爲嬉豆
逼莫解苻蓐曰萹葵問稻何草而謂羊蹲鴟候氣廢葭
苧議樂昧秬秠或有能辨蒲盧表枸杞別象膽與駁而
問天雞指不勉之善取騶虞竊脂然洽通之彥猶拘禱
失對謬剝棗於幽詩蓋驚遠畧近躡高忽卑孰知爾雅
附於經多識是資諸儒箋釋角立墨畦歆炎樊李文學
健爲景純之後顧謝沈施陸音邢疏分辯並馳鮪演以
小篆矩疊規損廣憲博劉續陸埤樹酌羣言噴醉搗醜
理無窮書有蹟未鏡夫浩倉槃物化育亡厓益不殫名
隸首難徧稽山經所有恢詭譎奇地員九十物草十二
衰考工記卻行紆行之屬鴻烈庶烏庶魚之類萬崙干

岐物物而察必研其幾匪淹綜沈潛貫璣組絲蠶克鉤
索功眇甄剖是非淵哉昔人如五總龜筆爲組未迺芸
酒奮覽故考新揆敘物宜根極六藝冰渙首疑囊括百
家抉度適珙豈惟傳騷說詩亦解頤纂次有典則班馬
可追爲雅忠臣翼之以飛本立言之志欲率是佐時陶
冶旁薄印贊範圍中和位育與物春熙匪街豹鼠之辨
以貽蠹魚譏入國問喬木誦其文爲師昔者朱子稱經
緯縝密惜其先萎小集僅傳如此者希歲甲午書成迨
庚午九十七載出若有期自今顯行式永厥垂絲是進
者浚儀王應麟也

跋

史彌鞏獨善先生文集跋

司馬光通鑑首論君子才德之辨蓋國家治亂存亡之
幾係焉獨善先生史公以爲告君第一義其知言哉然
公非苟知之所謂君子者以厚道誼而薄勢利重節行
而輕富貴也公在寶紹仕不過邑宰在淳祐官不過郎

潛素履行願瞻然不滓朕宗袞之翕赫若將浼焉其特
立有如此者立朝議論忠愛鯁切守於中者確發於言
也正當時能用其言豈不足以續天命於無窮乎公之
自立固非蘄人之知而世知公者蓋鮮昔漢陳郡袁氏
四世五公紱冕之盛極矣惟夏甫卓識清操不以人爵
爲榮夏甫隱而不見公出而無復處其趨一也應麟先
君子吏部師事公出處大概相似應麟弱冠拜公牀下
庶幾知公之心者公諸孫示以奏議於是乎書

踐阼篇跋

深雪支鈔摭餘編

卷一

十二四明叢書

約園刊本

有周盛時大訓在西序河圖在東序三皇五帝之書外
史掌之丹書蓋前聖傳心要典也學記正義謂赤雀所
銜丹書乃尙書帝命驗讖緯不經之言君子無取焉武
王銘十有七章蔡邕以爲十八章豈有闕文與大戴禮
有盧辯注今列於前鄭康成所引黃大史所書考其文
之異者又采摭諸儒之說爲集解金匱陰謀載武王銘
書附著於末至於虞箴飢歌見春秋內外傳夫以聖王
治己養心表裏交正如此況學者可不勉與有能左右
觀省朝夕習復若衛武公日誦抑戒之詩無有師保如

臨父母庶其寡過矣乎因書以自儆柔兆淹茂歲孟陬
姓氏急就篇跋

顯穹生民肇敘彝倫列生分類譜牒繫世姓以德建氏
以族命君之宗之一本萬支宗法不明姓氏靡分知祖
惟鄰忘先者談篡者雖多混殺舛訛祝消玄宗宋使
便逢逢謬繆載戴處劇戰但莫識堯堯孰別利黎旅盧
史漢亦殊遐不攷證前言往行奇觚少學史游所作頡
篇古字姓名略記昔歐陽子州名是擬韻屬句摹輯爲
此書希鏡百帙指掌可述對息問董若龜五總姓複言

深聖文鈔餘編 卷二

十二四明叢書

約園刊本

重餘皆彙從尙友得師諷誦自怡稽經訂傳蒙士用勸
浚儀遺民述

玉海跋

余幼好奇耕獵詞圃麗澤西山詒我萬樵北山之鈔西
齋之目披華啓秀歷歷載腹竊吹六經叨榮兩制汗顏
前修皓首曲藝斲輪不傳屠龍無用緘之青箱以詔洛

誦

困學紀聞跋

幼承義方晚遭躋屯炳燭之明月志不分困而學之庶

自別於下民開卷有得述爲紀聞

書後

書王庭秀磨衲集後

王公庭秀作於紹興王子考其論議以鄭介夫爲妄言
陳少陽爲鼓變是熙豐之法度非元祐之紛更謂黨人
子孫爲謬賞謂蘇黃文章爲末藝甚者擬程子之學於
墨釋氏而以易傳爲謝楊刪潤成書其反理詭道甚矣
詆張趙二相尤力蓋自紹聖以來家以荆舒爲師人以
章蔡爲賢士習熟見聞至紹聖間邪說猶肆行筆之簡
牘不恥也風俗移人可畏哉

深寧文鈔餘編

卷二

十三四明叢書

約園刊本

題辭

鄭錫周禮解義題辭

鄭剛中解義如冕服九章授田三等治兵大閱旗物之
互建六鄉六遂師都之異名陰陽之祀有用牲之疑九
畿之國有朝貢之惑豆區鍾釜有多少之差世室重屋
非明堂之制皆辨明使有條理

制

寧江軍承宣使左驍衛上將軍金州駐劄御前諸

軍都統制授武康軍節度使右金吾衛上將軍
興元府駐劄御前諸軍都統制加食邑食實封

制

門下錫齋旌而啓鎮載聯中尉之華總禁旅以修戎益
重西陲之寄乃睠蕃宣之雋夙殫守衛之塵疏陟典以
褒勳更要衝而統成明颺渙號敷告師虞寧江軍承宣
使左驍衛上將軍金州駐劄御前諸軍都統制某果毅
而樸忠沈雄而肅括營平守節深料敵之威謀票騎抗
旌懷冠軍之效勇列武威而拱極臨涓水以乘邊王旅

深宮文鈔餘編

卷二

十四四明叢書

約園刊本

擘擘克壯金湯之執戎容暨聳聳張箕翼之形迫簡子
衷茂嘉乃績念漢中之保障控益部之衿喉復險要於
舊圖于疆于理峙屯營於東道維屏維藩師徒甫集而
未讞陣壘方更而未固將飭不虞之備亡踰已試之良
是用新駱谷之建牙易夔江之留務鶻冠魚腹陞峻秩
於執金犀甲熊旂侈多儀於授鉞如乾道顯忠之並命
若紹興楊政之進屯以嚴細柳堅壁之威以恢采薇治
外之略申加井賦增貢坤維於戲登拜將之壇決策蓋
繇於南鄭上出師之表駐軍欲定於中原惟山川未改

於昔時則事業蓋參於前哲典聽朕茲式固爾猶可授
武康軍節度使右金吾衛上將軍興元府駐劄御前制
軍都統制加食邑食實封主者施行

辨

辨乾道四明圖經

唐盧潘作廬江四辨余觀四明志首卷有疑則辨以俟
博雅君子擇焉志序云大觀初置九域志局令州縣各
編纂以進余考會要實錄景德四年二月庚辰眞宗因
覽西京圖經有所未備詔諸路州府軍監以圖經校勘

深輟文鈔撤餘編

卷二

十五 四明叢書

約圖刊本

編入古跡選文學之官纂修校正補其闕略及諸路以
圖經獻詔知制誥孫僅待制戚綸直集賢院王隨大理
評事宋綬邵煥校定僅等以體制不一遂重修命翰林
學士李宗諤知制誥王曾領其事又增張知白晏殊及
李乘韓熙等參其事大中祥符三年十二月丁巳書成
凡一千三百六十六卷上之命宗諤爲序又詔重修大
小圖經令職方牒諸州謹其藏嘗見吳郡圖經載李宗
諤序蓋景德祥符所修郡志以大觀爲據時史學廢絕
其誤多矣

辨州郡

唐武德元年改郡爲州太守爲刺史權置州郡頗多太宗命省分爲十道開元二十一年分爲十五道天寶元年以州爲郡刺史爲太守至德二載復以郡爲州太守復爲刺史今按開元始置明州則曰明州刺史天寶以州爲郡則曰餘姚郡太守志云置州之時名郡曰奉化以備封爵一州豈有兩郡名哉圖經謂開元郡名奉化天寶元年改爲餘姚郡未詳所據元豐九域志始曰奉化郡未知何時改

深奧支鈔摭餘編

卷二

十六四明叢書
約園刊本

辨餘姚郡

唐志明州餘姚郡以境有四明山爲名山海經瞿父山又東四百里曰句餘之山郭璞注山在餘姚南句章北二縣因以爲名州曰明郡曰餘姚皆本於句餘山虞氏餘姚人九域志晉虞喜虞荔墳在慈谿鳴鶴山

辨鄞

鄞縣東有鄞郭古鄞縣城也漢地理志會稽郡鄞縣姓苑有鄞氏蓋以邑爲氏五代改鄞曰鄞圖經云唐有鄞縣非也地理志無鄞陸雲集秦始皇南巡登稽嶽在鄞

縣三十餘日圖經云後漢改鄆爲鄆居鄆山之陰旣而復爲鄆非也西漢已有鄆

辨鄆

越語句踐之地東至於鄆韋昭注今鄆縣是也後漢書注鄆故城在鄆縣東南圖經曰白社里有鄆城山漢志鄆有鮎埼亭今在奉化有天門山今象山之東門山然則奉化象山二縣漢之鄆也鄆城山其古鄆城歟今鄆縣有鄆塘鄉接奉化蓋鄆之境四皓黃公鄆大里人世說注孫興公性好山水求鄆縣遺心細務縱意游肆名阜勝邱靡不歷覽

辨句章

句章九域志云因山爲名戰國策有句章昧蓋以邑爲氏漢伐東粵遣橫海將軍韓說山句章浮海從東方往史記正義句章故城在鄆縣西一百里此張守節以開元之鄆言之元和郡志句章故城在今州西一里此李吉甫以元和之明州言之後漢注與史記正義同圖經古句章城在鄆縣南六十里此今之地理也虞翻傳注句章蠶黯則慈谿乃漢句章之地晉劉牢之東屯上虞

使劉裕戍句章今鄞縣有句章鄉蓋自此鄉及慈谿皆句章境古句章城在小溪鎮

辨甬東

左傳越滅吳請使吳王居甬東注句章縣東海中洲也吳語云甬句東注今句章東海外洲也越語注云甬甬江句句章也晉孫恩寇浹口入餘姚破上虞通典云越徙夫差於甬東韋昭曰卽句章東浹口外洲明州東北到大海浹口七十里今按甬東浹口卽定海之浹港輿地廣記定海有大浹江今以城東爲甬東誤矣浹口外洲卽翁洲也郡志以甬東爲昌國蓋本於元和郡縣志昌國乃唐之翁山縣乃熙寧六年析鄞縣置豈亦句章地歟

辨西湖

唐志鄞縣南二里有小江湖溉田八百頃開元中令王元暉置民立祠祀之按九域志卽宅山堰也今有善政侯王長官祠郡志乃謂城中之小湖誤矣圖經云小江湖在鄞縣南二十里唐正觀十年縣令王君照修與唐志不同唐志又云東二十五里有西湖溉田五百頃天

寶二年令陸南金開廣之蓋今之錢湖也南豐記云鄆東鄉之田錢湖溉之西鄉之田廣德湖注之唐志鄆縣東有西湖西有廣德湖可以見西湖之爲錢湖矣郡志以西湖爲今城中之西湖亦誤若廣德湖則南豐謂與於齊梁之際今考陸雲書鄆西有大湖廣縱千頃晉已有湖矣舊名罌脰湖元和郡縣志所載里數在州城未遷之前唐志因之長慶始徙今城郡志乃以今城之遠近牽合唐志之里數宜其差謬也

頌

至道朝元殿冊皇太子頌

天以來克堪用德迪從子保萬億年永孚休太宗皇帝廣聲揚烈燕及皇天幼海玉潢發祥流慶壽街辨牘虎闌齒胄金聲玉裕敷聞在下帝惟有道之長必蚤定豫建鞏我邦丕丕甚至道之元仲秋壬辰誕布明制肇闡承華丁酉詔臣白贊禮儀申敕有司曰上嗣主鬯古有冊命百官會位太極臨軒則漢唐之典在備物盛容揚於大廷丕天之懿鑠也咨汝悉奏其儀朕將御路朝行之繇是頌家備官稽經綴禮范金爲寶厥方二寸龜紐

朱綬鏤璫爲冊厥簡六十錯以龍螭展詩應律厥名正
安奏以二曲疇咨太史歷吉季秋俱張宿陳容衛旃飾
黃麾設仗鸞車充庭葆佾旅階鐘石在虞萬官千品駢
璧交舄中殿外備禮牟元會銅扉洞啓玉契載盼皇太
子冠遠游服朱明端士正人前導後翼丁卯之旦皇帝
被袞龍下彫輦御於朝元殿天華爽霽日宣重光聖言
溫純參盤囊詰紫微令讀之左庶子受之穆穆儲儀不
承顯命上公羣辟蹈舞稱賀遂展慶於青宮目銀榜之
題耳搖山之集煥序重離之光麗焉赫序洵震之響發
焉越三日庚午金路羽衛祗見世室班輪回軫都人具
瞻眉厖齒覲未覲鉅媿湛恩作解雷動四域光溢雲漢
榮鏡宇宙猗與休哉是殿爲周外朝唐含元實朝會冊
拜之地雍熙元年七月壬子改乾元爲今名天禧行於
天安乾道藏於大慶衣言繩武永作彝憲洋洋帝者之
上儀宣政紫宸之禮比茲褊矣宜命鴻生弦次初詩繼
樂府四章之作臣敢鋪藻而颺言曰

古帝命宋靈承於旅葉萬億年重規疊矩皇矣太宗盛
德淵博文條武鬯四方無侮永錫祚嗣椒實螽羽鵲吉

貳觴有秩斯祐於昭元良賢能繼禹朝夕寢門春冬胃
序溫文恭敬川原印浦若昔令猷入監出撫離照相續
震鬯是主萬國以正建立必豫適駿有聲知子惟父渙
其大號命爾儲副刺經攬頌自我作古司空讀冊漢有
憲度暨唐太極肇新儀注子其時式徽典備舉範金珠
珉龜紐朱組繅龍繪螭寫其欲翫昭時今日禮展樂具
巍巍朝元聖皇當宇天臨日燭龍卷繡黼臚人虎土擯
相何扈麾仗上黃星瞰雲布巾車展輪彪列鹵簿四垂
高張鱗篋毛虞正安八奏銅鳴律呂翼翼皇儲夙駕金
輅遠游朱明命服有楚雞戟鸞旌從以師傅延登受冊
陟降拜俯是承是將惟左中護尉臣奏賀萬官抃舞扶
光若英重耀霄序碧鏤啓扉肅肅鸞鷲移班展慶聳觀
玉裕銅輦班輪祇見烈祖乾闥坤樛神人樂胥于時公
卿于時臣庶于時夷貉交相告語上儀鴻明曠古一遇
滌瑕肆眚異風解雨少海之波流澤率土惟聖立聖頌
聲載路長治久安冠軼三五燕詒世哲蹈則繩武天安
大慶祱容重覲神孫承承旗翼丕緒暉潤作歌贊述有
賦允鑠聖代禮崇燄鉅下臣獻頌式級樂府

唐觀德殿飲至頌

唐太宗文皇帝天錫勇智開闢乾坤丕降霖雨剗荼滌
第仁聲義實邇昭遠揚羽族卉儀面內稟朔凌煙置酒
頡利就羈未央高會智戴入侍玄武燕饗首長畢饗豐
貂文駟旅于象胥榛履熊冠圖於王會際天接地武彘
旁魄逃彼麴氏長雄高昌文泰猖狂怛威赧德狐裘納
擊扶伏入朝鼠匿雉犇不式王命稱兵焉耆西域遂梗
粵十三載季冬壬申爰命驍將濯征交河驛騎龍旂踰
沙軼幕虜渠怖駭日照雪消臨衝閑閑應鼓如截明年

深雪文鈔餘編

卷二

三三四明叢書

約園刊本

八月癸酉克之智盛請降矜甲鼓下青海如鏡機槍不
芒遂殫輶輶藉甌脫灰屬帳雲徹席卷披置郡邑九嶷
之植植於蔥嶺鐫功紀伐卷旆而還左律右鉞軍容輝
耀振旅愷入京師十二月丁酉龍駕帝服御觀德殿庭
燎晰晰羽衛威蕤鴻臚舌人虎賁八士九賓四貉咸造
在庭諸將戎服振振奉俘馘以獻天子臨軒受之酒舍
爵飲至以數重賁禮也於是宗伯奏儀司馬辨位旌茂
林植俱張星敷金介緹衣聳髦戴鶚萬旅鳧藻踊躍就
列鼎胥俎載百遷千品疊舛交錯儀象靜嘉房穀體節

之羞醜清鄧白之勺橐飶于顏行七德九功之舞羽葆
橫吹之音燁煜於觀聽既醉之歡洽偃伯之頌與執訊
連連解辮右衽單于日逐圓眎膽粟金幣輪積圭組續
紛班勞策勳周帑宏溥禮成畢賀於廟薦功皇澤賜醕
雲油雨霈前而順天之獻捷後而紫微之受俘稱伐計
功莫此爲盛拓地萬里威震八荒隨流而攘鄉風馳義
芳蘭張飲天成浮酒上儀偉觀史不絕書施於開元契
丹授首爰卽醕宴復行是禮宸章賦詠丕顯祖烈於戲
盛哉殿在玄武門因射立名正觀永徽咸以上已賜羣
臣射總章之元遠東底平卽是宴百官然武功文容二
媿兼備未有斯舉若者是役也有臣行本刊頌柳谷布
昭威靈維茲茂典鋪張猶缺昔飲御諸友小雅歌之飲
至大賞春秋紀之是用作詩以鴻厥慶頌曰

燁燁太宗陟禹之迹天戈遞討函夏清謐劉陰披霧耀
以月日明謨指授將猛四七纓厥緝軍神扶電擊陵海
越障蛾伏誅鄗聲暨德綏條支祝粟簫勺鬻頌正心翊
翊狡焉麤戎狼性隼質雍闕琛賚不庭不率皇赫斯怒
翦此朝食命率交河成師而出且秣我馬夕臨其國長

穀雷聯機械蠡軼苜渠灰釘餘種冰釋鏤體卉衣係頸
銜壁州三縣五如入吾室坦步蔥雪疆宇載闕葉護齒
寒不戰自屈抗稷荒裔銘功樂石振旅于京秉鉞執律
愷歌示喜鼓吹轟激執訊連連象胥累譯六師大獻天
容愉懌序情閑勞匪疚匪棘展儀廣殿時維觀德校隊
案部羽林壘壁削衽改襟星其陞戟袞龍臨幄綵仗盼
飾纍纍其俘厥角丹城百蠻破膽墮玉矢烏逆子有誅
視彼攸馘飲至大饗乃數軍實予不折寸鏃不遺一悠
悠旆旌萬旅如植矯矯虎臣韎韐有奕班馬無聲顏行

深望文鈔餘編

卷一

二四

四明叢書
約園刊本

山則干羽陳階金匏在席鞞屨效技傑離俱集樂增十
部於粲葆佾蒲筵紛純黼帷藻芾山豆瀛尊左右有秩
酒車騰酌饒益浮溢散烝房俎羞魚燔炙一朝饗之在
師中吉湛露晞陽帝暉咫尺舌人體委惠浹夷貊式燕
以衍率禮無失都護奉觴臚湊羣辟舍爵策勦皇有蕃
錫扶圭綴組湛恩沕涌熊羆鬯藻賈勇奮力肇開西昌
膺貢受籍帝惟不矜常武無逸紫微獻捷涇陽鳴趨祿
容婁書鴻烈赫奕開元繼伐耆定假狄行於酺宴播詠
宸筆乃武乃文不昭帝式宵雅歌周勞率暨役歸鎬飲

御吉甫紀績於鑠唐兵爰轅四極鏡曲未奏崖頌靡述
維以頌歌震于殊域

漢華平頌

皇漢中興三葉緝熙康乂燕及皇天惠露德風坯冶泰
龢暢垓沂埏炤景飲醴瑞命總集嘉祥備致仁及於木
効異吐奇而華平生焉平之義大矣哉在天爲泰階在
地爲嘉木世道夷陂氣感類從維木之祥品彙匪一賓
連闕達紫脫平露白虎禮緯彪列其名而華平獨著於
孝經援神契謂德至地則是物盛張衡作賦敷厲東京

深堂文鈔餘編

卷二

三五

四明叢書

約園刊本

之燉春圃是植爰紀神異薛綜注釋指爲瑞木謂天下
平則其華平冊府元龜載元和二年至章和元年華平
見郡國藝文類聚述東觀記以爲芝英華平史官不可
勝紀沈約宋志亦曰其枝正平王者有德則生漢元和
中生郡國其當章帝之世與帝也左右藝文斟酌律禮
道無偏陂如砥如衡根於正心發於平治有泰之吉無
否之傾煌序休哉植物之敲器也昔在孝武奇木兆祥
胡粵冠帶亦越永平木枝內附朝堂奉觴矧時珍物見
象知治應圖合牒倣戒默寓蘭臺諸彥獻歌踵聞景況

洪範鋪藻猶缺敢稽選注以頌以規頌曰

顯穹榮物木神則仁漢以仁興木瑞爰轅赤符膺統丕
闡坤珍德豐澤鬯萬象一春允文肅宗豈弟宜民仁及
於木匹休周成支附葉著函夏謚清言觀於朝口庸備
登言觀於邊櫟靖燧沈美發英華治浹升平泰融融液
嘉卉挺生植之春圃吐葩颺榮祥參平露光掩芝英五
衢四照未敷山經含章自天絢耀槐宸啓篇稽牒咨爾
儒臣德至於地緯書昭敞乾元謙施帝德之純燁燁其
華元氣儲精維平不猗式如玉衡太平有象品物流形

深寧文鈔餘編

卷一

二十六

四明叢書

約園刊本

其象維何萬國咸寧醴泉下滋濡露上凝匪棣之偏匪
葵斯傾隨方表應敬器在庭考祥視履恣於未萌用人
必公淑別慝明敷政必鯀直錯枉信天壽平格葆命日
新右我炎祚木支蕃藜奇木旁出對述終軍解編削社
殊俗來賓木枝內附永平昌辰壽觴敬舉驩溢簪紳於
赫神物夔軼前聞辯章化洽肴覈仁林咸曰我后能時
堯冀俯陋後葉并柯成文瑞圖道紀政令之均維德弱
剛低卬以分木匪於祥戒在持盈無平不陂保泰兢兢
顧名思義有媿有箴文之雅詩以繼遼駟

銘

堯衢室銘

衢室堯所以采民言也惟堯舍己稽眾從諫弗拂粵昔黃帝睿詰遠覽合宮有聽明臺有議并謀兼知詒燕後昆迺考室四達之衢垂聽而問焉邇而百揆四岳邈而九州四表聰明光被嘉言罔伏猗與媿哉善旌誇木昭其明也素題樸梅昭其儉也清問而鰥寡靡不達疇咨而其咎不能蔽先惠之意寓於衢尊爾極之謠聞於康衢仁天知神隆寬博問廣覽兼聽八荒在闥言布天下誦聖至今厥後訪以總章觀以總街復以靈臺詢以外朝揆元探尚帝實肇之炳諸典謨卓蹤冠德鋪觀方策下聽於人則管子紀其事議盡天下之心則文中子申其說垂衣錢幅遠如神明之居則子華子詳其制魏文帝紀亦曰廣詢於下豐規淵指歷歷維見或者有調元氣治陰陽之言以爲明堂異名堯心未昭晰於億萬禩禹之聽治猶銘奠虞矧惟帝世必有銘詩而漆書軼焉皇皇箴諫之路貳室尊賢太室考庸未足匹休罔羅舊聞補其辭曰

於穆放勳道泰朝清光被四表在予戶庭惟天爲大德
寓恢闕儲思法宮羣龍翼承從人稽眾聖而不矜五達
之衢諺木求箴康衢游童洋洋頌聲衢尊先惠涵泳至
仁於焉築室廣聰垂明台宮之聽率祖攸行茅茨流化
類數階莫幅舄入觀若星共辰彤車黃收巍乎天臨帝
暉邇止垂衣如神上開言路下達民情何以來之有鼓
有旌清問鰥寡爾隱畢申疇咨四岳朕愆悉陳側陋在
下罔闕予聞象恭庸違罔惑孔壬相在爾室咫尺八紘
誰謂民遠察其嘖呻夏鐸徇路規諫于春湯有總街觀
貽此休銘

商玉磬銘

樂以玉振之終條理也惟商玉受球膺命作樂曰濩九
招晨露是修是歌八音鈞諧神人洽熙垂裕後昆明德
恤祀猗那有頌奏假烝嘗鼓管和平來依磬聲先祖聽
之歆馨降嘏微哉淵序若稽毛傳磬象物成鄭箋述之

指爲玉磬蓋和聲依永無相奪倫非泗濱石所能致必
續卓其璞清越其音始克爲衆樂之綱紀昔者節磬九
成鳴球在上四代樂器拊搏並敵虞夏舊章惟商時憲
想夫三賧之寶空同之玉迺磨迺琢從律中度虹氣宇
達煥乎崇牙于廟于郊翕純皦釋眊叔之離磬周之笙
頌不侔矣穎達書疏兼述商頌且謂磬垂堂下尊而進
之宜與湯盤俱列銘典漢有珍磬猶播雅詩茲不可亡
識其銘曰

瑟彼球玉昇於武湯維玉之聲清越以長思昔鳴球合

深室文鈔餘編

卷一

五

四明叢書

約園刊本

奏舜堂后夔拊之獸舞鳳翔矧予湯孫奉時烝嘗豈無

玉豆肆享先王亦有玉斝清酌是將奏假維何猗那一

章曰鼓淵淵曰管將將眾音疇依磬爲之綱典寶之珍

烈祖所藏載攻載錯摩其耑旁錙鳴應律崇牙高張大

濩始作萬舞洋洋集厥大成雅韻清揚聞樂知德如圭

如璋王假有廟申錫無疆禹興九招貢石徐梁東笙西

頌周典有常孰若英璞鍾粹乾剛神之聽之自天降康

鬯圭並寶僅見魯邦紀甌偕賂器存寶亡惟德其物專

媿有商制陋漢梢瑞軼夏璜勒銘于虞德音孔彰

周瑞節銘

維周王撫萬邦征不庭旁作迂衡治定制禮諭志以使
遣使以節制節以瑞重命令昭德信也若稽周官掌節
有職行人攸達厥制惟六金有虎人龍之別竹有旌符
管之異都鄙貨賄曰角曰璽臚分殊事用各有宜惟時
邦節琢以良玉庸輔王命珍圭召守牙璋治兵穀圭七
寸和難聘女用焉琬圭琰圭九寸治德易行用焉典瑞
辨其名玉人著其法康成釋經兼述五者謂之瑞節想
夫井里之璞禹氏之珍追琢其章虹氣孚達張廡濡轡

深寧文鈔餘編

卷二

三十四明叢書

約園刊本

肅將明指執而致命拭而展幣輝威彰信風動霆行文
告義征罔敢不率觀圭贄寶臚湊羣辟欽我王度如玉
之純十有一歲則命廣行而達之和難弗辟則與調人
而執之遠揚邇昭德鬯禮洽皇序燾哉其守邦國之大
寶與內史過曰瑞節以鎮之秦西乞術曰瑞節以結好
聘禮圭纁九寸康成亦以爲瑞節宜在銘典匹休嘉量
敢爲補亡之辭曰

於皇時周王度如玉宣昭義問函夏砥屬節傳四馳灑
式鼎新侯角侯璽或竹或金皇皇者華有嚴遣使追琢

虹璞植名曰瑞守以掌節達於廣行玉人裁模典瑞辨
名瑟彼珍圭鎮安方國召爾封守惠爾寤阨七寸鉏牙
起旅之璋和聘有圭穀文孔彰羣辟承德時聘歲覲曰
琬九寸要結好命彼不庭方慝行未除判規之琰迺諭
迺誅咨爾玉人所寶惟信來旬來宣圭璋其聞寶不踰
把光溢周原以瑞等邦式禮莫愆軼漢虎符異魯龍輔
舜玉湯球參燬前古侯氏奉璧蠻方獻琛不令而行佩
我德音瑞雖有五王心惟一欽哉膚使眡此琢刻

箴

深寧文鈔據餘編 卷一

三

四明叢書

約園刊本

漢典星箴

惟天不言以象設教惟聖時憲以星爲紀昔在顓帝司
天有職堯命四子爰考星中蒼籙質隆靈承乾則保章
志變馮相會位下逮列國亦有司星宿離步占咸宿其
業炎劉闔統顧諟明命治星列於太史候星設於靈臺
曆志道紀復有典星太初之元更造密度時則射姓與
其議永元四禩考驗黃道時則姚崇并畢等十二人言
其灋厥初建官將以欽曆象在璣衡非徒傳皋唐甘石
之術而已夫星體生於地精成於天爲名百一十八積

數七百八十三在朝象官在野象物在人象事此動彼
應上下同流存於君心著於祲象伏見蚤晚政治之候
飛流陵歷踐履之符未有善言星斯徙度齊無穢德彗
乃可禳以人占天休咎景響漢之星官茂明斯道必將
誦節儉之規而泰階六符不待臣朔之陳矣必將述寅
長之訓而清燕指蜀不待臣向之奏矣若稽史籍箴諫
蔑聞而元光星指之異僅載候星者之言視虞人誓御
寧無愧與紬繹漢事爲補亡之箴曰

煌煌乾度臨下有赫百十八名象載昭察星官有書肇

自有熊德隆晷星清明在躬舜察璣衡勅天之命周辨
妖祥以詔救政我漢懋德寅畏明威步占列宿臣敢不
祇衡正階平維文節儉民勞星指維武征伐見道知治
以人占天暗室修省辰緯森然心曰前星建嗣必豫畢
爲天街邊氛是懼三能未齊論相惟人營室雖中土功
勿興五緯珠連填爲之主心思先正五事咸敘女宮在
後次乎少微賢賢易色對越不違監于建始爵私外屬
祲象著郵流星下燭監于永建寵任左貂彗弗垂異道
見招搖毋曰蓋高陟降左右毋曰不顯景響休咎鏡考

已行應不以文滿譎誣天罪臣攸聞長星紀元德星貢
伎顛穹仁愛云何弗敬毋汨緯候謂苗可移毋泥分野
謂國無危朔陳階符向指圖狀矧臣庀職敢忘諷上欽
若曆象兢兢如堯小臣司占敢告內朝

漢柱下令箴

聖人灑天建官印稽乾文北極之東一星彪列柱下有
史是則是憲在周曰聃在秦曰蒼以記言行以掌方書
漢祖肇基烝髦籲俊官司諫爭罔匪正人旦夕承弼厥
辟若昔愆王起居必欽號令必臧實賴左右之士迪于

深寧文鈔餘編卷二

三四明叢書

約園刊本

丕彝秉筆殿楹如戎夫倚相之識曷可不謹其選維五
年命山都侯王恬啓爲柱下令所以司紀載謹言動也
百官表書恬啓爲郎中令功臣表兼述之顏氏以爲主
書之史考諸傳記法冠曰柱後侍御史曰柱下尹東都
樂何之徒抗議柱下有繩愆格非之責焉夫衛武之聖
史不失書魯莊之聞書而不瀆君德崇替常必繇之二
漢舊章世有注記而孝武錄於禁中永平纂於宮掖官
失其守豈識高皇帝闕遠之規與敢擬揚雄之作而箴
其闕箴曰

巍巍萬乘天臨淵默歷之春秋言法動則載筆有史造
尚帝鴻我漢初基山都是庸表裏交修身度聲律臣節
不同方駕狐佚媿惡無隱欽乃道司百九十篇著記昭
垂監于周季仇忠比佞附居是職雖賢罔任監于嫚秦
翳諫飾非蒼備厥官雖失不規作而不記匪德之盛必
遠其猶訐謨定命書而不法俾後何觀必謹其行無敢
遊盤翦桐有諷如棠有諫毋昧諂言以直爲訕倚几有
訓書楹有銘毋邇宵人以逸肆情思古良史左誦右韻
云何成憲碌于中葉內廷纂錄自親其文諸儒雜定直
筆蔑聞君舉必書繩其祖武史臣司過敢告誓御

深寧文鈔披餘編

卷一

三四四明叢書
約園刊本

深寧先生文鈔摭餘編卷三

宋四明王應麟伯厚撰

里後學葉熊輯

贊

寶元紫微閣御篆贊

天階下民闔我宋離明之運三聖傳序文治彬蔚睿謨
宸藻光摩壁奎越我仁宗皇帝重暉襲明日燭月霽稽
經典學苞舉藝囿穗書綠字入神出天顧瞻玉堂爰稽
祕閣昔在淳化龍牋虹管躬灑飛白霞舒鴻嘉昭揭霄

深寧文鈔摭餘編卷三

一四明叢書

續圖刊本

漢矧時右掖發令代言常揚高崔振纓交烏儲清聯邃
宜闡宏規寶元之元律中夷則日躔庚戌煥發宸指鳩
工建閣翬飛鳥革穹麗豐瓊凌轆石渠天祿翔鸞棲鳳
右迺御帝鴻之墨海挾漢宮之寶跗冠名紫微載篆戶
冊金壺霏泚鑪錘造化如商盤周鼎之識如羲畫禹銘
之文非烟祥風緣飾萬象丹青綸綍益煥其章開元集
賢之題莫能窺帝書萬分之一臣竊惟仁皇多能天縱
邇英延義左右圖籍羣玉藻珠優繇篇翰景祐律準之
字皇祐明堂之顏八體六書神謨心造韜軼頡頏前無

千古斯閣之扁文化恢焉儒術崇焉彼漢篆未央晉書
太極奚異螢燿之儼龍燭與於萬斯年極天比峻環宮
列宿是衛是翼宜敷厲而顯詩之爲無窮觀臣竦臯書
命衣被昭回之光操手祇贊贊曰

乾緯宣精紫微環極維聖時憲設官分職開元名省延
譽鴻生秉筆贊命神化丹青濬喆維朱熷興文治星旅
奎鈞麗離明賁常揚接武翔于鵷池參盤襲典潤色綸
絲允文仁皇積思書圃天葩聖藻萬象咸覩旃夏穆清
瑤管春容被物咸飾吉雲祥風律準之畫明堂之扁河

深雪文鈔據餘編卷三

一一四明叢書

約圖刊本

龍獻執有赫奇篆睠言西掖英彥所躔傑閣鼎新上薄
凌烟錯寶之跗元氣沕穆錙銖斯冰糠粃籀邈金字特
書玉題揭名雲漢昭回粲爲列星翠綉鳴佩於焉游息
仰睇慶霄斧藻失色若宓戲畫原於綠圖若神禹碑刻
於螺書蚪鸞鳳逸超絕畦徑入瀟森嚴心正筆正淳化
飛白木天玉堂維帝之書祖武重光祥符聖製翔鸞鏤
石維帝之書文典時式毫帝膚寸雨露羣生訓謨渾噩
虞周比崇追琢其章辭尙體要如篆之古摛華演誥鸞
刀刻銘寶奎題顏邇英分錫迎陽縱觀天球閱臧繆繩

鈿軸頰陋唐宗平雲芒玉倬彼曾宇虹彩屬天詩目颺
之何千萬年

周七律贊

律者音之本也河圖授義粵有律瀟含少比竹昭華刻
琯立均出度成於十二黃虞迭造聲數靡易律之有七
其周之盛虞武王變伐通駿有聲於鑠皇師致天之屆
惟十有三年歲躔鶉火月旅天駟日紀析木辰集斗柄
星次須女是協天龜五位三所合而用之絳張及房其
宿七列繇午至子其揆七同數合聲餘播之音律二月

深寧支鈔餘編

卷三

三

四明叢書

約圖刊本

癸亥畢陳以夷則之上宮于牧之野布戎以黃鐘之下
宮太簇下宮以布令無射上宮以布憲曰羽曰厲曰宣
曰蕤蕭勺陰陽正變咸備翕純皦釋神人洽熙勝殷遏
劉無競維烈律之時用大矣哉司樂典同寂寥亡詔景
王二十三年間伶州鳩意謂五聲及宮祉之變州鳩鋪
敝數度外傳載之鏗匏渾錙如聞象武宿夜之奏隋志
明舜樂之七始杜預釋左氏之七音琴爲七絃則淮南
之注律爲八十四則服虔之說戊午至甲子七日則孔
穎達之疏楚語七事樂纂七聲或云七宗或爲七調七

均咸自州鳩啟之稽諸六弢律可知敵太師執律爰聽
軍聲武王兵書昭著丕式史遷謂推春至冬柳宗元謂
大武律變漢如應鍾唐終南呂至有除黃鍾而首林鍾
者音官失傳久矣周玉律有八江左世葆之茲律不以
器傳而武之七德寓焉庸墨筆操牘而作贊曰

龍畫肇分律絲數起鳳鳴既聽聲以月紀於皇時周變
伐戎商廣文之聲我武維揚印層北維頰察周楚姬出
天龜稷緯辰馬維鶉及駟躔次有經自午至子會朝清
明位協於五列揆呂七聲數自然寫之玉律大師載歛

梁書文鈔餘編 卷三

四四明樓書
約園刊本

下上其宮羽以夷則厲以黃鍾大簇無射布宣憲令昭
德柔民徂維求定陰陽遞代宮爲之綱既備乃奏鏗鏗
將將矢于牧野莫不震疊振旅羸內愷歌鏗鞀爰命司
馬執呂獻功功成作樂蘇鳴蕭雖琴增七絃頌美七德
興文偃武簫勺羣慝往著再始復綴六成窮本知變樂
行倫清七衡之響紀於含少侯今之制威聲燁耀七始
之詠屬於箭磬侯今之制德音孔昭宿夜失傳象武孰
志均調猶存正五變二一氣二體八風九歌終始相成
天地同蘇聲與政通茲律維則播以雅詩時萬時億

越大夫贊

吳夫椒之戰春秋不書以其復父讎也越之報吳不可謂義戰雖然古之善謀國者以弱爲強以亡爲存必有素定之畫方勾踐之棲會稽也大夫種實始獻謀約辭行成玩吳於股掌之上而受其燼弛張闔闢終以沼吳春秋外傳載諸稽郢之辭命鏗膏炳耀似晉呂相鄭子產蓋種爲之真奇偉之士哉史軼其傳未有言其州里者余讀呂覽高氏注大夫種文氏字會郵人開卷訢然知鄞之有人勾踐之地東至於鄞鄞僻在海隅自大里

深寧文鈔餘編

卷三

五四明叢書

續編刊本

黃公以前未聞達者而大夫挺出特起爲鄞人物之冠冕三復屢歎尙論其事世多謂大夫不能從五湖游異乎見幾而作遂謂種不如蠡吁君子制行不必同同於義而已保身義也致身亦義也種蠡俱逝君誰與守蠡楚人可以去越種也越人斐斐遲遲不忍去父母之邦忠臣之志也嘗以漢事喻之蠡爲子房而僅免種以鄒侯自處鄒侯微王衛尉一言亦殆矣功名之難居也若是勾踐殄殲謀臣如弁髦土梗彼鬻國之詬不誅而復用之君子是以知越之不爲盟主也詩所謂不承樞輿

其勾踐之謂乎世不嘗勾踐而口種過矣余閱種之不能擇君而悼其不終鄉使種也如吳之子游北學於中國沐聖人之教成之以禮樂必將致其君於齊晉之上用周禮易夷俗自同於諸華功烈不在管仲咎犯下矣若種者才智之士未及道德也昔子蘇子論范增亦人傑余於種亦云夫齊人猶知管晏鄆不知種可乎迺爲之贊以俟續郡乘者擇焉

贊見四明文獻集

八賢贊

童判子

王介甫爲鄆令奉行教書訪義夫節婦得三人其一人可采曰童判子爲人掌

深學文鈔據餘編

卷三

六一四明叢書

綱圖刊本

典庫其家養疏屬數口奉寡姊承順不違勞不爲家業屢負人債輒爲償之而不以告姊江鄰

幾紀其事於雜紀

賢哉若人儒行塵蹟梯友祥順展也寔德我興視世口舜心路居市不市前言匪激

蔣璿

學必以己義榮道腴博觀守約胸吞石渠良朋問疑詡徑未蕪誰其似之子雲林間

王茂剛

夢吞三畫韞玉山樓象外繫表捐筌棄蹄心學自得犧

文與稽緒言不傳林深草萋

顧主簿

言行慥慥白賁素履忠信篤敬行乎州里其德如蘭薰我晉鄆漢之長者周云吉士

李宗質

字文叔濮人文定公之裔所生母展氏罹靖康之亂母子相失有姊歸司馬文

正公之諸孫與俱詣行在所至江州水南治遇展氏於塵中物色良是姊見之而信抱持相哭人以爲孝感別十餘年而奉色養者二十年文叔卜居鄆之石塘攻媿樓公銘其阡誠齋楊公爲傳而贊之曰非至孝奚而通神明非通神明奚而得母

烝烝純孝其感以天昔朱今李盛事光前綠衣華髮介

深寧文鈔餘編 卷三

七 四明叢書

約園刊本

以耆年孰補南陔章善旌賢

李猷黃子游

信義之重死生如一求諸古人藥布脂習偉哉一士卓行獨立砥訓薄俗百世時式

陳之翰

貴義如璧賤金如土不億不信莫余敢侮誠於爲善君子所予彼晝攫者羞愧汗雨

七

四明七觀

東野先生發光環堵根極深寧慕白賁以息影玩素履
以洗心有南州公子儼然踏門言曰竊懷太史公之志
廣攬四方之恢恠慤怪升高能賦山川能說庶幾一二
於君子之九能

詩定之方中傳建邦能命龜田能施命作器能銘使
能造命升高能賦師旅能誓山川能說喪紀能誅祭
祀能語君子能此九者可謂有德音可以爲大夫也
能叶奴代切

今至是邦也願啟我以偉觀博我以奇概

深寧文鈔餘編

卷三

八四明叢書

約園刊本

先生曰余臥游詩書之囿眎不踰几席敢誦舊聞吾子
自擇焉昔嘗觀宛委之簡見神禹之山經

吳越春秋禹東巡登衡嶽夢見赤繡衣男子自稱玄
夷蒼水使者謂禹曰欲得我山書者齋於黃帝之嶽
禹退齋三日登宛委山發石得金簡玉字言治水之
要山海經十二篇相傳爲夏禹所記

東有山曰句餘寔惟四明南餘姚北句章二縣以爲名
山海經南山經又東四百里曰句餘之山注今在餘
姚南句章北二縣因此爲名九域志四明山句餘山

爲二以地理考之其寔一也

卽山氏州倣自開元之盛

叶音成唐地理志江南名山四明其一也明州開元二十六年採訪使齊澣奏以越州之鄞縣置以其境有四明山名之

其山嶮巖龍從谿衍嶽峯駿極顛蒼危碧峭青方石四面天劃神剡出入三光窗豁牖鉉對修眉於天姥接五界於金庭

四明山二百八十峯口周回一百八十里有四門通

深靈文鈔撰餘編

卷三

九四明叢書

約園刊本

日月星辰山居賦注天台四明相接連四明方石四面自然開窗沃州天姥山在剡白樂天記南對天台而華頂赤城列焉北對四明而金庭石鼓介焉沃州天姥爲眉目孫綽游天台賦落五界而迅征注五縣之界五縣餘姚鄞句章剡始寧金庭宮在桐柏山會稽記四明山高峯軼雲連岫蔽日

茲謂赤水之天兮瑤扉闢而不扃

福地記三十六洞天九曰四明山名丹山赤水之天上有四門

松晉羨期之儔來宅來燕放蕙壺瀛駟虬桀驚嫉翔紫
清山中人兮冠切雲駒皎皎兮鴻冥冥或梯空而上或
履雪而行

韓文公送惠師詩發迹入四明梯空山秋旻少陵詩
履穿四明雪謂鄭虔

從逸老以消搖賦二韭與三菁景幽棲之至行道義重
而貨輕

四明逸老賀知章見李太白集知章自號四明狂客
謝靈運山居賦天台桐柏方石太平二韭四明五奧

深學文鈔摭餘編

卷三

十四明叢書

約園刊本

三菁注韭以菜爲名三菁太平之北諸山神仙所居
宋書山陰孔祐至行通神隱於四明山嘗見山中有
數百斛錢視之瓦石不異

珍木嘉草蔓葑蓐榮咄甘濟芳有果青櫛

陸龜蒙集四明山中有果名青櫛極甘九域志山有
四面各產異木不雜

茗十二雷采禪區萌

晁以道詩官有白茶十二雷注四明茶名區音勾
川原出焉練澄凝停雲蒸雨降豐我稻秔

南豐廣德湖記源出四明山

其下桑土蠶綸繭純紅女織棊交梭吳綾

綸七侯切唐地理志云明州土貢吳綾交梭綾

躡跂躡以攀躋徑沓嶂之紆縈

躡躡卽履屨字

儗參同之伯陽

佇客星之子陵軼埃埒乎區外連飛遞而離羣安石之

東山謝敷之太平

世說謝敷入太平山中十餘年

咫尺可尋也爾乃地載神氣支分脈聯大隱之峯名士

楊適生焉

深寧文鈔餘編卷三

十一四明叢書

約園刊本

慶曆五先生大隱楊適其一也

鳴鶴之岫二虞喜荔兆焉

九域志古迹鳴鶴山有虞喜虞荔墳

將與子朋霞侶月釣石耕烟諷遠遊於穹谷吟考槃於

鳴泉分蠶藥之刀圭友造化而飛高圓

九域志夏侯曾先地志云大隱山南入天台北峯四

明東足乃謝康樂鍊藥之所

尙有意乎彼謂鰐鮫霧濕之蟠鬱

蔡肇明州謝表鰐鮫霧濕之所蟠鬱夷隸舸舶之所

往來

未知有建德之國空同之仙

公子曰愚行天下睹終南嵩岱之高興公登陸徧矣
孫綽字興公遊天台山賦序登陸則有四明天台

先生曰海於天地間最鉅故觀於海者難爲水駕言徂
東浩漭滄溟羲和浴於樽桑日杲杲兮金鉦朝潮夕汐
與月虧盈有鮪如山從以鯨鯨

風俗記海鰐長數千里穴居海底入穴則潮上出穴
則水退

深寧文鈔餘編

卷二

十二四明叢書

約園刊本

神虬襄首吐雷噓雲方其駿濤虎浪之興銀峯萬仞雪
屋千層簸空兀嶽沃日吞江雷公爲之矍踢天杭爲之
蕩震

叶平聲

盧賦寶志未能該也

唐盧肇海潮賦寶叔蒙海濤志

穆之圖論目擊其真

燕肅字穆之知明州著海潮圖論二篇

天門之水灌洿潤澹滋汨汨遠注析木

漢地理志鄞東南有天門水入海有越天門山輿地
廣記象山縣東門山卽越天門山

三吳轉粟粲粲粒玉饑毗叩哺檣連尾屬宴舶迅舸蠻
縹夷琛東泊青徼南薄朱垠

陸雲答車茂安書鄧縣東臨巨海往往無涯汎船長
駟一舉千里北接青徐東洞交廣

登山而望渺渺鷗鷺之浮天根候五兩以颿颿爰居戢
而徵氛

郭璞江賦覘五兩之動靜淮南子注統候風也楚人
謂之五兩統音桓國語爰居海鳥

雕題卉服馭寒貂雞林楊柁東門熒鷁江潯爰有狻麈

深寧文鈔餘編卷三

十三四明叢書
約園刊本

犀象翠羽火齊薇水龍鱗之馥郁蟻珠木難之瓌麗杜
楊所未編辛文不能計

狻麈獅子火齊玫瑰占城薔薇水得自西域龍鱗香
見香譜木難碧珠蘇鶚杜楊編言奇寶辛文計然字

也

世道窳烏瓜切隆如濤降升蓋獻龜於明者治之兆

祥符七年明州獻青毛金文龜

雨毛於鄆者亂之萌

唐五行志神龍二年雨毛於鄆縣占曰邪人進賢人

遁

在昔勾踐疆宇至寧仰瞻沼吳蒲羸之濱曰甬句東
口外洲戰爭蟻穴興亡貉邱

越語勾踐之地東至於鄞韋昭注今鄞縣是也後漢
書注鄞故城在鄞縣東今奉化象山漢鄞地左傳越
滅吳請使吳王居甬東注句章縣海中洲也吳王云
甬句東注今句章東海內外洲也越語注甬甬江句
章也晉孫恩寇浹口入餘姚破上虞通典云越徙
夫差於甬東韋昭云卽句章東浹口外洲明州東北
域志羅城或云越王無諸所築吳語越大夫種曰吳
荐饑其民必移就蒲羸於東海之濱羸卽螺

秦政騁欲狼心未滿游鄞踰月從流忘反海水羣飛洪
茶於民一瞬爲墟鮑車魚鬻

陸雲答車茂安書昔秦始皇前臨終南退燕阿房離
宮別館隨意所居沈淪涇渭飲馬昆明四方奇麗天
下珍玩無所不有猶以爲不如吳會也東觀滄海遂
御六軍南巡狩登稽嶽刻文石身在鄞縣三十餘日

迨漢六葉濯征東粵句章出師命臣韓說

漢武帝伐東粵遣橫海將軍韓說出句章浮海自東方而往

典午末造妖寇鳴張裕以豪英往戍句章

晉孫恩之亂劉牢之東屯上虞使劉裕戍句章孫恩寇句章牢之擊走之夏侯曾先地志云劉牢之築城以遏三江口

唐季不綱盜覆此城巨容筒箭獲醜策勳

唐王郢陷明州鎮遏使劉巨容以筒箭射郢死拜明

州刺史

梁書文鈔餘編

卷二

十五 四明叢書

約園刊本

想霸諸夏吞六王之雄圖螭舟兕楫射蛟之弧啟啟闐闐膽陽侯賊天吳矯矯三將如熊如羆電矛雨矢揃刈攘治威殫勢遷鮒入鯢居昆明幾劫桑田半蕪吾將放其遺躅既湮沒而無餘矣建炎凱獻於高橋六飛安行於海澨隱士相如捨忠納說何懋賞之濇濇豈亦若新城三老之縹遊

建炎間張俊用隱士劉相如之策留明州遂有高橋之捷遊音逝

視千古以永懷愴東波之無窮誦往聖之緒言審乘槎
其焉從壯魯連之高蹈閔精衛之深衷子好游乎

公子曰水至平端不傾心術如此象聖人荀子成相不
在險也請更端以教

先生曰海物惟錯雋味粹焉任公垂餌便嬛榆竿波臣
效異鱗萬介千寸鮎腹鱓亭以埼名漢律獻醬惟遠見
珍

漢地理志鄞有鮎埼亭注鮎音結蚌也長一寸廣二
分有小鱓在腹中埼曲岸說文漢律會稽郡獻鮎醬

深寧支鈔餘編

卷三

十六四明叢書

約園刊本

三斗郭璞江賦璣鮎腹鱓南越志璣鮎腹中有鱓子
如榆莢合體共生

蚶采疲民君嚴奏免

唐孔羆字君嚴明州歲貢淡菜蚶蛤之屬戮以爲自
海抵京師道路役夫凡四十三萬人奏罷之

貢纒鯽骨元豐仁儉

九域志明州土貢烏鯽魚骨五筋

齋鰲蚌蛤蟹鱈鯨首石齒鋸赤尾比目鱗品類之數
百愉茂安之慘蹙

車承茂安外甥石季甫見使爲鄧令舉家慘蹙句章人說此縣有短狐之疾問陸雲以土地之宜雲答書曰鄧縣海物惟錯不可勝名斷過海浦隔截曲隈隨潮進退采蚌捕魚鱸鮪赤尾鋸齒比目不可紀名鱸鰠鰾炙蟹鯨烝石首臛鯨鯨真東海之俊味肴膳之至妙也及其蚌蛤之屬目所希見耳所不聞品類數百難可盡言當爲喜慶勿爲慮也

亥市攸聚水族有簿兼韓子之南烹蕩鯨蠓與章柱雖石華海月之詩綺貝繡螺之賦弗能殫舉東臈之鯛邪

深望文鈔雜編

卷三

十七四明叢書

約園刊本

頭之鮓潘國之魷且甌之蜃珠鯨紫魴

居性切

其來如雨

鱖魴鱖魴數以盆鼓於是擊鮮鼎食羞用膳經嘯父蝦

側下切

宣子魚漁陳登之膾虞悰之鯖芼以秋菘醑以

冬橙掇苔髮以爲蕪醉鼈杯而未醒若乃潤下作鹹散

鹽爲貴宿沙肇鸞而海王之筴祈望之守昉於齊而征

利

說文古者宿沙初作煮海鹽魯連子宿沙瞿子善煮

鹽筴於海王

王去聲

之國謹正鹽筴晏子曰海之鹽蜃

祈望守之鸞讀爲煮字

漢都設官三十有六會稽則海鹽居一此三縣猶未置也攷諸唐志鄞始有鹽晏異管推法寢以嚴

地理志鄞縣有鹽劉晏李異

海澗稚髦弗能

音耐

苦淡若作和鬻甘香

音澁 酌醴燔

枯鱸鮑恣啖絲是亭監綦布牢盆歲增負塗山積熬素雪凝翦竹葦以供煬釋耒耨而肆勤一帑三斛川浮陸

馳

帑俱便切說文囊也今鹽官三斛爲一帑也

行商通其價

音需

巡院譏其私

劉晏置巡院捕私鹽

蓋日用飲食不

深寧文鈔撫餘編

卷三

十八四明叢書

約園刊本

可以無朝齋箬裏其功與醢醬俱馬齒水精冰鏤霜明魏太祖賜劉恭馬齒鹽七種後魏明元賜崔浩水精

戎鹽

古云食肴之將詎屑玉而噉瓊東箭浴筍越竹筍萌楊氏之果染霞垂星鹽音藍爲夏槁屏羶撤腥飫高裴之菜食奚猗氏之足云

後魏高允廚中鹽菜而已裴俠食惟鹽菜柳子晉問

猗氏之鹽晉之大寶也

魚鹽之湊民殷財阜不謂之樂郊耶

公子曰海加租而魚不出鹽顯利而人窮怨不聞蕭望之朱文季之言與漢食貨志後漢朱暉傳吾冬館夏麩邱舉切藜藿不糝味無味夫何嫌願聞所以利民者

先生曰先民有夏盡力溝洫魏之豹起西門豹史起漢之兒

白兒寬白公疏泉灑流沕涵膏澤維鄭之邑厥壤鹵舄原高

隰下易嘆以溢相時鍾洩守宰道職我懷休明循良輩出幹造化機卷舒神術有豐無窳滄霽惟一觀乎句章漢陂之舊內史修復所居民富

晉孔愉爲會稽內史句章縣有漢時舊陂毀廢數百

深寧支鈔餘編卷三十九四明叢書約園刊本

年愉修復故堰溉田二百餘頃

言觀乎南湖曰小江溉田置堰元暉氏王蘭鞠無絕如

古桐鄉

唐地理志鄆縣南二里有小江湖溉田八百頃開元中令王元暉置民立祠宇以祭之九域志它山堰王元暉置後封善政侯

觀乎西南堰曰仲夏頃凡數千兩我多稼築者季友惠以厚下

唐志鄆縣西南四十里有仲夏堰溉田數千頃太和

六年刺史于季友築

湖有廣德實在西界刺史曰侗增修勿壞夷庚起隄岫也建埭誰其填闕音於利微害大發議請復志不克遂

唐志鄧縣西十二里有廣德湖溉田四百頃貞元九年刺史任侗因故跡增修南豐先生記云湖大五十里漕渠東北入江大曆八年令儲仙舟更今名大中元年刺史李敬方刻石謂湖成三百年矣湖之興其在齊梁之際乎至道元年守邱崇元復之天禧二年李夷庚正湖界起隄十八里限之熙寧元年張岫築隄九千一百三十四丈爲埭二十政和中塞爲田高廟時李光泰奏請復湖不克行

唐有西湖爰在東郊陸令開廣農殖嘉苗

唐志鄧縣東二十五里有西湖溉田五百頃天寶二年令陸南金開廣之

湖姓以錢亦處東鄙受溪七十二環塘八十里四埭七隄重治者李

明州東錢湖受七十二溪累石爲塘八十里天禧元年李夷庚重修中有四埭七隄溉田五十四萬畝隄

卽堰字

瀉瀉清渠有莠有苽有蒲菡萏烟海雁鳧蓋自晉以來

過川水種旣浸旣潤民食無乏

方勇切

陸雲答車茂安書鄞縣西有大湖廣縱千頃過長川以爲陂燔茂草以爲田火耕水種不煩人力決泄任意高下在心舉牖成雲下牖成雨旣浸旣潤隨時代序官無逋遺之穀民無饑乏之慮衣食常充倉庫常實

介甫鳴弦乃隄乃陂瘠土衍沃遺黎之思

深寧文鈔餘編卷三

二十四明叢書

約園刊本

聞見錄王荆公知鄞縣起隄陂決陂塘爲水陸之利也邑人便之公屬民浚渠川見鄞縣經遊記

吏隨以窳棄稷弗務新溝之歌靡聞均水之約莫舉

唐薛大鼎治新溝漢召信臣作均水約束

明澮塞而圻龜坊音防庸圯而涸耐曩晦也鍾今食二誦

孰能諗夫愛民者塗之人可以爲禹

公子曰佐耕以水展也民利思不出位吾將有俟欲聞

閔大傑特之觀無隱乎爾

先生曰明多名山竺乾氏居之寶地金繩祖花禪枝南

有雪竇東有太白飛瀑淙淙層巒鬱鬱大梅之嶮愕衣
荷澹松之詠憺如也玉几之峯巒神耀得道之銘炳如
也吳市子真松風隱居陳蹟故在是邪非歟

大梅禪師詩一池荷葉衣無盡數樹松花食有餘東
坡先生宸奎閣碑銘神耀得道非有師傳見八師子
經大梅山或謂梅子真所隱南史陶弘景詣鄆縣阿
育王塔受五大戒

文正之詩大年希白之筆釋子之所夸詡存乎否乎

范文正公送湛公歸四明講席詩滿面春風指四明

深寧文鈔餘編

卷三

三三四明叢書

約園刊本

山長水曲不勝情自言此去雲林下惟講華嚴報太
平鄴有法智師名禮主天台教聚徒四百楊文公大
年慕其道三以書留之住世錢希白碑其異于塔

雖然著本論者惡其學幻而言咙意者辟世之士晞髮
濯纓岑蔚林密魚潛龜藏思昔山人有徐廣孝經之指
唐藝文志徐浩稱四明山人上廣孝經十卷

王蔣顧三隱席珍韞璞不薪流俗之知己

容齋三筆載李孟傳所錄三人王茂剛居林村巖壑
深處刻意讀書尤邃于易慈溪蔣季莊富宣和間鄙

荆舒之學不事科舉閉門窮經高抑崇率一歲四五訪其廬顧主簿南渡後寓慈溪廉介安貧踐履雖細事不苟且起俟賣菜者過門問菜把直幾何隨所言便酬之宅布帛皆然久之人皆信服不忍欺之

瑱也自謂似龐蘊僧騰客之該洽故老稱美

李瑱老于韋布有詩曰此身便是龐居士也更無人賣策籬爲文用僧騰客事或問爲何事曰侯景臺城事也著白樂天年譜事見攻媿集

今崑崙之下豈無草耕木茹匪黃匪緇蟬蛻鷺澤欲往

深雪文鈔餘編卷三

三三四明叢書

約園刊本

從之耄且休矣子謂斯何

公子曰姑舍是側聞是邦鴻生碩德所治教也南豐曾子江漢星斗之望牧於斯

南豐先生曾子固名鞏守明州修州城程工賦裁省費十六

忠肅陳公雪竹霜柏之操貳于斯

陳忠肅公瓘瑩中以越州簽判攝倅明州寓居城之湖西著四明尊堯集

船司空則以道之晁倉庾氏則子約之呂正學參前修

姱節映終古

景迂先生晁說之以道以元符上書黨人監明州造船場易元星紀譜作于甬江官舍舊有祠放翁作記大愚先生呂祖儉子約監明州苗米倉去倉中淫祀後爲太府丞以直言謫死高安諡曰忠

前代令有瑄長史有吉甫未足數也
唐房瑄慈谿令李吉甫明州長史

文獻濡染必有聞而知之者敬在下風

先生曰明土鄉也有越大夫種之英風其人通達而多

深靈文鈔撫餘編 卷三

三四四明叢書
約園刊本

能

呂氏春秋高誘注大夫文種會稽人

有大里黃公之高標其人恬靜而自珍

會稽典錄虞翻仲翔對王郎景興曰鄞大里黃公絜已暴秦之世高祖卽位不能一致惠帝恭遜出則濟難輿地志云鄞有大里夏黃公所居

董子以孝行著愛親者式其儼型

典錄虞仲翔曰孝子句章董黯盡心色養喪致其哀單身林野鳥獸歸懷怨親之辱白日報仇海內聞名

昭然光

任奕以文章進擢藻者襲其芬馨

典錄朱育對濮陽與曰文章之士立言繁盛則御史
中丞句章任奕文檄擘若春榮

宏雲光修四士尚義挹其勁操思特立以獨行

典錄虞仲翔曰主簿句章梁宏鄭雲皆敦始終之義
引罪免居鄧主簿任光身當白刃濟君子難揚州從
事句章王修委身受命垂聲來世見吳志虞翻傳注
故虞仲翔以俊異之生爲海嶽之精

深筆文鈔餘編

卷三

三五四明叢書

約園刊本

典錄仲翔曰會稽山有金木鳥獸之殷水有魚鼈珠
蚌饒海嶽精浹善生俊異是以忠臣係踵孝子連閭
陸士龍因吏民之謹知禮教之明

士龍答車茂安書鄧縣榮辱旣明禮節甚備爲君甚
簡爲民亦易吏民恭謹篤慎敬愛官長鞭朴不施聲
教風靡

屯艱否閉堙暖湛冥宋以文治賢路恢宏邱樊緼褐化
爲紳纓邑校求師再書延致斯廣川之淵源也

杜醇慶曆鄉先生王荆公宰鄞因孔子廟爲學再書

請醇爲之師慈令林肇興學亦起醇爲師

順昌嬰孺以俞爲字斯新息之慈仁也

俞偉字仲寬宰南劍順昌劍人生子多者皆不舉仲寬作戒殺子文召父老使歸勸鄉人活者以千計生子者多以俞爲小字也

孝通神明凱風終養斯康叔之純誠也

李宗質字文叔濮人文定公之裔所生母展氏權靖康之亂母子相失至江州水南遇展氏于廬中物色良是別十餘年而奉色養者二十餘年居鄞之石塘而通神明非通神明奚而得母

引裾強諫辛毗其直

陳文介公禾政和初爲正言抗疏言宦官上拂衣起禾褰挽上衣上爲少留衣裾脫落上曰碎朕衣矣內侍請口易衣上曰留之以旌直節

鈞黨挂名范滂自出

周錡范忠宣公之甥陳忠肅公同年進士娶其女弟入元祐黨籍

臨難盡節解揚之匹

吳從龍奉化人李全之變提孤軍爲前鋒馬中流矢爲賊擒賊使僞稱援絕給泰州開城門從龍至城下大呼曰馬傷被執非降賊者揚州初不破泰州可死守賊怒刃交下罵賊不絕口以死立廟官其後

石交歲寒之死不渝信義如漢脂習

李猷字嘉仲一字獻夫鄞人建炎初以婦翁沒王事自京師詣南都行在所見友人陳東少陽上書死猷爲位而哭祭曰吾欲收葬少陽有知其敗我心越一

梁寧文鈔披餘編

卷三

三七四明叢書

約園刊本

日得尸又二日得首合而斂之會其鄉人胡中行欲求護喪併以行李付之猷終肇慶府節推高閱抑崇志其墓

卻賈胡之賻持玉雪之廉父子如魏胡質

王正己字正之慶曆鄉先生說之後父勳提舉廣南市舶一錢之利皆歸有司家人不識舶貨之名及卒賈胡率錢二百萬爲賻正己固卻之曰吾父以廉直聞雖貧旅猶能負喪以歸不媿廉叔度也趙彥逾字德老帥蜀餽遺不入私家將去聚宗室在九縣者分

餉之子斂夫守袁州寶慶中真文忠公入朝上問有
何廉吏以斂夫對詔擢直祕閣與監司亦父子以廉
著者

之人也編典錄而無媿令譽焯乎日星下逮里巷則有
旌閭之楊掌庫之童若免置中林之好德

紹興間明州民楊慶以孝旌表門閭江休復雜志王
介甫爲鄞令訪義夫節婦得三人其一人可采曰童
判子爲人掌典庫其家養疏屬數口奉寡姊承順不
違其甥不事家產屢負人債輒爲償之不以告姊

深寧文鈔摭餘編

卷三

二天四明叢書
約園刊本

茵薺一時之榮華荃茅萬世之淑慝彼鍾黃之竊據郡
乘幾于曲筆

唐紀中和元年鄆賊鍾季文昭明州景德元年明州
刺史鍾季文卒其將黃晟自稱刺史郡志書季文不
書其事書晟取其墓銘不書自稱刺史非春秋懲惡
之義

先生言未旣公子起而稱曰鄭圃澤多賢衛多君子魯
東海多卿相汝潁多奇士

見列子左傳漢地理志晉周顛傳

居使然也蓋語其詳

先生曰世族蟬嫣重圭累組位槐調鼎宅揆惟五袞鉞
焜耀乎宗翰衡樞鳥奕乎該輔牙蠶畫繡差肩踵武慶曆

中王周始守鄉郡

紫艾紛綸常伯亞旅庠聲序音洋洋鄒魯習

鄉上齒長少有敘流品別涇渭公卿列韋布俎豆秩秩
章逢楚楚

大猷字仲嘉冬至元日集鄉士行禮大成殿下退序
拜明倫堂推長者祭酒自齒韋布之列

凡周之士亦世吾州之俗近古春秋二高之說詩禮曹

深寧文鈔撫餘編卷三

五十四明叢書約園刊本

鄭之詒

高憲敏公閱字抑崇著春秋集注高元之字端叔著

春秋義宗曹粹中著詩解鄭鏗字剛中著周禮解義

殊科首登于蓬萊

紹興初立博學宏詞科王璧炳文首中選入館閣

掄魁三冠于龍虎

淳熙戊戌姚穎嘉泰壬戌傅行簡嘉定甲戌袁正肅

甫

名茅膺仕多桂寶桐韓之疊矩又有文章授訣孝弟彙

聚

迂齋樓先生昉字暘叔以古文訣授諸生俞觀能象

山人著孝悌類鑑

灞山清篇武子妙句

朱翌字新仲以詩名爲中書舍人有灞山集張良臣
字武子有雪窻詩

潛虛有辨杜集有注

張漢慈谿人著辨虛見攻媿集下園字養直注少陵
集

深寧文鈔披餘編

卷三

三十四明叢書

約園刊本

家自以爲舒向人自以爲揚馬茲可以言文獻乎

公子曰媿則媿矣然世祿非不朽科舉外有學願識其
大者

先生曰故國下車喬木蒼蒼理義雨露名節風霜古之
遺直曰豐清敏排姦詆奄讜論廩廩託興荷花聞者斂
衽

豐清敏稷字相之爲御史中丞入對蔡京于殿陛間
揖稷曰今日必有高論稷正色曰行自知之與殿中
侍御史陳師錫共言京姦惡宦官寢盛稷懷唐書上

殿爲上讀仇士良傳方數行上曰已諭稷若不聞讀
畢乃止致身常伯累鎮大藩資產纔七十畝賦荷花
詩有人心正畏暑水面獨搖風蔡京見之曰此人豈
肯受我籠絡耶

慶曆師儒燕及孫曾曰樓宣獻斯文統盟有德有言既
和且清

樓宣獻鑰字大防慶曆鄉先生郁之曾孫爲給事中
上疏留彭龜年而去性寬厚好賢樂善知貢舉以文
獻之傳語眞文忠公許以致遠

深雪文鈔餘編卷三

三十四明叢書

約園刊本

泗沂絕學闢自關洛朱張呂子緒承先覺臨川一陸自
得於心若異而同爲己功深淳熙四儒探賸性淵並游
三先生之門獨契陸子之心傳

舒文靖璘元質沈端憲煥叔晦楊文元公簡敬仲袁
正肅公燮和叔子甫廣微朱文公答項平甫書曰子
思以來教人之法惟以尊德性道問學爲用力之要
子靜所說專是尊德性事而某平日所論卻是問學
上多了所以爲彼學者多持守可觀又言陸子靜楊
敬仲有爲己功夫若能窮理當甚有可觀

處則講貫以淑艾仕則善教以昌言長庚曉月惟楊暨
袁袁亦有子受業于楊進禮退義家學用光春木芑兮
高山仰止人固亡而書存世未遠而道邇顏何人哉希
之則是若魯廬江贊名德先賢沛三輔序耆舊節士後
有著者孰謂知管晏而已

隋經籍漢光武始詔南陽撰作風俗故沛三輔有著
舊節士之序魯廬江有名德先賢之贊郡國之書由
是而作

公子肅然改容離席而拜曰廣哉觀乎井甍甕蟻昭然

梁文鈔餘編

卷三

三四明叢書

約園刊本

開明乃知西河俗美以子夏北海風移由康成文藝抑
末歸根六經滌源雖本敬義明誠鄉黨之化漢學是崇
讀書尙友作聖之功闕里近只遵海而東從羣窆兮問
塗貫今古兮心同

河東爲晉問濟北爲錢塘七述余頗識鄉理故事欲
擬相如久矣年六十始克爲之跡晁子十六歲之作
汗顏滋甚筆力衰繭見聞單陋效贖不能奇也後十
年篋中得舊藁不忍棄錄而藏之山川不改風俗非
昔祇以增懷古之一概云浚儀深寧老人王伯厚父

述

詩

元至元二十七年城中握蘭橋旁民家築室穿土
得誌石一片其文乃唐開成四年太原王夫人
之墓誌謂其曾祖王元浩在玄宗時拜諫議大
夫左庶子慕巢由之志辭疾不就詩以紀事

鴻濛肇開闢變嬗幾成毀寥寥斷竹歌瓦塋剗姚姒周
典墳以族詎認青烏子公琴記咎繇邢山稱東里葛濟
失之矯璠璣過於侈焉知宮夾墓莫識龜言水銅盤字

深寧文鈔披餘編

卷三

三三

四明叢書

約園刊本

十六銘自比干始延陵有孔篆烏虜半辭止漢軛猶簡
樸石章寔華靡無愧惟有道媚俗多虛美七松諛士良
何以懲不軌載筆鮮南董襲浮謬臧否豈悟冢中人三
百年不死婦名弗出柶古未有碑誅諡見春秋初誌起
典午氏簪蒿隱士妻芳刻垂千祀楊高託不朽習之文
中理或犯葵邱禁忌國事何恥蛾眉爲黃土磨滅更誰
紀宰如此何人雒邑之女士逸民孺仲裔冰雪濯紈綺
來儷古鄞州儉勤終莫齒試問幾年頗與銅人似雖
微黃絹辭亦質而不俚邱有池又平蓬顯今塵市聚廬

寒劫灰餘光輝泥滓口德口口儔聞口萊鴻比我行松
柏下勢榮朝菌爾隆碣牛礪角翁仲臥荆杞蘭艾均一
塵玉珉同一燬孤竹夢茫然柳下蘆孰是片石幸有傳
詩以貽彤史

九里廟

城西有祠臨水渙翠松列植路如砥問之耆老此爲誰
唐大曆中吳刺史刺史爲民開陂湖故蹟猶傳堰九里
年年簫鼓報豐穰決渠爲雨潤澤美遺愛有橋名懷恩
姓名不載太史氏昔漢吳公治第一列傳寂寂名無紀

刺史豈其苗裔與明州政亦河南比堂上大書荆公詩
蘭菊春秋百世祀地誌祇稱王長官有功於民蓋一揆
吾聞是邦多賢守裴王碑字顏與李惟侯盛德著人心
彼石可焚祠弗圯廣德湖爲鴻隙陂召棠樂社誰敢毀
杭稔充羨侯之賜廟食長存如此水

補遺

東山詩

東山美周公千載逸遺音繁榮謝家安陳迹猶可尋仰
睇虞峯高俯挹娥濤深偉人不可作感慨生登臨典午
鼎岌岌日夕照忠忱談笑沮溫謀尊俎卻氏侵斯民免
爲魚清風濯黼黻撫箏疑未釋西州復霽衿紫囊皆少
年秉鉞掃氛陰茂績世茅土有孫亦璆琳祚移卯金刀
志士皆噎喑曷不效靖節種菊避幽林旣廢元嘉爵空
懷子房心鴻鳴九霄遠雉鷲嗟珍禽行藏異危遜覽古
得良箴吾遊幾入越獨欠躋崑岑晉士豈清談底柱屹
江潏翠屏倚空碧浮雲更古今永言廣武歎誰續洛生
吟

深寧文鈔餘編

補遺

一四明叢書

約園刊本

右宋王伯厚先生佚詩見明正統刻上虞志庚午冬
得此志殘本于江寧存首四卷歸道扈瀆張菊生丈
以東方圖書館廬有萬曆志殘本從乞錄副因輟贈
之去冬聞北之戰館中藏書爲倭兵爆彈所焜悉化
灰燼此志度亦不免于厄矣詩意俛美謝公與其紀
聞所云焚石勒幣敗符堅滅李勢姚泓慕容超江左

君臣之志事壯矣不可以清談議之語合明鄭真陳
朝輔清葉熊對深寧文清杜煦春種修上虞志均失
載此詩舊籍之可貴也如此海門施君韻秋任四明
叢書辭事覆刻深寧文鈔因迆書寄之記得詩顛末
于後噫今日戎狄之禍于古爲烈而上下恬嬉境土
日蹙不思所以立國之道勝敵之策第謀以夷制夷
覲以苟安何可得邪士夫聞人且復北面事虜其行
能又出抗敵苦戰之馬賊盜魁下又安能上睎泉明
高節也哉存錄斯文俾讀之者覽古監今持清議而
無詭隨意在斯乎壬申九月武昌徐恕

深寧文鈔摭餘編

補遺

一四明叢書

約園刊本

後序

深寧先生爲有宋諸大儒之殿所著書三十餘種今版行猶十四五獨傳志所稱深寧集百卷制彙四十五卷舉歸散逸無傳者海內稽古之士爲其學恨不獲誦其文況其鄉之後進乎恭閱欽定四庫全書總目著錄四明文獻集五卷皆公文也集爲前明初鄭教授眞所選各家詩文凡六十卷惟此巍然獨存其光岳精氣鬱勃於揜蝕之餘藉手鄭氏以升耀西崑壁府邪近迺有葉氏擴餘編自省郡邑各乘所載洎天一閣抱經樓諸藏

四明文獻集

後序

四明叢書
利園刊本

書冢所留遺靡弗蒐緝亦哀足三卷而鄭選底本適與並出其前詰神明惠暎桑梓耿然歷五百餘載將終啟海東儒術邪小山太守爰合二種槩之按鄭選制誥居宗或怪其雜文太藪夫南宋詔令大述作浮溪聲其始先生振其終咸所謂黃麻似六經者而先生時淪胥景象去荒朝閭位不能以寸尤賴潤色揚厲所以存德祐與文山比烈其呻呼憤踴感激萬類則興元唐詔不啻焉賊臣賈降覲然冒元史功首攬除授諸勅宋恩資如是推誠倚畀如是急而求垂泣而道如是令朽骨有知

且惡而思去其籍以之參史傳懲樵杙於百世下綱常
倫理之所以互宇宙又豈爲無預鄭卽汲汲於是而不
暇其他有說也然吾聞先生家有元季析產舊籍籍各
著先生文集如干卷彼此割裂若天吳紫鳳噫清門文
采至此安得不思藏名山副諸京師邪教授生稍晚已
析者必或存或亡不得已姑錄所存云爾天下大觀非
可一隅圖彼宜隱隱有埃矣今葉氏所拾雖叢碎而體
式較具合兩種雖於全集僅二十而一而先生涯量已
略可泝測先生承明招學派兼紹朱陸旁逮永嘉凡講

西明文獻集

後序

一

西明叢書
約園刊本

求心性抽討載籍究明古今經制治法可以佐廟謨禔
掌故者罄生平著書之蘊一見諸文故所列各首經史
理學隱現其中大而法象輿地小而名物數度無不研
極原本昌黎所謂侈之以詩書六藝之學先聖賢之德
音以成其文以輔其質非大儒孰能與於斯吾鄉自先
輩以來或偏尙陸學然親炙先生得其傳者有果齋劉
源清容其後鄭以榮陽外史集稱邇時則諸萬謝山竝
足當私淑艾流風未沫實事求是存乎其人小山與諸
君得毋有意歟昔西山眞氏卜呂成公有千載之功數

世之澤先生與成公代興者斯文功澤之遠且廣則吾鄉固不得而私之也道光己丑八月望後三日童槐謹敘

四明文獻集

後序

三

四明叢書
約園刊本

後序

宋尚書厚齋王公遺文二種一爲四明文獻集前明千
之鄭先生所輯全集久佚獨存公文五卷采入欽定四
庫全書中雲壁王君奎藏其彙一爲摭餘編先刺史公
命熊及二子培□□□摭拾藏在家塾者今屬漁山陳
君僅鐵峰張君恕排纂爲三卷維古有祭鄉先生於社
之文勿軒熊氏謂必如管幼安之在東海張子靜之在
曲江以是例諸吾鄉兼之者實惟公故熊從粉社諸君
子後建祠西郭瀛奎閣之偏祀焉工旣歲神佩濟濟會

四明文獻集 後序

一四明叢書

約園刊本

拜祠下僉曰公之楷模牖我後生也規爲節概在史傳
學業在所著書乃其文亦博極羣書賅備眾體發之以
忠孝本之以仁義如眞文忠序攻媿集云云者龍鸞麟
羽胡可弗寶熊因彙而梓之爲深寧先生文鈔凡八卷
舛纒始通警欬若接用益光我俎豆世之種學績文者
儻亦有藉於斯時道光九年歲星在己丑律中夾鍾之
月邑後學葉熊謹誌

四明叢書

四明叢書
約園刊本

四明叢書

四明叢書
約園刊本

深寧先生年譜

四明張氏約園開雕

深寧先生年譜

嘉定錢大昕曉徵編

宋寧宗嘉定十六年癸未先生生

先生姓王氏諱應麟字伯厚以是年七月二十九日
生本貫開封府祥符縣曾祖安道武經大夫保信軍
承宣使建炎初扈蹕南渡乾道開始定居於鄞祖晞
亮武經郎黃潛撰王昌世墓志云朝散大夫父攜字謙父卽以是年
登進士與余天錫同年後官至朝請大夫吏部郎中
兼國史院館編修官實錄院檢討官兼崇政殿說書

深寧先生年譜

一四州叢書

續編刊本

直祕閣贈正奉大夫

十七年甲申二歲

理宗寶慶元年乙酉三歲

二年丙戌四歲

三年丁亥五歲

紹定元年戊子六歲

二年己丑七歲

三年庚寅八歲

弟應鳳字仲儀小字苦鳳生與先生同日

四年辛卯九歲

通六經

五年壬辰十歲

六年癸巳十一歲

端平元年甲午十二歲

二年乙未十三歲

三年丙申十四歲

嘉熙元年丁酉十五歲

一年戊戌十六歲

深寧先生年譜 錢

四明叢書
約園刊本

從鄉先生吳參倚學

三年己亥十七歲

是歲余天錫參知政事屬吏部公教其子弟歲終致束脩堅卻不受曰吾二兒習詞學鄉里無完書願從公求尺牘句借周益公傳內翰番陽三洪公暨其餘習詞學者凡二十餘家所藏書余欣然應之吏部公性嚴急每授題設巍坐命坐堂下刻燭以俟少緩輒訶譴之由是先生爲文益敏捷

四年庚子十八歲

試國子監

淳祐元年辛丑十九歲

登進士時吏部公通判婺州先生侍親在婺從王塾受學得呂成公眞文忠之傳

二年壬寅二十歲

是歲史彌鞏知婺州與吏部公同事相得史公二子能之胄之皆先生同年兩家子弟相好也

三年癸卯二十一歲

調衢州西安簿無年月可攷始繫于此民以年少易視之先生

深寧先生年譜

二四明讀書記

白郡守繩以法

四年甲辰二十二歲

差監平江百萬東倉亦無年月可攷長洲宰扁其縣圃曰

茂苑先生告之曰長洲名縣始於唐武后時吳都賦所云長洲之茂苑在廣陵非此地也郡國志廣陵郡

東陽縣有長洲澤吳王濞太倉在此東陽今盱眙縣吳王濞都廣陵故枚乘說吳王曰長洲之苑服虔以

爲吳苑謂廣陵之吳也

五年乙巳二十三歲

調浙西提舉常平主管帳司亦無年月可攷部使者鄭霜異待之 是秋作廣恩崇福寺記

六年丙午二十四歲

七年丁未二十五歲

八年戊申二十六歲

九年己酉二十七歲

十年庚戌二十八歲

十一年辛亥二十九歲

是歲吏部公爲四朝史編修官撰輿服志四卷

聖元九年譜錄

四州後錄

續圖刊本

十二年壬子三十歲

寶祐元年癸丑三十一歲

丁吏部公憂年月無可攷

二年甲寅三十二歲

三年乙卯三十三歲

服除調揚州州學教授

四年丙辰三十四歲

二月以從學郎新揚州教授試博學宏詞科中選試題昭慶軍承宣使左金吾衛大將軍荆湖北路安撫

副使兼知鄂州授寧武軍節度使龍神衛四廂都指揮使夔路安撫使兼知夔州兼提領措置屯田兼控扼瀘敘昌合四州邊面加食邑食實封制周山川圖記代皇子謝賜御書孝經十六句表堯衢室銘天禧編御集序 添差浙西安撫司幹辦公事 五月集英殿策士先生充覆考檢點試卷官考第既上帝欲易第七卷寘其首先生讀畢頓首曰是卷古誼若龜鑑忠肝如鐵石臣敢爲得人賀遂寘第一及唱名乃文天祥也先生弟應鳳亦以第二甲第九人登第

深寧先生年譜

錢

五四明續書

約圖刊本

遷主管三省樞密院架閣文字

五年丁巳三十五歲

遷國子錄進武學博士上疏言人才乏而民力殫宜謹左右而防壅蔽求哲人以輔後嗣既對上問其父名曰爾父以陳善爲忠可謂繼美

六年戊午三十六歲

遷太常寺主簿 丁大全爲丞相欲致先生不可得大全諱言邊事先生入對言民力旣困而重斂非修攘計願陛下勿以宴安自逸勿以容說之言自寬由

是與大全忤臺疏論先生遂外補通判台州

此據延祐四明

志宋史謂大全罷起通判台州者非也

開慶元年己未三十七歲

弟應鳳中博學宏詞科 十月丁大全罷相賈似道爲右丞相

景定元年庚申三十八歲

召爲太常博士

無年月可攷

湯文清公爲少卿與先生

鄰牆居朝夕講道言關洛建上江西之同異永嘉制度沙隨古易蔡氏圖書經緯西蜀史學通貫精微剖

深寧先生年譜

卷八四明叢書續園刊本

析幽渺湯公曰吾聞士良廣惟伯厚乃真儒也

二年辛酉三十九歲

三年壬戌四十歲

擢祕書郎俄兼沂靖惠王府教授

無年月可攷

四年癸亥四十一歲

五年甲子四十二歲

是年七月彗星見應詔極論時事 遷著作佐郎

十月度宗卽位攝禮部郎官掌丞相箋表故事嗣君御殿丞相上四表卽允忽奉旨增撰三表先生操筆

立就丞相護山陵畢復令作辭表三通吏拱立以俟
先生從容授之丞相大驚異兼宗政殿說書

度宗咸淳元年乙丑四十三歲

正月以著作佐郎暫攝學士院事尋遷著作郎守軍
器少監閏五月遷將作監兼禮部郎官權直學士
院

二年丙寅四十四歲

在學士院

三年丁卯四十五歲

深寧先生年譜錄

七四明嚴書
約園刊本

經筵值人日雪因奏春雪過多民生飢寒遷將作

監兼侍立修注官十月遷祕書少監兼侍講十

一月遷起居舍人兼權中書舍人書行吏右禮工房

是歲子昌世生

四年戊辰四十六歲

九月庚申雷先生言命令不專姦妄竝進卑踰尊外
凌內之象又言守成必法祖宗御治必總威福賈似
道大惡之

五年己巳四十七歲

以祕閣修撰主管建康府崇禧觀

真逸閣記云子王子自柱下史免歸

爲句曲山祠官夏日憩北窗夢游其處

六年庚午四十八歲

以朝奉大夫祕閣修撰知徽州刻羅端良爾雅翼於郡齋爲文序之

七年辛未四十九歲

七月召爲祕書監兼權中書舍人力辭不許 十月供職書行吏左戶房兼國史院編修官實錄院檢討官兼侍講 十一月遷起居郎仍兼權中書舍人

深寧先生年譜

入四明叢書約園刊本

八年壬申五十歲

在西省 兼權吏部侍郎 丁母憂

九年癸酉五十一歲

撰周易鄭注成序云癸酉季夏哉生明汲古堂書埋宗嘗賜吏部汲古傳忠四字故以名其堂也

十年甲戌五十二歲

是歲七月瀛國公卽位

恭帝德祐元年乙亥五十三歲

三月除中書舍人兼直學士院四月入院兼掌外制

書行吏左戶兵刑房兼同修國史實錄院同修撰兼侍讀 六月庚子朔日食應詔言答天戒五事陳備禦十策 七月除禮部侍郎仍兼中書舍人兼書行吏右 十月奏請立濟王後加封錫諡從之遣先生致祭 十一月除禮部尚書兼給事中辭西省兼職 江陵帥朱禕孫江西帥黃萬石皆北降丞相留夢炎猶除拜二人官上疏駁之併論夢炎疏入不報卽引歸 十二月遣中使以翰林學士召辭不赴 是歲弟應鳳以文天祥薦召爲太常博士甫入國門而

深雪先生年譜

九四明叢書

射圃刊本

卒

二年丙子五十四歲

是歲宋亡先生杜門不出朝夕坐堂上取經史諸書講解論辯子昌世甫十歲聽受無倦

元世祖至元十四年丁丑五十五歲

十五年戊寅五十六歲

十六年己卯五十七歲

十七年庚辰五十八歲

八月通鑑地理通釋成

十八年辛巳五十九歲

五月漢制攷成

十九年壬午六十歲

作四明七觀

二十年癸未六十一歲

二十一年甲申六十二歲

二十二年乙酉六十三歲

二月夢前宰輔

謂陳直中也

以太學所上書求作跋語牘

而識之

深寧先生年譜

十四明跋書

約園刊本

二十三年丙戌六十四歲

正月序踐祚篇集解

二十四年丁亥六十五歲

同邑袁韶遣其子桷受業

二十五年戊子六十六歲

二十六年己丑六十七歲

二十七年庚寅六十八歲

城中握蘭橋旁民家穿土得誌石乃唐開成四年太原王夫人之墓文稱曾祖王元涪在玄宗時拜諫議

大夫左庶子慕巢由之志辭疾不就因作詩紀之

二十八年辛卯六十九歲

是冬廉訪副使陳祥分治慶元路慕先生名德造廬式之

二十九年壬辰七十歲

三月作慈湖書院記 八月作奉化重修縣治記

九月作慶元路學重建大成殿記及醫學記

三十年癸巳七十一歲

八月作鄞縣重修學記 作義田莊先賢祠記

深寧先生年譜

十四明叢書

剡園刊本

三十一年甲午七十二歲

成宗元貞元年乙未七十三歲

二年丙申七十四歲

是春作九先生祠堂記 六月卒先期自爲墓志其

銘曰其仕其止如偃如圖論者謂先生風節不媿致光表聖而文章學問則遠過之先生在宋時官至朝

請大夫鄞縣開國伯夫人鄭氏李氏贈碩人舒氏封碩人子昌世字昭甫以父恩補承務郎未及祿而宋

亡入元不仕孫二人厚孫寧孫

寧孫字叔達白鹿書院山長

厚孫

子三人

陸同麟

寧孫無子

以兄子陸爲後
四世中傳見崇陽外史集

先生有

深寧先生年譜

錢

十一

四明叢書
約園刊本

深寧先生年譜



王深寧先生小像

四明叢書

約園刊本

像贊

童槐
粵君

四明儒宗曰惟先生彝訓丕闡性道克明學海文府竝
彪英聲天水末造措危拄傾龜鑑鐵石孚是精誠大號
風渙高詞天晶鍾石遷變藻黼蔚榮峨峨簪笏千古宋
廷遺容有睟後來其刑唐之表聖漢之康成

王深寧先生年譜

陳 僅餘山輯

張 恕賈一編

宋寧宗嘉定十六年癸未先生生

先生姓王氏諱應麟字伯厚又字厚齋行廿二以是

年七月二十九日寅時生弟應鳳生與先生同日應

鳳字仲儀又字默齋小字若鳳宋史儒林本傳應麟與弟應鳳同日生玄

簡錄道學本傳父搆同日雙生二子曰應麟應鳳僅按嘉定癸未七月庚午日先生與弟應鳳同日生見

先生自作墓誌及先生子昌世所作壙記百詩閻氏以為生於嘉定十四年辛巳誤竹汀錢先生年譜謂

王深寧先生年譜

陳 約園刊本

應鳳後先生八年生與先生同日更誤本貫開封府祥符縣曾祖安道

字時中武經大夫保信軍承宣使建炎初扈蹕南渡

乾道間始定居於鄞僅按嘉靖寧波府志鄞縣治南一里宋尚書王應麟所居至今

稱王家府謝山全氏湖語注深寧先生封鄞縣伯故所居亦稱錦里今考先生故居在城西南廂鄞縣學

前白鶴廟之東廟相傳為先生書堂遺址即所謂汲古堂書庫也王家府綿里名皆不傳祖晞亮

字寅仲武經郎僅按黃潛撰王昌世墓誌云朝散大夫又按高斯得撰先生父王搆墓誌

銘云大父安道建炎渡江從名數於四明官至武經大夫保信軍承宣使轉利州觀察使父晞亮武經郎

贈朝散大夫父搆字謙父即以是年登進士僅按蔣與余重珍榜

天錫同年後官至朝請大夫吏部郎中兼國史院編

修官寶錄院檢討官兼崇政殿說書直祕閣贈正奉

大夫

十七年甲申二歲

理宗寶慶元年乙酉三歲

二年丙戌四歲

侍吏部公於安吉

三年丁亥五歲

紹定元年戊子六歲

二年己丑七歲

三深寧先生年譜

陳

二四明叢書

約園刊本

三年庚寅八歲

四年辛卯九歲

通六經

五年壬辰十歲

六年癸巳十一歲

侍吏部公於臨安

端平元年甲午十二歲

二年乙未十三歲

三年丙申十四歲

嘉熙元年丁酉十五歲

二年戊戌十六歲

從鄉先生吳參倚學

三年己亥十七歲

吏部公遷國子正先生隨侍入朝是歲余天錫參知政事屬吏部公教其子弟歲終致束脩堅卻不受曰吾二兒習詞學鄉里無完書願從公求尺牘往借周益公傅內翰番陽三洪公暨其餘習詞學者二十餘家所藏書余欣然應之吏部公性嚴急每授題設巍

王深寧先生譜

陳

三四明藏書

約園刊本

座命坐堂下刻燭以俟少緩輒呵譴之由是先生文

益敏捷

僅按吏部爲樓迂齋高弟始忤史彌遠繼忤丁大全位終不達文章氣節推重一時先生之淵源家學蔚爲大儒有自來矣

四年庚子十八歲

是年八月試國子監中選試題安人天民之福賦整翮當雲霄詩下逮莊騷太史所錄論策問蜀帥北使次問士氣末問教胄子

淳祐元年辛丑十九歲

是年二月別院省試奏名試題口道德賦當春乃發

生詩統紀法度如何口口論策問科舉次問道學末
問理刑 四月御史臺覆試試題人君之道無私論
五月廷試乙科賜進士及第僅按徐儼夫榜親策問正學
吏治邊防邦計耕屯荒政六事太祖肇基高宗中興
規模 六月聞喜宴賜御製詩涼菲膺圖屢改元貞
興六詔口臨軒勵精思振清明政策秀欣求口敬口
口主莫如仁與義立身休計飽和溫時艱全藉賢經
濟勉力應無負選掄 七月侍吏部公通判婺州在
婺從王楚受學得呂成公真文忠之傳是歲史彌鞏

王深寧先生年譜

四四明叢書

約園刊本

知婺州與吏部公同事相得史公二子能之胄之皆
先生同年兩家子弟相好也

壬寅二十歲

授迪功郎衢州西安縣主簿民以年少易之先生白
郡守繩以法諸校欲爲亂縣令倉惶無措先生以理
諭服之

三年癸卯二十一歲

四年甲辰二十二歲

五年乙巳二十三歲

侍吏部公入朝

是秋作廣恩崇福寺記

宋史本傳云應麟登

第言曰今之事舉子業者沽名譽得則一切委棄制度典故漫不省非國家所望於通儒於是閉門發憤蓄以博學宏詞科自見假館閣書讀之至正直記云四明王厚齋尙書博學每以小冊納袖中入祕府凡見典籍異文則筆錄之復藏袖中而出僅按先生自登第至試詞科在朝之日甚淺其假館閣書未知當在何時附記於此以見先生學問之本原云

六年丙午二十四歲

是年十月赴西安

七年丁未二十五歲

八年戊申二十六歲

王深齋先生年譜

五十四明歲書

約園刊本

十月差監戶部平江府百萬東倉

是年長子良學

生字茂章

九年己酉二十七歲

是年三月陞從事郎

十年庚戌二十八歲

十一年辛亥二十九歲

是年吏部公爲四朝史編修官撰輿服志四卷 弟

應鳳以蔭補將仕郎

代吏部公作謝賜御書竹林

汲古傳忠六字表

十二年壬子三十歲

是年四月差浙西提舉常平茶鹽司主管帳司部使者鄭霖異待之 七月考試臨安 十二月丁吏部

公憂

僅按擴記云淳祐十二年差浙西提舉常平茶鹽司主管帳司是歲丁吏部公憂寶祐三年服闋

差揚州州學教授按吏部公以十二月三日卒年六十九錢譜謂卒於寶祐元年癸丑十二月則乙卯十二月方再期不得除服赴差揚州當以擴記爲定

寶祐元年癸丑三十一歲

二年甲寅三十二歲

三年乙卯三十三歲

王深寧先生年譜

六四明叢書

約園刊本

是年二月服闋

三月差揚州學教授

僅按先生詩宏詞繫銜云

從事郎新揚州州學教授若三月差授至明年二月歷時已久似不得稱新豈差命雖下而以試事實未及赴任故仍從初銜之例歟附疑俟考

四年丙辰三十四歲

是年二月試博學宏詞科中選試題昭慶軍承宣使

左金吾衛大將軍荆湖北路安撫副使兼知鄂州授

寧武軍節度使龍神衛四廂都指揮使夔路安撫使

兼知夔州兼提領措置屯田兼控扼瀘敘昌合四州

邊面加食邑食實封制周山川圖記代皇子謝賜御

書孝經十六句表堯衢室銘天禧編御集序漢華平
頌 三月有旨聽擢 四月添差浙西安撫司幹辦
公事 五月集英殿策進士宣入殿廬充覆考檢點
試卷官考第既上帝欲易第七卷置其首先先生讀畢
頓首曰是卷古誼若龜鑑忠肝如鐵石臣敢爲得人
賀帝喜遂實第一及唱名乃文天祥也先生弟應鳳
亦以第二甲第九人登第

五年丁巳三十五歲

主管三省樞密院架閣文字 七月除國子錄制朕

王深寧先生年譜

七十四卷書

新刊本

欲以理義淑人心以教法新士習師儒之官其誰宜
僉曰爾文杓篤實無華疊洗其質也爾用存修潔有
守金玉其相也爾似道識度老成斂實而秋也爾應
麟才思汗瀾斂華而春也儀于周行聲聞籍甚是用
進文杓於東博升用存於經博擢似道於武博應麟
則常成均之法以飭之夫業精於勤荒於嬉行成於
思毀於隨此晨入之誨也爾豈遜於愈者哉朕將有
考於斯可 十月改宣教郎依舊職

六年戊午三十六歲

是年六月除武學博士制朕新美多士遴擇庶官文武之教雖殊而所以教則一以爾得吉譽然其文淵乎其道其陞師屬以迪胄子爾耕學茂而醇辭麗而則其口博通以淑生徒爾應麟見聞殫洽才思齋然其範韜鈴之士爾口璞年耆德明氣和守正其舉糾繩之政夫古之學者必時春夏教禮樂秋冬教詩書而干戈羽籥之容亦在所必講爾其惟勤惟思往以身率使正音鏘訇於金石則在泚之莪菁矣 上疏言人才乏而民力殫宜謹左右而防壅蔽求哲人以

王深寧先生年譜

八四明叢書

約園刊本

輔後嗣既對上問其父名曰爾父以陳善爲忠可謂繼美

開慶元年己未三十七歲

是年正月爲禮部點檢試卷官 二月除太常寺主

簿制奉常□□□□陳殷置輔隸其間非才識兼

茂聞望素高者不異也爾應麟博聞而強識積學而多文固嘗以異科顯矣由右序而稽秩宗榮進豈易量哉聲教四達文治勃興非國家盛事歟尙其勉之毋但曰供簿正而已矣則朕以擇 三月出院 五

月輪對後殿時丁大全爲丞相欲致先生不可得大全諱言邊事先生入對言軍功未集而吝賞民力旣困而重斂非修攘計願陛下勿以宴安自逸勿以容悅之言自寬上以邊事爲憂先生言無事深憂願汲汲豫防毋爲壅蔽所欺由是益與大全忤是日卽以臺諫疏論罷 十月丁大全罷買似道爲右丞相

弟應鳳中博學宏詞科

景定元年庚申三十八歲

是年九月轉奉議郎添差通判台州

王深寧先生年譜

九

四明叢書
約園刊本

二年辛酉三十九歲

三年壬戌四十歲

是年八月赴台州僅按家乘云是歲長子良學登第而擴記未言浙江通志選舉六是

年方山京榜亦無良學名凡家乘中如此類皆不足徵信今盡削之

四年癸亥四十一歲

是年二月轉承議郎 五月除行太常博士制奉常

漢樂官也博士皆以專經選今惟禮樂是司視成均尤重且率爲緊官要職之儲爾以詞學進身文譽滋著亦旣任師儒之責矣明禋秩典召而歸之講明圭

幣之文品齊俎豆之事往殫爾職嗣聽異除文字官
非爾誰屬 七月供職 九月祀明堂爲前導官

五年甲子四十二歲

是年除行祕書郎制郎於祕府職亞南宮非得名流

曷稱口口爾應麟見聞殫洽學殖淵源嘗登詞翰之
科則宜游宏達之林矣雍容册府蓋將養資望培器
業以大其所成就也賦三都奏二漢無取焉勉爾猷
爲對予寵渥 七月彗星見詔求直言先生率同舍

五人扣閣上書極論執政侍從臺諫之罪積私財行

王深寧先生年譜

陳

十四明叢書

約園刊本

公田之害又勸帝受直言以應天變 八月輪對延

和殿有旨繳進是月兼沂靖惠王府教授 九月赴

講堂講禮記 十月度宗卽位三日請聽政有旨兼

攝禮部郎草百官表故事嗣君御殿丞相四上表卽

允忽奉旨增撰三表先生操筆立就丞相護山陵畢

復令作辭表三通吏拱立以俟先生從容授之丞相

大驚異 十二月除行祕書著作佐郎制書省有位

非元元本本殫見洽聞者不得與於斯文也爾應麟

精筆妙墨蚤擢詞科記事竊言見謂博識文采炳蔚

學殖深長讀中祕書既遊於東觀攝名表印嘗草
奏於南宮序遷史筵益觀口筆緬懷元豐更官初皇
祖大訓以爲非蘇軾不可茲豈直取人於詞藝間哉
尙企前修益培遠業倣按擴記遷著作佐
即在度宗登極前登極恩
轉朝奉郎日制生民立君故尊居於大寶惟辟作福斯
溥錫於湛恩茲予一人踐阼之初是人臣委質之始
粵從京秩遞進華階臣事君以忠宜勤厥職官量能
而授嗣選爾勞

度宗咸淳元年乙丑四十三歲

王深寧先生年譜

十一四明叢書

約圖刊本

是年正月直學士院馬廷鸞知貢舉有旨攝直學士

院 三月兼權禮部郎官 四月考太學補試 閏

五月兼翰林權直學士院崇政殿說書 六月經筵

進講周易讀稽古錄 七月除著作郎日制昔神宗謂

著作郎非蘇軾不可聖眷厚矣然軾未嘗一日安其

位其爲名表郎爲翰林學士則皆元祐初年也爾種

學績文遂登朝列今由少著升大著且一日盡踐軾

所居官望爾厚矣其益以軾之文章節義自勉以稱

予意 十一月賜緋魚袋 是年次子昌世生爲四

月廿三日辰時

僅按據黃潛墓誌當生於咸淳三年丁卯卒年六十一與家乘異

湯文清公爲太常少卿與先生鄰牆居朝夕講道言

關洛濂閩江西之同異永嘉制度沙隨古易蔡氏圖

書經緯西蜀史學通貫精微剖析幽眇湯公曰吾聞

士良廣惟伯厚乃真儒也

僅按宋史湯漢字伯紀安仁人官至端明殿學士卒

諡文清其除太常少卿在度宗登極後錢譜附於景定四年寧波府志亦云應麟爲太常博士湯漢爲少卿比屋而居皆失之不考今訂正

二年丙寅四十四歲

是年正月除守軍器少監

制曰

朕妙揀臣工分典戎器

王深寧先生年譜

陳

十二

四明叢書

約園刊本

以詞臣領率循神考之規繇望郎進有若阜陵之睠

爾精探力索殫見洽聞承明著作之庭稽古禮文之

事大易辨問之學兩漢制誥之風爲邦之光咨爾大

雅口國家明政必閒暇之時而器械精能須文學之

士已若茲監以修我戎其課參軍而升倬直忠信爲

甲冑可殫武庫之材文章瑞朝廷尙懋儒林之業

經筵值人日雪因奏春雪過多民生飢寒

僅按錢譜在丁卯今

依宋史

是月陞兼學士院權直 三月援淳熙詞

臣倪思故事乞免兼禮部郎官有旨依所乞免兼

九月轉朝散郎除將作監

制曰

梓慶之論靜心者能爲

輪扁之言讀書者有取欲觀聖人之作疇若匠氏之

功以爾振發純英滋漸名訓更日番入時則賴以質

疑三年弗言時則資之作命往服乃事以修我戎甫

茲視朔宜爾陟序朕奉苑囿無所資益雉監遂號於

簡清若室家惟其塗茨鴻業正思於潤色靡有虛張

之繕可以大肆於文直中繩曲中規爾尙助予而勸

學材有美工有巧朕方用汝以爲良若時超遷嗣有

殊渥 輪對言人君防未萌之欲存不已之誠 十

王深寧先生年譜

陳

十三

四明叢書

約園刊本

二月先生叔父宗正少卿拯卒

拯字正甫

三年丁卯四十五歲

是年正月郊祀爲禮部郎奏解嚴皇太后受冊禮爲

太常博士前導冊寶 二月賈似道拜平章軍國重

事似道聞先生經筵奏語深忌之

事見宋史本傳

然素重先

生語包恢諷先生令少自貶先生笑曰迕相之患小

負君之罪大 三月兼侍立修注官陞權直學士院

八月輪對

僅按四字見家乘意當日必有嘉謨今不可攷矣

十月雷先

生奏十月之雷惟東漢數見命令不專姦竇竝進卑

踰尊外陵內之象又言守成必法祖宗御治必總威
福賈似道益惡之備按宋史本傳冬雷
事在遷起居舍人後是月除試

祕書少監制我國治合古則燭興景化五星聚奎之

歲兆於文明上帝羣玉之府處以儒素爾學醇而富

詞麗以則講論經理諸老生未能言藻繪上命古訓

詰無以過今其命爾貳我書省節我王度少蓬乃從

臣之選中禁非它司之比所典領者重對時嘉遇尙

克丕欽 陞兼侍講制朕惟我高宗紹開中興垂精

典學爰命臣震貳中祕監執經講幄緝熙光明之盛

王深寧先生年譜

十四 四明叢書

約園刊本

垂法萬世朕甚慕焉以爾博綜百氏之籍自成一家

之文代言鼇禁以潤色皇猷載筆螭坳以謹書國典

雍咨金華之晚席發揮聖人之微言朕日聞仁義之

陳原幾三益之友是用一日二席陞侍細旃爾其飽

觀天祿石渠之藏敷暢義文周孔之祕俾朕迪我高

后之德爾亦與有無窮之聞 上疏論市舶不報

十一月進講毛詩禮記除中起居舍人兼權中書舍

人書行吏右禮工房制朕觀一陽之來復登羣獻以

同升君舉必書古有太史友王言作命今爲三舍人

爾博學精通靖其正直講昭素之易見遇於乾龍類
臣珪之文可追於西漢伊昔書洪範三德上端拱一
箴介於兩省之聯萃乃一家之懿成爾顯德配前文
人是用擢真右螭兼典西掖事書之策予將廬乎樞
機情見乎辭亦尚思乎潤色庶幾起居號令之重常
如準繩規矩之陳則罔所愆亦克用勸 經筵進讀

孝宗賢訓終篇轉朝請郎

制曰

歷代寶爲訓於皇烈祖

之謨三王惟其師允賴儒臣之益爰肆開於經幄用
祇若於先猷亦旣徹篇可後褒典爾學博而有守文

王深寧先生年譜

十五

四明叢書

約園刊本

瞻而不浮談經得聖人之微摘辭鼓天下之動瓊然
細氈之講誦秩若成憲之昭明予欲率由舊章爾惟
訓於朕志進升華序將大多聞治願力行敢替詒謀

之德學無止法尙蘆藥石之忠

僅按家乘載經筵進讀孝宗寶訓終篇轉

朝散郎制曰云云在三月陞樞直學士院下與壙記不合且丙寅九月已載轉朝散郎不宜復出今定爲朝請郎之誤依壙記移正惟先生旣轉是階而庚午慶元府學大成殿記仍繫朝散郎舊資殊不可解豈壙記亦有誤歟附疑俟考

十二月以柱史故事牒闕門直前奏

對言用人莫先察君子小人當國者疑之方袖疏侍
班後殿臺疏遽上御筆除職與祠由是二史直前之

制遂廢

四年戊辰四十六歲

是年除祕閣修撰主管建康府崇禧觀日口口口口

口口口口口口賢者出處之際胡遽浩然深慊予衷

用全體貌爾性行端謹問學淹該緝熙光明有類執

經之益討論潤色無非宜誥之文甫修立坳乃懷居

里是用寵以書林譔次之職供以祠館恬養之真載

思丹地之代言於斯爲稱毋口碧山之不負行矣造

歸真逸閣記云王子自柱下史免歸爲九月先

句曲山洞官夏日憩北窗夢遊其處

王深寧先生年譜 六十四明叢書

生弟應鳳卒於臨安

僅按家乘是歲九月二十二日公弟應鳳卒於臨安府北關門

葬同魯下安山壽四十六按陳合撰公母陳太碩入

墓誌銘爲咸淳九年云子二應鳳官至朝奉郎太常

博士先五年卒據此則家乘所載爲信又按應鳳歷

官軍器監丞以兄嫌改差淮西制置使參議官以文

天祥薦除太常博士甫入國門而卒著有默齋

稿及訂正三輔黃圖漢郡縣山川風俗記諸書

五年己巳四十七歲

是年十二月依舊職差知徽州錢譜云以朝奉大夫

慶元府學重建大成殿記後繫銜朝散郎祕閣同修

撰知徽州軍州事兼管內勸農營田事節制軍馬云

云錢譜以父諱近州名辭免不允六年并誤

六年庚午四十八歲

是年三月上任吏部公嘗守是郡民稱清白太守先生始至父老慶曰此吾清白太守子也在郡遵節用愛人之訓例所不取者悉以予民曰絹曰折帛錢皆蠲一分先期代納曰布麥錢曰下戶鹽隨衣折斛錢曰坊場錢銀皆爲民代輸又減權酤曰額免折帛茶租月椿舊欠除免糧錢增活人倉田又以十二萬楮爲平糶本有水旱則以告糶始至郡時帑纔八萬去之日凡二十七萬 八月作慶元府學重建大成殿記 轉朝奉大夫 刻羅端良爾雅翼於郡齋爲文

王深寧先生年譜

陳

七四明叢書

約園刊本

序之

七年辛未四十九歲

是年七月除祕書監兼權中書舍人

制

內史掌王命

外史掌書志□□□也迺今合一命而畀一儒選顧

不重矣乎以爾學廣聞多筆精墨妙書林詞掖昔嘗

從事於斯矣頃守新安亦旣朞月治狀云最迭入爲

宜茲命領頭大雅之羣仍兼代言之職以蟠胸之典

籍爲近古之訓辭顧不美歟 再辭不允有旨候代

十月轉朝散大夫解郡組造朝供職書行吏右禮

刑房兼國史院編修實錄院檢討官兼侍講

制曰王人

求多聞惟學遜志羣臣示顯行佛時仔肩茲以爾汲古用功績文覃思太守與我共理歌乃袴襦大雅於茲爲羣職是□□□□儀鴻之吉宜侍清燕之閒惟大學知修齊治平之方而□□著古今得失之迹資爾敷繹迪朕就將世南五絕之稱識其□□祖禹三昧之譽企其齊而進講禮記大學讀九朝通略通鑑綱目十一月除起居郎仍權中書舍人兼權吏部侍郎

制曰

書動有史莫重於左坳貳職守曹莫劇於

王深寧先生年譜

陳 十八四明叢書

約園刊本

右選其貳厥事取諸其能爾節勁氣齎學醇才粹東壁圖書之府領袖儒流中舍冊奏之工黼藻王度望字已久明陟爲宜迺升侍極之華仍攝廷臣之要倚相能讀墳典可知紀錄之公王劇可掌鈐衡蓋取品□之審往欽乃職毋遜前聞上疏極言邊事經筵指陳成敗事機似道復謀逐之

八年壬申五十歲

是年三月進講禮記徹章賜祕書省御史御製詩天高地下禮由分聖哲于焉重糾紛心法操存無不敬

治功顯設在斯文會通自可濟明盛品節因知在儉
勤游夏講磨資眾彥精微盡處是尊聞 轉朝請大
夫制禮說莊敬恭儉具存載籍之間學有緝熙光明
允賴羣儒之助屆時竟帙懋賞有彝爾業履粹□文
章蔚瞻螭坳載筆仍參讞約之司虎觀談經口有切
磨之益乃若漢儒之禮記無非孔氏之格言三百三
千儀文悉備多聞多見考論無遺雖明道未嘗計功
然用德所以彰善特頒褒頌爰進文階大夫執圭取
彼春朝秋請之義從臣第頌弘我上嘉下樂之規

王深寧先生年譜

陳

十九四明叢書

續編刊本

七月書行吏左戶房

九月祀明堂攝左相進玉幣

爵 是月丁母太碩人憂

僅按陳太碩人以九月丁丑日卒年八十一見陳合

所撰墓誌銘

九年癸酉五十一歲

是年六月撰周易鄭注成序云癸酉季夏哉生明汲

古堂書理宗嘗賜吏部公飛白汲古傳忠四字以顏

其堂故因以名之

僅按袁梅困學紀聞序云先生年未五十諸經皆有說晚歲悉焚棄

而獨成是書蓋先生著述在七
百餘卷外者正不知凡幾也

十年甲戌五十二歲

是年七月瀛國公卽位 十二月服闋

恭帝德祐元年乙亥五十三歲

是年三月眞除中書舍人兼直學士院

制曰彩筆代言

地莫重於修省玉堂揮翰職尤重於北門妙選一儒
俾當兩制朝請大夫王應麟若古吉士爲今聞人蘊
藉宏深富諸子百家之學文章爾雅有三代兩漢之
風頃嘗典於絲綸見謂工於黼黻矧當事機控僣之
會茲乃詞命填委之時惟詰可以回迷民惟詔可以
戢悍卒惟立馬一揮之制各得其體惟狡兔三穴之

王深寧先生年譜

二十四明叢書

約園刊本

語切中其機茲惟汝能不匿厥指昔在元祐軾以紫
薇而掌禁林粵若建炎藻以掖垣而兼翰苑罔俾專
美其昌斯文 二月賈似道潰師江上 有旨令慶

元守臣勉諭赴闕 賈似道有罪免 四月造朝供

職內典奏對暫權給事中吏部尙書兼掌外制書行

吏左戶兵刑房 是月正謝賜紫金魚袋兼同修國

史實錄院同修撰兼侍讀

制曰

朕監於成憲惟數學積

厥躬佛時仔肩以光明示我德妙柬多聞之彥俾居

勸誦之班朝請大夫試中書舍人兼直學士院新兼

同修國史實錄同修撰賜紫金魚袋王應麟高明而
沈潛閎通而博雅造詣得儒先之奧游夏淵源文章
爲時人之宗卿雲河漢豈惟言語妙天下方將仁義
陳王朝爰躋進讀之聯庶幾納誨之助昔蘇軾之在
西掖嘗侍邇英而德秀之入翰林亦兼經幄此乃我
朝崇儒之意而況新政訪落之初懋乃嘉猷光乃前
哲正心誠意之說朕所欲聞陳善責難之恭爾其素
講殫爾忠盡輔我緝熙

疏陳十事

急征討明政刑
厲廉恥通下情

求將材練軍實備糧餉
舉實才擇牧守防海道

且請集諸路勤王之師厚賞

王深寧先生年譜

三五四明叢書

約園刊本

以作氣惟能戰斯可守時不能用 是月之初作廣

平書院記 六月庚子朔日食應詔言答天戒五事

陳備禦十策時國事日壞史院無人先生獨掌編制

從容應當忠義之心溢於言表 進讀三朝寶訓

七月除試尙書禮部侍郎兼中書舍人兼書行吏右

制朕宏濟時艱旁求淑正夷典朕禮所以立天下之

經說代子言所以見王者之志於昭竝命允謂得人

朝請大夫試中書舍人兼直學士院兼同修國史實

錄院同修撰兼侍讀賜紫金魚袋王應麟肅括而宏

深高明而篤實銅川之傳遠矣厥有淵源鐵筆之操
凜然不淆涇渭屬更大化服在邇聯其文字可獨行
於中朝其論奏可昭示於當世以崇禮勁節竝濯偃
月之姦以滿藻偉詞潤色中天之業口疇時望進貳
春卿俾綸掖之兼行示囊班之增重粵若穆陵之初
政惟時建水之名儒未及分六省之書已擢真少常
之列迺今併錫視昔有加疊五組其輝扶若餘刃之
恢拓噫禮信之士則被廬伸蒐討之威赦令之孚則

山東與忠憤之感體予至意懋爾遠缺

兼給事中黃
鑑行時西掖

王澤霖先生年譜

陳

三

四明叢書

荆園刊本

獨員送給
舍行詞

辭免不允

制

朕當國事多艱之時命卿

貳春官掌西掖豈緩於武而急於文哉昔人謂班朝
治軍非禮威嚴不行詔書之下能令武夫悍卒感泣
文事必有武備豈不信然卿文行粹明論奏剴切足
以折姦朋之鋒植善類之幟卿其爲朕辨上下之分
以肅軍容敷心腹之告以作士氣渙號已敷需章爲

贅所辭宜不允

兼給事中黃鑑撰時翰
苑獨員送給舍草詔

八月正謝

賜金帶

九月祀明堂以禮部侍郎眡滌濯九成加

恩封鄞縣開國伯食邑九

僅按先生自作墓誌及擴
記皆云九百戶家乘作五

百字百戶日嗟臣工而助祭清廟所以頌於周崇禮

官而考文明堂所以圖於漢若稽古誼肇舉宗禮維

時持橐之英相我越紉之事肆均駿惠式協慶餘朝

請大夫試尙書禮部侍郎兼中書舍人兼直學士院

兼同修國史實錄院同修撰兼侍讀賜紫金魚袋王

應麟心正而氣和學博而識茂欽予時命皆疊典詔

之文咨汝秩宗非屑玉帛之末屬甲辛之饗報於先

甲以思恭發帝之制則爾潤色於皇猷酌時之宜則

爾討論於玉律於昭穆穆皇皇之祀爰賴元元本本

王深盤先生年譜

陳

三四明徵書

約園刊本

之儒矧侍祠而肅然咸秉聰而對越神人歡洽祉福

函蒙於邑始封惟祭有濯伯之食四一茲循六典之

禮之儀三千其懋中庸之學 十月奏請立濟王

後加封錫謚從之遣先生致祭 除兼禮部尙書辭

免不允日周官有宗伯大小之職大禮則小佐大之

事小禮則大如小之儀大者倡而小者隨大者專而

小者貳也卿博學之識貫穿九流渾灑之文斧藻兩

制言論雖歸於忠厚封駁不避於權豪爰陟貳卿禮

典具備俾攝常伯民譽必隆周官大小之職悉以付

卿昔叔孫不憚□□之難虞廷不聽秩官之遜亟其
祇受奚以辭爲所辭宜不允 除禮部尙書兼給事

中辭免不允日制朕未有識知博采羣英孰司禮如珪

之賢負台斗望孰批勅如藩之正號宰相材以卿學

質而文華行端而履潔在詞垣則封駁有直氣居從

列則獻納多嘉謀是用酌之僉言賁以二命能貳秩

宗必能長寅清之職能還誥命必能專封駁之長鎮

之執五詔如初軾之陳六事有益佇聞忠告何媿前

修矧國家艱難之時非臣子辭遜之日亟祇成渙毋

王深寧先生年譜

陳

壬酉四明叢書

約園刊本

事冲謙所辭宜不允兼樞中書舍人方應發撰時
翰苑獨員並送西掖草詔

辭兼中書舍人從之 兼攝吏部尙書 十一月丞

相留夢炎用徐囊爲御史時江陵帥朱禕孫江西帥

黃萬石皆北降夢炎猶除拜二人官繳奏上疏駁之

並糾夢炎再疏不報出關俟命疏入又不報即引歸

僅按此條參取家乘錢譜及梟堂
李氏甬上耆舊詩傳與宋史稍異 十二月詔中使

譚純德以翰林學士宣召再辭免

二月丙子五十四歲

是年宋亡先生杜門不出所著述只書甲子朝夕坐

掌上取通史諸書講解論辨于昌世年甫十二僅按黃滔

嘉誌云甫十歲聽受無倦

元世祖至元十四年丁丑五十五歲

十五年戊寅五十六歲

十六年己卯五十七歲

十七年庚辰五十八歲

八月通鑑地理通釋成 是歲長子良學卒年三十

三

十八年辛巳五十九歲

王深遠先生年譜

五十四明叢書

約園刊本

五月漢制考成

十九年壬午六十歲

是年作四明七觀

二十年癸未六十一歲

二十一年甲申六十二歲

二十二年乙酉六十三歲

二月夢前宰輔謂陳宜中以太學所上書求作跋語寤而

識之

二十三年丙戌六十四歲

正月序踐阼篇集解

二十四年丁亥六十五歲

是年同邑袁洪遣其子桷受業

僅按桷樞密贈越公詔曾孫建康通判供

子鑑譜直云紹
遺其子洪舛甚

二十五年戊子六十六歲

二十六年己丑六十七歲

二十七年庚寅六十八歲

城中握蘭橋旁民家穿土得誌石乃唐開成四年太

原王夫人之墓文稱曾祖王元浩在玄宗時拜諫議

王深澤先生年譜

天四明叢書
影刻本

大夫左庶子慕巢由之志辭疾不就因作詩紀之

作奉化社稷壇記

二十八辛卯六十九歲

是冬肅政廉訪副使陳祥分治慶元路慕先生名德

造廬式之

二十九壬辰七十歲

三月作慈湖書院記 八月作奉化重修縣治記

九月作慶元路建醫學記 十月作慶元路重建儒

學記 僅按錢譜云九月作慶元路學重建
大成殿記今依四明文獻集訂正

三十年癸巳七十一歲

八月作鄞縣重修儒學記

三十一年甲午七十二歲

十二月甲午作義田莊先賢祠堂記

袁梅書世綸堂雅集詩卷云吾

猶盛時比屋皆故家大官卒至國亡無賣降于外者當至正末年諸老先生猶亡恙時則有深寧王先生師表模範世綸雅集猶有浴社耆英之遺意謝山全氏句餘土音序云宋之亡也遺老自相倡酬時則深寧王公爲主盟陳西麓尤工詩寓公則舒閔風劉正仲之徒咸豫焉

成宗元貞元年乙未七十三歲

二年丙申七十四歲

王溪寧先生年譜

毛氏四明叢書新刻刊本

是春作九先生祠堂記

六月十二日戊申卒葬同

墓名同

曾祖察使公墳下馬家山先期自爲墓志

題曰沒儀

遺民自誌其銘曰其仕其止如偃如圖論者謂先生

風節不媿致光表聖而文章學問則遠過之所著深

寧集一百卷玉堂類彙二十三卷

甬上耆舊傳作十三卷

掖垣

類彙二十二卷古易考

不著卷

周易鄭注一卷

二書宋史甬上耆舊傳皆生載

香舊傳

詩考五卷詩地理考六卷

宋史甬上耆舊傳皆生載

漢

藝文志考證十卷通鑑地理考一百卷通鑑地理通

稽十六卷通鑑答問四卷困學記聞二十卷蒙訓七

十卷集解踐阼篇

不著卷

補注急就篇六卷補注王會

篇

不著卷

小學紺珠十卷玉海二百卷詞學指南四卷

詞學題苑四十卷筆海四十卷姓氏急就篇六卷漢

制考四卷六經天文編六卷小學諷詠四卷

共七百餘卷宏

簡錄本傳云所著書凡六百九十餘卷杲堂李氏曰先輩言古今撰述之盛前無如葛稚川所著書六百餘卷其次卽先生所著六百八十九卷亦

極盛矣僅接杲堂先生所紀卷數有誤弟子著名者胡三省戴表元袁桷黃叔雅史晏卿史蒙卿趙孟

傑楊浚王惟賢先生在宋時官至朝請大夫禮部尙

書賜金紫鄞縣開國伯夫人鄭氏丞相安晚四女孫

王深寧先生年譜

三五四明黃書

剡縣州本

也再娶江口李氏皆贈碩人三娶後陽舒氏封碩人

子二人良學官至兩浙運幹先卒昌世字昭甫學者

稱靜學先生以父恩補承務郎未及祿而宋亡入元

力辭薦舉隱居教授泰定丁卯卒

事詳黃潛墓誌

女二人一

適史萬卿一適戴泳良學子文遠文遠子懋孫去疾

去疾無子懋孫子奕傳昌世子厚孫字叔載

學者稱遂初尤

生著有遂初集三十卷

寧孫字叔遠

僕按寧孫之字獨考誌載皆作叔遠蓋取諸葛公語

非有誤也惟當日何以取同祖兄名爲字爲厚孫二

可疑耳錢譜作叔遠與諸書不符恐未可忽子陞

僅按錢譜云厚孫子三人隲爲寧孫後生二

隲同隲與家乘不合誤也

子宗傳中傳宗傳遺爲陞後

錢譜云先生有四世孫中傳見崇陽外史集僅

按謝山全氏甬上族望表云竹林王氏共五望其後散處於越居鄞者微攷之家乘則遷越爲太常默齋先生之後非先生裔也又按浚儀王氏家乘爲宗傳子馴所修馴弟駢四世孫鎮嘉靖間重修

附錄

宋史儒林列傳

王應麟字伯厚慶元府人九歲通六經淳祐元年舉進士從王堃受學調西安主簿民以年少易視之輸賦後時應麟白郡守繩以法遂立辦諸校欲爲亂知縣事翁甫倉皇計不知所出應麟以禮諭服之差監平江百萬

王深寧先生年譜

陳

三五四明樓書

約園刊本

東倉調浙西提舉常平茶鹽主管帳司部使者鄭霖異待之丁父憂服除調揚州教授初應麟登第言曰今之事舉子業者沽名譽得則一切委棄制度典故漫不省非國家所望於通儒於是閉門發憤誓以博學宏辭科自見假館閣書讀之寶祐四年中是科應麟與弟應鳳同日生開慶元年亦中是科詔褒諭之添差浙西安撫司幹辦公事帝御集英殿策士召應麟覆考第既上帝欲易第七卷真其首應麟讀之乃頓首曰是卷古直若龜鑑忠肝如鐵石臣敢爲得士賀遂以第七卷爲首

選及唱名乃文天祥也遷主管三省樞密院架閣文字
遷國子錄進武學博士疏言陛下閱理多願治人當事
勢之艱輿國蹙於外患人才乏而民力殫宜強爲善增
修德無自沮怠恢宏士氣下情畢達操綱紀而明委任
謹左右而防壅蔽求哲人以輔後嗣既對帝問其父名
曰爾父以陳善爲忠可謂繼美丁大全欲致應麟不可
得遷太常寺主簿面對言淮戍方警蜀道孔艱海表上
流皆有藩籬霄齒之憂軍功未集而吝賞民力旣困而
重斂非修攘計也陛下勿以宴安自逸勿以容悅之言

王深寧先生年譜

三四明錄

約圖刊本

自寬帝愀然曰邊事甚可憂應麟言無事深憂臨事不
懼願汲汲預防毋爲壘蔽所欺時大全諱言邊事於是
應麟罷去及大全敗起應麟通判台州召爲太常博士
擢祕書郎俄兼沂靖惠王府教授彗星見應詔極論執
政侍從臺諫之罪積私財行公田之害又言應天變莫
先回人心回人心莫先受直言箝天下之口沮直臣之
氣如應天何時直言者多迂權臣意故應麟及之遷著
作佐郎度宗卽位權禮部郎官草百官表舊制請聽政
四表已上一夕入臨宰臣諭旨增撰三表應請操筆立

就丞相總護還辭位表三道使者立以俟應麟從容授之丞相驚服卽授兼禮部郎官兼直學士院馬廷鸞知貢舉詔應麟兼權直俄兼宗政殿說書遷著作郎守軍器少監經筵值人曰雪帝問有何故事應麟以唐李嶠李义等應制詩對因奏春雪過多民生飢寒方寸仁愛宜謹感召遷將作監帝視朝謂應麟曰爲學要灼見古人之心應麟對曰嚴恭寅畏不敢怠皇克勤克儉無自縱逸強以取下制事以斷此古人之心然操舍易忽於眇綿兢業每忘於遊衍帝嘉納之旣而輪對言人君防

王深寧先生年譜

三四明叢書

一約園刊本

未萌之欲存不已之誠擢兼侍立修注官升樞直學士院遷祕書少監兼侍講上疏論市舶不報會賈似道拜平章事葉夢鼎江萬里各求去似道亦求去應麟奏孝宗朝闕相者亦逾年帝亟取以諭之似道聞應麟言大惡之語包恢曰我去朝士若王伯厚者多矣但此人素著文學名不欲使天下謂我棄士彼盍思少自貶恢以告應麟笑曰迂相之患小負君之罪大遷起居舍人兼權中書舍人冬雷應麟言十月之雷惟東漢數見命令不專姦袞並進卑踰尊外陵內之象當清天君謹天命

體天德以回天心守成必法祖宗御治必總威福似道
聞之斥逐之意決矣應麟燦閣門直前奏對謂用人必
先察君子小人方袖疏侍班臺臣亟疏駁之由是二史
直前之制遂廢以祕閣修撰主管崇禧觀久之起知徽
州其父撝嘗守是郡父老皆曰此清白太守子也推豪
右省租賦民大悅召爲祕書監樞中書舍人力辭不許
兼國史編修實錄檢討兼侍講遷起居郎兼權吏部使
耶指陳成敗逆順之說且曰國家所恃者大江襄樊其
喉舌議不容緩朝廷方從容如常時事幾一失豈能自

王深寧先生年譜

三四明史書
約國刊本

安親臣無以邊事言者帝不憚似道復謀斥逐適應麟
以母憂去及似道潰師江上授中書舍人兼直學士院
卽引疏陳十事急征討明政刑厲廉恥通下情求將材
練軍實備糧餉舉實材擇牧守防海道其目也且言圖
大患者必略細故求實效者必去虛文因請集諸路勤
王之師有能率先而至者宜厚賞以作勇敢之氣并力
進戰惟能戰斯可守進兼同修國史實錄院同修撰兼
侍讀兼禮部侍郎兼中書舍人日食應詔論答天戒五
事陳備禦十策皆不及用尋轉尚書兼給事中左丞相

留夢炎用徐囊爲御史擢江西制置使黃萬石等應麟
繳奏曰囊與夢炎同鄉有私人之嫌萬石竊吳無學南
昌夫守誤國罪大今方欲引以自助善類爲所搏噬者
必攜持而去吳浚貪墨輕躁豈宜用之況夢炎舛令慢
諫謫言勿敢告今之賣降者多其任用之士疏再上不
報出關俟命再奏曰因危急而紊紀綱以偏見而拂公
議臣封駁不行與大臣異論勢不當留疏入又不報遂
東歸詔中使譚純德以翰林學士召識者以爲奪其要
路寵以清秩非所以待賢者應麟亦力辭後二十年卒

王深寧先生年譜

陳

三三四明叢書

約圖刊本

所著有深寧集一百卷玉堂類藁二十三卷掖垣類藁
二十三卷詩考五卷詩地理考五卷漢藝文志考證十
卷通鑑地理考一百卷通鑑地理通釋十六卷通鑑答
問四卷困學記聞二十卷蒙訓七十卷集解踐阼篇補
注急就篇六卷補注王會篇小學紺珠十卷玉海二百
卷詞學指南四卷詞學題苑四十卷筆海四十卷姓氏
急就篇六卷漢制考四卷六經天文編六卷小學諷詠
四卷

梭儀遺民自誌

王氏也應麟名也伯厚甫字也其先浚儀人居鄞自曾
大父始也遺民不忘舊也世系則先君吏部正奉先妣
陳碩人誌銘可見也先君擢第之歲與弟太常博士應
鳳生同日嘉定癸未七月也學以先君爲師伯仲自爲
友閉門讀書不忘交也年十九第進士乙科淳祐辛丑
也年三十四以博學宏辭擢用寶祐丙辰也初仕爲衢
州西安簿監戶部百萬倉主管浙西提舉常平茶鹽帳
司添差浙西安撫司幹辦公事登朝出爲添差通判台
州以祕閣修撰知徽州此在外所歷之官也始入朝主

王深寧先生年譜

陳

三四

四明叢書

約園刊本

管三省樞密院架閣文字國子錄武學博士太常寺主
簿又爲太常博士祕書郎兼沂靖惠王府教授著作佐
郎兼禮部郎翰林權直崇政殿說書遷著作郎軍器少監
陸學士院權直遷將作監陞權直學士院兼侍立修注
官遷祕書少監兼侍講遷起居舍人兼權中書舍人又
召爲祕書監兼中書舍人兼國史院編修實錄院同修
撰兼侍讀遷禮部侍郎兼中書舍人兼權禮部尙書遷
禮部尙書兼給事中攝吏部尙書此在內所歷之官也
瑣闥封駁不得其言去詔中使趣召懇辭遂老于園

德祐乙亥也自初命至朝請大夫賜服金紫鄞縣開國伯食邑九百戶此其封階也性謹愨寡慾介直少通不苟同流俗也立朝恬靜蒞官公勤處家簡儉治郡潔已愛民守先訓也再入翰苑三入掖垣制彙凡四十五卷才弱文不逮古也嗜學老不倦爲困學紀聞彙次之書有詩考詩地理考漢藝文志考通鑑地理考地理通釋通鑑答問集解踐阼篇補注急就篇王會篇輯古今言行爲家訓其文彙曰深寧集然不足傳也自爲誌銘倣樊川澗山也生稱逸民死表其阡曰前進士王君之墓

王深寧先生年譜

陳

三五四明叢書

約園刊本

歸全奚憾而在三之報有媿於古之人也銘曰

學古而迂志壹而愚其仕其止如偃如圖不足稱於遺老或庶幾乎守隅歸從先人戰兢免夫

宋吏部尚書王公壙記

先生王氏諱應麟字伯厚世居開封之祥符曾大父諱安道武經大夫保信軍承宣使轉和州觀察使始居四明之鄞妣陳氏龍氏並贈宜人大父諱希亮朝散大夫妣張氏封宜人父諱擢朝請大夫吏部郎中兼崇政殿說書累贈正奉大夫妣陳氏封太碩人先公於嘉定十

六年七月庚午與叔父太常博士諱應鳳生同日登淳祐元年進士第授迪功郎衢州西安縣主簿八年差監戶部平江府百萬東倉明年升從事郎十二年差供西提舉常平茶鹽司主管帳司是歲丁吏部公憂寶祐三年服闋差揚州學教授四年中博學宏詞科有旨陞擢添差浙西安撫司幹辦公事五年主管三省樞密院架閣文字除國子錄宣敎郎六年除武學博士開慶元年除太常寺主簿景定元年轉奉議郎添差通判台州四年轉承議郎召爲太常博士五年除行祕書兼沂清惠

王深寧先生年譜

陳

三十四明叢書

約園刊本

王府敎授遷著作佐郎度宗登極轉朝奉郎攝直學士院權禮部郎官兼翰林權直兼崇政殿說書遷著作郎二年除守軍器少監陞兼學士院權直轉朝散郎遷將作監賜緋魚袋三年兼侍立修注官陞權直學士院遷祕書少監兼侍講遷起居舍人兼權中書舍人經筵徹章轉朝請郎四年除祕閣修撰主管建康府崇禧觀五年仍舊職差知徽州吏部公舊治也六年轉朝奉大夫七年召爲祕書監兼權中書舍人兼國史院編修官寶錄院檢討官兼侍講遷起居郎兼吏部侍郎八年經筵

徵章聘朝請大夫兼直學士院兼同修國史實錄院同
修撰兼侍讀賜紫金魚袋遷禮部侍郎兼中書舍人權
禮部尚書兼給事中攝吏部尚書以明堂恩封鄞縣開
國伯食邑九百戶自是歸隱田里逾二十年號深寧叟
以元貞二年六月戊申卒於正寢享年七十有四嗚呼
痛哉娶鄭氏繼娶李氏先卒並贈碩人繼舒氏封碩人
子男二長良學承務郎兩浙運幹繹買官先公十六年
卒次昌世女二長適通仕郎史萬卿次適口仕郎戴泳
蚤卒孫男文遠曾孫男二楸孫去疾女一昌世等不孝
忍死將以是年十二月辛酉奉匭遷於陽堂鄉同輿之
原從祖父兆先志也葬日薄謹述官爵始末以識罔極
之痛云孤子昌世泣血謹記

全祖望宋王尚書畫像記

往者太原閻丈百詩篇嗜深寧先生之著述三屬人入
鄞求先生之行狀神道碑墓志欲附之卷尾又求其畫
像欲摹之卷首而皆不可得先生孫枝在鄞者零落其
存紹之上虞者亦不知其盛與否也予罷官歸同學葛
君巽亭爲予言榆夾村王氏有先生像亟喜往請而觀

之亡宋遺民所云感淳人物面目當時已等之彘鼎况
大儒如先生乎先生之學私淑東萊而兼綜建安江右
永嘉之傳予於同谷三先生書院記言之詳矣生平大
節自擬於司空韓偓之間良無所媿顧所當發明者
有二其一則宋史之書法也先生於德祐之末拜疏出
闕此與曾淵子輩之潛竄者不同先生既不與軍師之
任國事已去而所言不用不去何待必俟元師入城親
見百官署名降表之辱乎試觀先生在兩制時晨夕所
草詞命猶思挽既渙之人心讀之令人淚下則先生非

王深寧先生年譜

東

三六四明叢書

約對刊本

肯愬然而去者今與淵子輩同書曰遁妄矣其一則明
儒所議先生入元曾爲山長一節也先生應元人山長
之請史傳家傳志乘諸傳皆無之不知其何所出然卽
令會應之則山長非命官無所屈也箕子且應武王之
訪而況山長乎予謂先生之拜疏而歸蓋與馬丞相碧
梧同科卽爲山長亦與家參政之教授同科而先生之
大節如青天白日不可掩也嗚呼先生困學記聞中有
取於姚弋仲王猛之徒與楊盛之不改正朔并謝靈運
臨難之詩其亦悲矣而謂士不以秦賤經不以秦亡俗

不以秦壤何其壯也晉李德林之以事周者事隋更足爲興王用人之戒今觀先生之像須眉惆悵端居不樂其當杜門謝客之際乎惜不令百詩見之也

按此記全氏所見當是私第角巾之像惟榆莢村王非先生族屬不知當時何以有此求之村人謂已毀於謔出矣今先生孫枝居唐家匯者樸懇無文飾奉其像與家乘俱來冠帶袍笏儼然如生上方有先生自誌明崇禎間曹某書爲先生第十八世女孫之壻世守足徵洵與鼎彝比重且稱此像造時曾爲人攜至太原豈潛邱已得先睹而全氏作記時未相聞耶先生爲宋臣傳在宋史畫像固宜遵宋冠服故本之摹諸卷首仍錄此者以榆莢村一說當在傳疑之例其發明二事亦知人論世之一助云童槐識

徐錫珪捐造深寧先生祠堂引

吾郡碩儒未有如深寧先生者也而舊無專祠殊爲闕典今西郊文昌閣有成斥其河壩餘地足以集事前旣承當道長官及梓鄉紳士共襄盛舉巍然傑構壯我西顧矣而不及今令不世出之名賢俎豆其旁甚非所以

獎與文運誘進後生也先生之學光芒宇宙其文集散佚然卽所流傳諸書已與奎璧爭輝矣是宜生其地者之必思所以崇報之無怠也先生孫枝僅存保有明初所遺家乘具載歷官告身行狀墓志傳贊他日當并勒之祠中以爲此邦人觀法也惟願勉力佐成一與建閣意無異幸甚幸甚

王深寧先生年譜

陳

四

西明叢書
約園刊本

王深寧先生年譜

嘉慶庚辰余在京邸得竹汀錢氏深寧先生年譜度行
篋中道光丁亥既自贛州歸適先生後人居南鄉唐家
匯者以先生畫像及家乘來則中有年譜在焉喜極取
以校錢氏譜則錢譜十譌七八甚矣譜學之難也凡家
乘多附會不足據而先生子昌世所作壙記則徵信之
物也因與婦弟張子鐵峯悉心核校以壙記家乘爲主
參之錢氏及史傳諸紀載稽疑訂謬別編次爲卷家乘
猶是嘉靖間舊物多漫漶蠹脫處可補者補之其不可
知者以俟異日憶甲申之秋余約同人合釀爲先生作
生日自後率以爲常去夏創建專祠不踰年而告成而
畫像家乘亦不期而獲焉不可謂非先生之靈之所式
憑也爰識其緣起如此道光八年季秋邑後學陳僅跋
於文則樓

嘉定錢氏所編先生年譜半據延祐志然多失次如遷常簿及輪對忤丁相罷職在開慶己未通判台州在景定庚申攷之先生壙記及宋史皆合而錢譜俱在寶祐戊午其他遷除年序舛錯不一則延祐志之不足據也道光七年五月陳漁珊姊丈與余創建先生祠堂適得明嘉靖間浚儀王氏家乘鈔本尙書公年譜互加案校屬余別爲編次嘉定十六年至德祐元年本之王氏家譜參以錢譜德祐二年訖元貞二年本之錢譜參以王氏家譜云道光八年秋九月邑後學張恕跋於長春花

王溪臺先生年譜

陳

四十二

明樓譜

約圖刊本

館

王深寧先生年譜

仁和張大昌小雲輯

宋寧宗嘉定十六年癸未七月先生生

先生姓王氏諱應麟字伯厚又字厚齋行廿二以七

月二十九日寅時生本貫開封府祥符縣曾祖安道

字時中武經大夫保信軍承宣使建炎初扈蹕南渡

乾道間始定居於鄞

陳譜按嘉靖寧波府志鄞縣治南一里宋禮部尚書王應麟所

居至今稱王家府謝山全氏湖語深寧先生封鄞縣

伯故所居亦稱錦里今考先生故居在城西南廂鄞

縣學前白鶴廟之東廟相傳爲先生書堂遺址祖晞

卽所謂汲古堂書庫也王家府錦里名皆不傳祖晞

一四明叢書

亮字寅仲武經郎錢譜云黃潛撰王昌世墓誌云朝

父王撝墓誌銘云大父安道建炎渡江從名數於四

明官至武經大夫保信軍承宣郎轉利州觀察使父

晞亮武經郎父撝字謙父博洽多聞性耿介非其友

不與語幼學於樓昉爲文醇深善議論案博洽以下

康熙寧波府志人物傳卽以是年登蔣重珍榜進士後官至朝

請大夫吏部郎中兼國史院編修官實錄院檢討官

兼崇政院說書直祕閣知溫州三字據雍正浙

正奉大夫妣陳氏贈碩人按錢陳兩譜均未載先生

鳳名下云外氏陳先生自母姓氏封贈考登科錄應

製墓銘稱先妣陳碩人

十七年甲申二歲

理宗寶慶元年乙酉三歲

二年丙戌四歲

侍吏部公於安吉

東譜

時吏部公爲安吉丞攝長興

令捐俸賑水災再攝新城復斥餘財五萬緡代貧民

賦據延祐四明志

三年丁亥五歲

紹定元年戊子六歲

二年己丑七歲

王深寧先生年譜

張

一四明叢書

約風刊本

三年庚寅八歲

弟應鳳生字仲儀小字若鳳與先生同月日

錢譜宏

簡錄道學本傳父擣同日雙生二子曰應麟應鳳云錢譜謂應鳳後先生八年生同日誤竊按寶祐登科錄應鳳名下稱年二十七七月二十九日寅時生寶祐四年先生年三十四而應鳳年二十七錢譜所據者此陳譜恐未合宏簡錄雖有此說而宋史本傳及先生自製墓誌子昌世所作壙志祇稱同日生未有云同生於某年月日者今姑依錢譜所載附繫於此又按應鳳行第二十三娶羅氏亦見登科錄

四年辛卯九歲

是年先生通六經

錢譜

五年壬辰十歲

六年癸巳十一歲

侍吏部公於臨安

陳譜

端平元年甲午十二歲

二年乙未十三歲

三年丙申十四歲

嘉熙元年丁酉十五歲

二年戊戌十六歲

從鄉先生吳參倚學

錢譜

三年己亥十七歲

王深寧先生年譜

張

二三四明叢書

約園刊本

吏部公遷國子監正將作監主簿

案錢譜不載陳譜無將作監主簿五

字據康熙寧波府志

先生隨侍入朝

是歲吏部公同年進士

余天錫參知政事屬吏部公教其子弟歲終致束脩

堅卻不受曰吾二兒習詞學鄉里無完書願從公求

尺牘往借周益公傳內翰番陽三洪暨其餘習詞學

者凡二十餘家所藏書余欣然應之吏部公性嚴急

每投題設魏座命坐堂下刻燭以俟少緩輒呵譴之

由是先生文益敏捷

陳譜始忤史彌遠

按吏部爲樓迂齋高弟

不達文章氣節推重一時先生之淵源家學蔚爲大儒有自來矣

四年庚子十八歲

四月史嵩之依前右丞相兼樞密使吏部公乞補外

以避通判婺州

據康熙寧波府志參宋史本紀及宰相表按陳譜謂通判婺州在明年七月似

未合 八月先生試國子監中選試題安人天民之

福賦整翮當雲霄詩下逮莊騷太史所錄論策問蜀

帥北使次問士氣末問教胄子

陳譜

淳祐元年辛丑十九歲

二月別院省記奏名試題口道德賦當春乃發生詩

統紀法度如何口口論策問科舉次問道學末問理

王深寧先生年譜

張四四明叢書

約園刊本

刑案是科杜範知貢舉見咸淳臨安志

四月御史臺覆試試題人君

之道無私論

陳譜

五月廷試乙科登徐儼夫榜進士

賜及第出身親試策問正學吏治邊防邦計耕屯荒

政六事太祖肇基高宗中興規模 六月聞喜宴賜

御製詩涼菲膺圖屢改元賓興六詔五

陳譜闕此字據咸淳臨安

志臨軒勵精思振清明政策秀欣求謙

陳譜闕此字據咸淳臨安

志直陳譜作敬上下均闕字恐誤今依咸淳臨安志

言致陳譜闕此二字據咸淳臨安志補陳

謹敬字恐即致字之譌

主莫如仁與義立身休計飽和溫時艱

全藉賢經濟勉力應無負選掄 七月侍吏部公於

婺州從王莖受學習宏詞科初真文忠從傅伯壽爲

詞科莖與文忠相後先源緒精密先生二十據延祐志

得呂成公真文忠之傳陳譜又從徐鳳受習之據清容

袁枬情容集陳志仲墓誌有云宋季詞科呂成公真

文忠傳諸徐鳳徐鳳傳諸王公應麟諸書均稱從王

莖不言從徐鳳未知先生從徐鳳在從王莖之前後今姑繫此以備參攷先是先生初登

第言曰今之事舉子業者沽名譽得則一切委棄制

度典故漫不省非國家所望於通儒於是發憤誓以

博學宏辭科自見假館閣書讀之據本每以小冊納

袖中入祕府凡見典籍異聞則筆錄之復藏袖中而

出據至正直記陳譜附注此於乙巳作廣恩崇福

寺記下云先生自登第至試詞科在朝之日甚淺

其假館閣書未知當在何時附記於此竊按本傳明

云登第言曰則應列於是年實無疑義若至正直記

所稱乃先生分類輯玉海之始故胡助云公專力三

十餘年而後成當亦在是年肇始也至所云祕府則

公麻案牘正多皮藏未必專以在朝而後以祕府稱

況至正直記以爲撰困學記聞則所稱祕府不必皆

內府也

二年壬寅二十歲

是歲史彌鞏知婺州與吏部公同事相得史公五子

能之胃之皆先生同年及有之胃之育之均侍焉據

鄂州墓誌

兩家子弟相好也陳譜此條移辛丑年未

淳祐初余始第進士侍先君子吏部婺州倅明年少師公來守郡君侍焉兩家子弟相好也錢譜本此列是年陳移御史劉晉之誣衢州掾慮囚受賕刑獄之殊誤

使者不直之命吏部公審實公言誠無是事晉之怒

而婺之士民咸謂公處置實當晉之不敢犯晉之蓋

史相黨人也據延祐四明志

三年癸卯二十一歲

調衢州西安主簿錢譜云無年月可考姑繫於此陳譜移列於壬寅年則無據證今仍

依錢繫此民以年少易視之輸賦後時四字據本傳先生白郡

守繩以法遂立辦諸校欲爲亂知縣事翁甫倉皇計

王深寧先生年譜張

六四明叢書約圖刊本

不知所出先生以理論服之錢譜吏部公攝知婺州

去之日以羨餘數籍於官據康熙寧波府志

四年甲辰二十二歲

吏部公以祕書丞知徽州郡廩無三月之儲暨解去

粟支一年帛萬匹所宜得錢復以助少府之用遷吏

部郎中崇政殿說書據延祐四明志

五年乙巳二十三歲

侍吏部公入朝陳譜調浙西提舉常平主管帳司部

使者鄭霖異待之錢譜秋作廣恩崇福寺記 吏部

公上疏言羣臣遜志之言多逆耳矯拂實未之見其
議剴切深中時病據延祐四明志

六年丙午二十四歲

十月先生赴西安

陳譜

七年丁未二十五歲

六月昌國令沈慤重建昌國學大成殿作重建昌國

大成殿記

據延祐四明志

八年戊申二十六歲

十月差監戶部平江府百萬倉

錢譜繫甲辰陳譜依擴記繫此

長

王深寧先生年譜張

七

四明叢書

約園刊本

洲宰扁其縣圃曰茂苑先生告之曰長洲非此地也

問其故先生曰吳王濞都廣陵漢郡國志廣陵郡東

陽縣有長洲澤吳王濞太倉在此東陽今盱眙縣故

枚乘說吳王云長洲之苑服虔以爲吳苑韋昭以爲

長洲在吳東蓋謂廣陵之吳也曰他有所據乎先生

曰隋虞綽撰長洲玉鏡蓋煬帝在江都所作也長洲

之名縣始於唐武后時

錢譜繫甲辰文簡略今與監倉併移此據困學紀聞

是年長子良學生字茂章 摹刻正月天中節放生

池戒宰烹御札成有代進放生池御札摹本表

據四明女

獻集參成
淳臨安志

九年己酉二十七歲

三月陞從事郎

陳譜

十年庚戌二十八歲

十一年辛亥二十九歲

吏部公兼國史院編修官實錄院檢討官預修四朝

史撰輿服志六卷

陳譜作四朝史編修官恐誤蓋當稱國史院編修官爲合茲依府志

作預修四朝史宋代未嘗專設四朝史官也輿服志原作四卷茲據浙江通志改

理宗賜

吏部公御書竹林汲古傳忠六字先生代撰謝賜表

王深寧先生年譜

八四明叢書

約園刊本

吏部公因額其里居堂曰汲古堂所撰文曰汲古文

集

據鄞縣志

二月乙未左丞相鄭清之等上玉牒日曆

會要及光宗寧宗寶訓寧宗經武要略先生有擬國

史院進光宗寧宗寶訓表又有代宰臣以下賀奉安

光宗寧宗寶訓寧宗經武要略今上玉牒日曆會要

禮成表

據詞學指南四明文獻集參宋史本紀

十二年壬子三十歲

理宗賜吏部公御製周易徹章詩先生代撰謝賜表

據四明文獻集

吏部公以直祕閣知温州

據延祐四明志浙江通志選舉

職官寧波府志人物傳

四月差浙西提舉常平茶鹽司主管

七月考試臨安

陳譜

八月辛巳詔改明年爲寶祐元

年有代賀改元寶祐表

據四明文獻集宋史本紀

十二月吏部

公卒於溫州任先生丁父憂

陳譜案續記云淳祐十二年差浙西提舉常平

茶鹽司主管帳司是歲丁吏部公憂寶祐三年服闋

差揚州州學教授按吏部以十二月三日卒年六十九錢譜謂卒於寶祐元年癸丑十二月則十二月所

乙卯方再期不得除服赴差揚州當以擴記爲定

據鄞縣志

著有汲古文集樂事錄

寶祐元年癸丑三十一歲

王深寧先生年譜張

九四明叢書約圖刊本

十一月皇子忠王祺冠有代賀皇子忠王行冠禮表

據四明文獻集參宋史本紀

三年乙卯三十三歲

二月服闋

陳譜

三月差揚州州學教授

錢譜按先生試宏

詞繫銜云從事郎新除揚州州學教授若三月差授至明年二月歷時已久似不得稱新豈差命雖下而

以試事實未及赴任故仍從初銓之例敷附疑俟考

四年丙辰三十四歲

二月以從事郎新除揚州州學教授試博學宏詞科

中選十二日試第一場題二首

十字據詞學指南

昭慶軍承

宣使左金吾衛大將軍荆湖北路安撫副使兼知鄂
州授寧武軍節度使龍神衛四廂都指揮使夔路安
撫使兼知夔州兼提領措置屯田兼控扼瀘敘昌合
四州邊面加食邑食實封制周山川圖記十三日試
第二場題八字據詞
學指南代皇子謝賜御書孝經十六句
表堯衢室銘十四日試第三場題八字據詞
學指南天禧編
御集序漢華平頌錢譜三月有旨聽擢陳譜四月添
差浙西安撫司幹辦公事錢譜五月集英殿策進士
宣入殿廬充覆考檢點試卷官考第既上帝欲易第

王深寧先生年譜

十四明叢書

約園刊本

七置其首

案藝開文信
國傳作第五

先生讀畢頓首曰是卷古誼

若龜鑑忠肝如鐵石臣敢爲得人賀遂真第一及唱

名乃文天祥也先生弟應鳳是科年二十七治賦一

舉以迪功郎應試

十四字據寶
祐登科錄

廷對披腹盡言六字
據成

化四
明志

亦以第二甲第九人登第錢譜

五年丁巳三十五歲

主管三省樞密院架閣文字

陳譜按錢譜在
前一年丙辰

七月

除國子錄

制

朕欲以理義淑人心以教法新士習師

儒之官其誰宜僉曰爾文杓篤實無華墨洗其質也

爾用存修潔有守金玉其相也爾似道識度老成斂實而秋也爾應麟才思汗瀾敷華而春也儀于周行聲聞藉甚是用進文杓於東博升用存於經博擢似道於武博應麟則掌成均之法以飭之夫業精於勤荒於嬉行成於思毀於隨此晨入之誨也爾豈遜於愈者或朕將有考於斯可

陳譜

十月改宣教郎依舊

職

陳譜

庚子詔皇子忠王祺授鎮南遂安軍節度使

皇女進封昇國公主有代賀皇子加兩鎮公主進封

昇國表

據四明文獻集參宋史本紀

王深寧先生年譜

十一

四明叢書

約園刊本

六年戊午三十六歲

六月除武學博士

制曰

朕新美多士遴擇庶官文武之

教雖殊而所以教則一以爾得吉譽然其文淵乎其

道其陸師屬以迪胄子爾耕學茂而醇辭麗而則其

口博通以淑生徒爾應麟見聞殫洽才思奮然其範

韜鈴之士爾口璞年耆德明氣和守正其舉糾繩之

政夫古之學者必時春夏教禮樂秋冬教詩書而干

戈羽籥之容亦在所必講爾其惟勤惟思往以身率

使正音鏘訇於金石則在泚之莪菁矣

陳譜

是年先

生上疏言陛下閱理多願治久當事勢之艱與圖盛
於外患人才乏而民力殫宜彊爲善增修德無自沮
怠恢宏士氣下情畢達操紀綱而明委任謹左右而
防壅蔽求哲人以輔後嗣旣對帝問吏部公名曰爾
父以陳善爲忠可謂繼美

錢譜多刪節
據本傳增

開慶元年己未三十七歲

正月爲禮部點檢試卷官有代知舉謝賜御札表

二月除太常寺主簿制曰奉常□□□□□□陳殷置輔

隸其畀非才識兼茂聞望素高者不畀也爾應麟博

王深寧先生年譜

十四明叢書

約編刊本

聞強識積學多聞固嘗以異科顯矣由右序而稽秩
宗榮進豈易量哉警教四達文治勃興非國家盛事
歟尙其勉之毋但曰供簿正而已矣則朕以憚

陳譜

三月出院陳譜五月輪對後殿時丁大全以會計得

幸于上擅奏擬臺諫承風旨大全招先生諭意將拜

爲御史而大全諱言邊事先生入對言淮戍方警蜀

道孔艱海表上流皆有藩籬脅齒之憂軍功未集而

吝賞民力旣困而重斂必失軍民心非修攘之計也

願陛下勿以宴安自逸勿以容悅之言自寬帝愀然

曰邊事甚可憂先生言無事深憂臨事不懼願汲汲
預防毋爲壘蔽所欺由是與大全忤是日卽以臺諫
論罷錢譜十月辛未朔丁大全罷壬申以吳潛爲左

丞相賈似道爲右丞相

陳譜

是年弟應鳳應博學宏

詞科中選詔褒諭之先是應鳳中甲科或謂曰此麗
澤先生名弟也蓋以異自見及入選人以三洪並稱

錢譜文多刪節據本傳參四明鄞縣諸志又案是
科試題見詞學指南及鄞縣志第一場題檢校少保
武康軍節度使淮南西路安撫司兼知瀘州授檢校
少傅學武軍節度使侍衛馬軍都指揮使四川宣撫
副使兼知潼川府措置修築沿邊城堡團結民兵捍
禦瀘敘思播鎮遠諸處邊面兼屯田使加食邑食實

王深運先生年譜

張

十三四明叢書

約園刊本

封制漢郡山川風俗記第二場題代提舉國史已下
進重修孝宗皇帝實錄編類寧宗皇帝御集表堯謁
者箴第三場題慶曆新修太常禮贊唐定戎關圖序
有代玉牒洪兵書謝成

轉通議大夫表又代洪兵書謝表

據四明文獻集按集稱洪兵書未載

其名考宋史是時有洪天錫洪芹二人天錫傳不言
居兵書洪芹傳云開慶元年權禮部郎中書舍人屬
兵興則此稱兵書當爲洪芹無疑故繫此

景定元年庚申三十八歲

九月轉奉議郎添差通判台州

錢譜在寶祐六年注云此據延祐四明志

宋史謂大全罷起通判台州非也陳譜依擴記繫此與宋史合

二年辛酉三十九歲

弟應鳳添差浙西安撫司幹辦公事遷主管架閣文

字

按咸淳臨安志載應鳳撰景定二年辛酉五月浙西安撫司僉廳應壁續記有云應鳳以未至尋授

簡焉又云敢正列其義庶幾相規若古僚友是曾授是職之顯證本傳於詔褒諭之後稱添是職似亦屬應鳳言也咸淳臨安志又載景定重建廣嚴院記稱王架閣應鳳撰則主管架閣文字亦足徵信殆同由詞科進宦途則添差遷秩三無不同惟年月無考添差似非自此歲今姑依撰記年月增繫於此

三年壬戌四十歲

八月赴台州

陳譜按家乘云是歲長子良學登第而擴記未言浙江通志選舉六是年方山京榜亦無良學名凡家乘中如此類皆不足徵信今盡削之

四年癸亥四十一歲

王深寧先生年譜

張

十四四明叢書

約園刊本

二月轉承議郎

陳譜

五月除行太常博士

制

日奉常漢

樂官也博士皆以專經選今惟禮樂是司視成均尤

重且率爲緊官要轍之儲爾以詞學進身文譽滋著

亦旣任師儒之責矣明禋秩典召而歸之講明圭幣

之文品齊俎豆之事往殫爾職嗣聽異除文字官非

爾誰屬

陳譜

七月供職

陳譜

九月辛卯祀明堂爲前

導官有宰臣以下賀明堂禮成表

據四明文獻集參本紀葉熊按故事

禮部郎官草百官箋表博士禮部郎屬也故表不稱代

湯漢爲少卿與先生

鄉牆居朝夕講道言關洛濂閩江西之同異永嘉制

度沙隨古易蔡氏圖書經緯西蜀史學通貫精微剖
析幽眇漢曰吾闕士良廣惟伯厚乃真儒也錢譜使真

文忠在願同在弟子列會漢髦年力所去遂薦先生

於似道

使字以下據延祐志 陳譜此附咸淳元年云按宋史湯漢除太常少卿在度宗登極後

錢譜附於景定四年寧波府志亦云應麟爲太常博士湯漢爲少卿比屋而居皆失之不考竊按陳氏所考亦殊未得宋史湯漢本傳云遷太府少卿升太子論德改祕書少監疏論臺諫乞休致擢太常少卿補外爲福建安撫改知隆興府度宗卽位召奏事授太常少卿是漢兩除太常一在登極前陳失之不考尤甚錢譜除太常博士在景定元年因繫於元年陳乃謂錢譜附四年誤況錢譜及寧波府志均僅云爲少卿據本傳於爲太府太常固無年月然府志云會漢髦年遂薦先生於似道是指漢乞休致時陳直增爲

王深寧先生年譜

張 五四明叢書

約園刊本

五年甲子四十二歲

太常少卿尤爲失考何若稱少卿以闕疑況至咸淳元年則似道已因先生撰表驚異何取乎漢薦邪今依擴記繫爲太常博士於四年卽附繫之仍稱爲少卿而不稱太常庶與傳亦不相悖

除行祕書郎

制

卽於祕府職亞南宮非得名流曷稱

厥職爾應麟見聞殫洽學殖淵源嘗登詞翰之科則
宜游宏達之林矣雍容冊府蓋將養資望培器業以
大其所成就也賦三都奏二漢無取焉勉爾猷爲對

予寵渥

陳譜

七月甲戌彗星見於柳芒角燭天長十

餘丈自四更從東方見日高方斂凡月餘

據宋史詔天文志

求直言先生率同舍五人扣閣上書極論執政侍從
臺諫之罪積私財行公田之害又言應天變莫先回
人心回人心莫先受直言箝天下之口沮直臣之氣
如應天何時直言者多忤權臣故先生及之

錢譜文
簡略據

本傳 八月輪對延和殿有旨繳進 兼沂靖惠王府

教授 九月赴講堂講禮記 遷行祕書著作佐郎

錢譜繫在度宗登極前與擴
記合陳譜繫十二月恐非 ○制書省有位非元元

本本殫見洽聞者不得與於斯文也爾應麟精筆妙
墨蚤擢詞科記事纂言見謂博識文采炳蔚學殖深

王深寧先生年譜

張

十六 四明叢書

約園刊本

長讀中祕書既並游於東觀攝名表印營草奏於南
宮序遷史筵益觀文筆緬懷元豐更官初皇祖大訓
以爲非蘇軾不可茲豈直取人於詞藝閒哉尙企前
修益培遠業

陳譜

十月丁卯理宗崩度宗卽位三日

日庚午宰執文武百官詣祥曦殿表請聽政先生兼
攝禮部郎官草百官表撰請御正殿三表

據四明文
獻集參本

紀 十一月壬申宰政以下日表請視朝故事嗣君

御殿丞相四上表卽允一夕百官會臨宮中似道命
省吏致命於臨次曰嗣君入纂大統禮宜加多願郎

中增撰三表先生卽臨次具以進

錢譜簡略依本紀延祐四明志增又

案錢譜云奉旨增撰陳譜云有旨增撰然增撰出自似道之意非由度宗不謂之爲旨

撰賀

冬至節表

據四明文獻集增原無年月按文中兩稱甲子明係是年表資因附繫於此

推登極改元恩先生轉朝奉郎

制

日生民立君故尊居

於大寶惟辟作福斯溥錫於湛恩茲予一人踐阼之

初是人臣委質之始粵從京秩遞進華階臣事君以

忠宜勤厥職官量能而授嗣選爾勞

陳譜

朱貔孫以

華文閣學士知寧國府有代謝華文閣學士知寧國

表據四明文獻集參朱貔孫傳案集中不著所代人性名考宋史朱貔孫傳云度宗卽位以舊學故雅

王深寧先生年譜

張

十七

四明叢書

欲留貔孫使者旁午於道而貔孫辭益力以華文閣學士知寧國府惟傳中不載年月今依繫卽位之年

末 十二月甲辰以上生日爲乾會節撰請上乾會

節名四表

據四明文獻集參本紀

草嗣榮王與芮賜詔書不

名依前皇叔太師武康寧江軍節度使判大宗正嗣

榮王加食邑一千戶食實封四百戶

據四明文獻集參三朝政要本

紀不載政要云上卽位時

度宗咸淳元年乙丑四十三歲

正月戊申乾會節進功德疏撰謝獎諭表

據四明文獻集本紀

直學士院馬廷鸞知貢舉有旨攝直學士院

陳譜

二月理宗靈駕發引有慰度宗皇帝表慰皇太后表
慰皇后表及理宗靈駕至攢宮安奉又有慰度宗皇

帝表慰皇太后表慰皇后表

據四明文獻集

趙葵授少傅

先生草趙葵特授少傅依前觀文殿大學士充醴泉

觀使冀國公加食邑食實封仍令所司擇日備禮冊

命制

據四明文獻集集中注云二月三日考本紀及宰相表均不載趙葵本傳云咸淳元年加少傅

三月兼權禮部郎官

丞相賈似道護山陵禮異

癸酉乞解機政

六字據本紀

令作辭表三通吏拱立以俟

先生從容授之似道大驚異

案錢諸陳譜均類繫於增請視朝三表後今據

王深寧先生年譜

卷

四明叢書約圖刊本

本紀繫此又按三表今俱佚

甲申葬理宗於永穆陵虞主至行

在羣臣詣殿行九虞祭第一虞至六虞太常卿行禮

第七虞至九虞皇帝親行禮先生撰九虞祭告文九

章

據四明文獻集參本紀禮志凶禮一

四月考太學補試

陳譜 閏五

月兼翰林權直學士院崇政殿說書

陳譜

六月經筵

進講周易讀稽古錄

陳譜

七月除著作郎

謂著作郎非蘇軾不可聖眷厚矣然軾未嘗一日安

其位其爲名表郎爲翰林學士則皆元祐初年也爾

種學續文遂登朝列今由少著升大著且一日盡踐

軾所居官望彌厚矣其益以軾之文章節義自勉以稱子意陳譜是年程元鳳授少保草程元鳳特授少

保依前觀文殿大學士充醴泉觀使新安郡開國公

加食邑食實封制據四明文獻集本紀宰相表不載元鳳傳在度宗初卽位無月日附

年未下同高斯得兼侍講草高斯得依前起居舍人特

授侍講誥據四明文獻集參高斯得傳案集目作侍讀刊本誤考本傳作兼侍講至摺翰林知

制誥始摺侍讀

二年丙寅四十四歲

正月除守軍器少監制日朕妙揀臣工分典戎器以詞

王深寧先生年譜

十九四明叢書

約園刊本

臣領率循神考之規繇望郎進有若阜陵之睠爾精

探力索殫見洽聞承明著作之庭稽古禮文之事大

易辨問之學兩漢制誥之風爲邦之光咨爾大雅蓋

國家明政必閒暇之時而器械精能須文學之士已

若茲監以修我戎其課參軍而升倬直忠信爲甲冑

可殫武庫之材文章瑞朝廷尙懋儒林之業陳譜經

筵值人日雪帝問有何故事先生以唐李嶠李乂等

應制詩對帝問以下十因奏春雪過多民生飢寒宜

謹感召陳譜按錢譜在丁卯今依宋史訂正命舉廉吏草舉廉吏詔

據四明文獻集參宋季三朝政
要集目旁注詞科二字恐非

升兼學士院權直

陳譜 三月援淳熙詞臣倪思故事乞免兼禮部郎有

旨依所乞免兼

陳譜

九月轉朝散郎除將作監

日梓

慶之論靜心者能爲輪扁之言讀書者有取欲觀聖人之作疇若匠氏之功以爾振發純英滋漸名訓更日番入時則賴以質疑三年弗言時則資之作命往服乃事以修我戎甫茲視朔宜爾陟序朕奉苑囿無所資益雉監遂號於簡清若室家惟其塗茨鴻業正思於潤色靡有虛張之繕可以大肆於文直中繩曲

王深寧先生年譜

張

二十四明叢書

約園刊本

中規爾尙助予而勸學材有美工有巧朕方用汝以爲良若時超遷嗣有殊渥

陳譜

帝視朝謂先生曰爲

學要灼見古人之心對曰嚴恭寅畏不敢怠皇克勤克儉無自縱欲強以馭下制事以斷此古人之心然操舍易忽於眇縣兢業每忘於游衍帝嘉納之旣而輪對言人君防未萌之欲存不已之誠

陳譜祇載輪對語餘據本

傳

十一月賜緋魚袋

陳譜在元年乙丑據謝記繫此陳蓋沿家乘之謬

十二月先生叔父宗正少卿正甫公拯卒

陳譜

三年丁卯四十五歲

正月己丑朔郊先生爲禮部郎官奏解嚴撰擬賀郊

祀禮成進詩表黎明肆赦先生撰郊祀大禮赦文首

詞尾詞案撰擬以下廿四字據四明文獻集
本紀補日又案赦文見咸淳遺事丁酉

奉皇太后寶上尊號曰壽和辛丑皇太后受冊禮先

生以太常博士爲前導壽和太和冊寶官參本紀禮成

封贈謝氏草謝堂該明堂恩曾祖深甫特贈太師進

封魯王祖渠伯特贈太師追封魏王父奕昌特贈太

師追封魏王母吳氏特贈齊魏國夫人四誥據四明文獻集

參謝太后傳戊申帝詣太學行舍茶禮以曾參孔伋升

王深寧先生年譜

二二四明叢書

約園刊本

十哲之位配食大成先生撰酌獻曾參邾國公孔伋

沂國公樂章二首據四明文獻集參本紀二月乙丑詔賈似

道專拜平章軍國重事左右相葉夢鼎江萬里皆畏

避去似道亦求去上悞恐不知所以先生在經筵奏

言孝宗朝闕相亦逾年上亟取慰諭之似道大疑上

語安所從得後知從經筵所授深忌之據元祐志參本傳按陳譜

祇載數語然素重先生語包恢曰我去朝士若王伯厚者

多矣但此人素著文學名不欲使天下謂我棄士彼

盍少思自貶恢以言告先生笑曰忤相之患小負君

之罪大 是月草資政殿學士江萬里上表辭免同

知樞密院事不允仍斷來章批答陳三月兼侍立

修注官升權直學士院錢以明堂恩數轉官據咸淳

被文曰右史王應麟除禮部侍郎然除禮侍乃此年事誤入於彼時也 草呂文德依

前少保寧武保康軍節度使荆湖安制置大使屯田

大使兼四川策應大使兼荆鄂州軍州事兼管內勸

農營田使兼侍衛馬軍都指揮使霍邱郡開國公加

食邑七百戶食實封三百戶制據四明文獻集案此

有云稽定郊祀而允集壇稽正月於漢典見宗祖而躬執禮參元日於唐儀乾度昭清坤儀肅穆聞金支

王深寧先生年譜張

三 四明叢書

羽林之樂時則興鼙鼓之思觀玉路辰旂之口時則念旂常之績云云則此制當是明堂恩數轉官也

四月次子昌世生陳譜依家乘附元年今據六月

癸酉美人楊進封淑妃草楊淑妃制據四明文獻

八月輪對陳譜按此見家乘意當乙丑草嗣榮王

進封福王主榮王祀事加食邑一千戶食實封四百

戶仍令所司擇日備禮冊命制據四明文獻集參

十月庚申復開州草賜呂文德收復開州江面肅清

獎諭詔據四明文獻集參本紀增甲戌大雷電據

紀補日咸淳遺事作十一月戊子與紀異先生奏十月之雷惟東漢數見

命令不專姦衰並進卑踰尊外陵內之象當清天君

謹天命體天德以回天心十四字據本傳守成必法祖宗御

治必總威福似道聞之益惡斥逐之意遂決陳譜按本傳冬

雷事在遷起居舍人之後竊疑本傳或與咸淳遺事同故在十一月錢譜繫四年九月庚申似誤

是月除祕書少監制曰我朝治合古則燭興景化五星

聚奎之歲兆於文明上帝羣玉之府處以儒素爾學

醇而富詞麗以則講論經理諸老生未能言藻繪上

命古訓誥無以過今其命爾貳我書省飾我王度少

遽乃從臣之選中禁非他司之比所典領者重對時

王深寧先生年譜張

三四明叢書約園刊本

嘉遇尙克不欽陳譜升兼侍講制曰朕惟我高宗紹開

中興垂精典學爰命臣震貳中祕監執經講幄緝熙

光明之盛垂法萬世朕甚慕焉以爾博綜百氏之籍

自成一家之文代言釐禁以潤色皇猷載筆螭坳以

謹書國典雍容金華之晚席發揮聖人之微言朕日

聞仁義之陳庶幾三益之友是用一日二席陞侍細

旃爾其飽觀天祿石渠之藏敷暢義文周孔之祕俾

朕迪我高后之德爾亦與有無窮之聞陳譜上疏論

市舶不報陳譜十一月進講毛詩禮記陳譜除起居

舍人兼權中書舍人書行吏右禮工房制朕觀一陽

之來復登羣獻以同升君舉必書古有太史友王言

作命今爲三舍人爾博學精通靖其正直講昭素之

易見遇於乾龍類臣珪之文可追於西漢伊昔書洪

範三德上端拱一箴介於兩省之聯萃乃一家之懿

成爾顯德配前人文是用擢寘右螭兼典西掖事書

之策予將廔乎樞機情見乎辭亦尙思乎潤色庶幾

起居號令之重常如準繩規矩之陳則罔所愆亦克

用勸陳經筵進讀孝宗寶訓終篇轉朝請制耶日歷

王深寧先生年譜

張

二西四明叢書

約園刊本

代寶爲訓於皇烈祖之謨三王惟其師允賴儒臣之

益爰肆開於經幄用祇若於先猷亦旣徹篇可後褒

典爾學博而有守文贍而不浮談經得聖人之微摛

辭鼓天下之動琅然細氈之講誦秩若成憲之昭明

予欲率由舊章爾惟訓於朕志進升華序將大多開

治願力行敢替詒謀之德學無止法尙廩藥石之忠

陳譜按家乘轉朝散郎在三月陞權直學士院下與

擴記不合且丙寅九月已載不宜復出依擴記移正

推先生旣轉是階而庚午慶元府學大成殿記仍繫

朝散郎殊不可解豈擴記亦有誤歟附疑俟考竊按

彼散字或十二月以柱史故事牒閣門直前奏對

傳鈔之誤

言用人莫先察君子小人當國者疑之方袖疏侍班
後殿臺臣亟疏駁之由是二史直前之制遂廢按陳譜有

云御筆除職與祠錢譜不載蓋除職與祠在明年夏也明年正月猶掌制 是年先生與

右丞相葉夢鼎以文章政事薦孫枝子璿於朝命知

臨海縣事據至正續志孫枝傳 謝枋得自興國軍貶所放還

除史館草謝枋得特授祕書省著作郎兼權司封郎

誥據四明文獻集參昭忠錄枋得傳

四年戊辰四十六歲

閏正月草科舉詔據四明文獻集咸淳遺事 除祕閣修撰主管

王深寧先生年譜張

二五四明叢書約園刊本

建康府崇禧觀日□□□□□□□□□□賢者出

處之際胡遽浩然深嫌予衷用全體貌爾性行端謹

問學淹該緝熙光明有類執經之益討論潤色無非

宜誥之文甫修立坳乃懷居里是用寵以書林誤次

之職供以詞館恬養之真載思丹地之代言於斯為

稱毋乃碧山之不負行矣遄歸陳譜 夏夢游真逸閣

撰真逸閣記據延祐四明志

五年己巳四十七歲

十二月依舊職差知徽州陳譜按錢譜以朝奉大夫祕閣修撰然據先生慶元

府學重建大成殿記後繫銜朝散郎祕閣同修撰知
徽州軍州事兼管內勸農營田事節制軍馬云云錢
譜談也
以父諱近州名辭免不允陳譜

六年庚午四十八歲

三月先生至徽州任吏部公守郡民稱清白太守先
生始至父老慶曰此吾清白太守子也在郡遵節用
愛人之訓例所不取者悉以予民曰絹曰折帛錢皆
蠲一分先期代納曰布麥錢曰下戶鹽隨衣折斛錢
曰坊場錢銀皆爲民代輸又減權酷月額免折帛茶
租月椿舊欠除免糧錢增活人倉田又以十二萬楮

王深寧先生年譜

張

王四明叢書
約園刊本

爲平糶本有水旱則以告糶始至郡時帑纔八萬去
之日凡二十七萬陳譜 頒賜正月丁卯御製牧民訓

牧民銘於州廨摹刻上石有謝賜御製牧民訓牧民

銘表進御製石刻摹本表

據四明文獻
集參本紀

轉朝奉大

夫陳譜

八月洪燾重建慶元府學大成殿撰重建記

錢譜

刻羅願爾雅翼於郡齋爲文序之錢譜

是年嘗

造邑人方回家與談論彌日

據方回小
學紺珠序

七年辛未四十九歲

先生在徽州任

陳譜

正月乙丑皇子是授左衛上將

軍進封建國公有皇子賜名進封建國公表

據四明文獻集

參本紀

七月除祕書監兼樞中書舍人

制曰

內史掌王

命外史掌書志職綦重也迺今合二命而畀一儒選顧不重矣乎以爾學廣聞多筆精墨妙書林詞掖昔嘗從事於斯矣頃守新安亦既期月治狀云最迭入爲宜茲命領裏大雅之靈仍兼代言之職以蟠胸之典籍爲近古之訓辭顧不美歟

陳譜

先是劉克壯湯漢死眾論掌制以先生陳合馮夢得三人爲首馮陳適以故去先生守微方踰年似道始曰非伯厚不可

王深寧先生年譜

三七四明叢書

約園刊本

因有是召

據延祐四明志

先生再辭不允有旨候代

據延祐四明志

按本紀是時湯漢未卒

十月轉朝散大夫

陳譜

解郡組造朝

供職

書行吏右禮刑房兼國史院編修實錄院

檢討官兼侍講

制曰

王人求多聞惟學遜志羣臣示顯

行佛時仔肩茲以爾汲古用功績文覃思太守與我其理歌乃稭孺大雅於茲爲羣職司誥制是維儀鴻之吉宜侍清燕之閒惟大學知修齊治平之方而史志著古今得失之迹資爾敷繹迪朕就將世南五絕之稱識其大者祖禹三昧之譽企其齊而

陳譜

進講

禮記大學讀九朝通略通鑑綱目

陳譜

十一月除起

居郎仍權中書舍人兼權吏部侍郎

制

書動有史莫

重於左坳貳職守曹莫劇於右選共貳厥事取諸其

能爾節勁氣饒學醇才粹東壁圖書之府領袖儒流

中會冊奏之工黼藻王度望孚已久明陟爲宜迺升

侍極之華仍攝廷臣之要倚相能讀墳典可知紀錄

之公王劇可掌銓衡蓋取品評之審往欽乃職毋遜

前聞

陳譜

十二月己亥謝方叔特敘復元官職惠國

公致仕有謝方叔特授特進依前觀文殿大學士惠

王深齋先生年譜

張

三六

四明叢書

國公致仕加食邑食實封制

據四明文獻集參本紀

是年草

皆萬壽特授復州團練使知嘉定府兼成都路安撫

副使誥

據四明文獻集

八年壬申五十歲

二月癸巳謝方叔卒贈少師草謝方叔特贈少師誥

據四明文獻集參本紀

三月進講禮記徹章賜御製詩天高

地下禮由分聖哲于焉重糾紛心法操存無不敬治

功顯設在斯文會通自可躋明盛品節因知重儉勤

游夏講磨資眾彥精微盡處是尊聞

陳譜

轉朝請大

夫制禮設莊敬恭儉具存載籍之間學有緝熙光明
允賴羣儒之助屆時竟帙懋賞有彝爾業履粹精文
章蔚瞻螭坳載筆仍參讞約之司虎覲談經具有切
磨之益乃若漢儒之禮記無非孔氏之格言三百三
千儀文悉備多聞多見考論無遺雖明道未嘗計功
然用德所以彰善特頒褒頌爰進文階大夫執圭取
彼春朝秋請之義從臣第頌弘我上嘉下樂之規

陳譜

六月丁酉有章鑑特授端明殿學士同簽樞密院

事話

據四明文獻集參本紀

七月書行吏左戶房

陳譜

元兵

王深寧先生年譜

張

元

四明叢書

約園刊本

久圍襄樊上疏極言邊事經筵指陳成敗順逆之說
且曰國家所恃者大江襄樊其喉舌議不容緩朝廷
方從容如常時事幾一失豈能自安時朝廷無以邊
事言者帝不懌似道復謀斥逐之

陳譜附七年辛未非據本紀本傳繫

此 九月祀明堂攝左相進玉幣爵

陳譜

丁丑陳太

碩人卒先生丁母憂歸居於鄞

錢譜

九年癸酉五十一歲

六月撰輯周易鄭康成注

錢譜

十年甲戌五十二歲

七月癸未嘉國公卽位

錢譜

十二月服闋先生詣臨

安造朝

按陳譜造朝在明年四月而二月又有云二月有旨令慶元守臣勉諭赴闕然四明文獻

集中如高達授少保制本紀在二月加張世傑授保康軍使制唐震贈華文制在三月則二三月皆在按垣當制安得謂四月始造朝哉錢譜以爲三月服闋亦未合

恭帝德祐元年乙亥五十三歲

正月葉夢鼎上封事特授醴泉觀使兼侍讀不拜草

葉夢鼎特授醴泉觀使兼侍讀依前少傅觀文殿大

學士信國公加食邑食實封制

據四明文獻集參葉夢鼎傳

以

黃萬石爲江西制置使草黃萬百依前資政殿學士

王深奎先生年譜

辛四明叢書

特升江西制置大使兼江西轉運使誥

據四明文獻集薛應旂續

通鑑 草顯謨閣直學士兩淮制置使知揚州李庭芝

築城獎諭詔

據四明文獻集按本紀李庭芝築清河城以圖來上詔庭芝進一秩在咸淳十

年八月惟是時先生服未及禫安有當制草詔之事而庭芝別築他城則本紀及傳無考豈下詔在隔年

敷姑附正

月末俟考 李庭芝制置淮東擢陸秀夫爲參議官草

陸秀夫特授淮東提刑兼淮東制置使參議官誥

據四

明文獻集參陸秀夫傳按陸秀夫傳云咸淳十年擢參議官或賜誥在隔年敷姑附正月末俟考

二月甲辰高達檢校少保草高達授少保依前寧江

節度左金吾衛上將軍荆湖北路制置副使兼安撫

使馬步軍都總管府兼知江陵軍府事兼管內勸農
營田使節制知本府屯戍軍馬固始郡開國公加食

邑食寶封制

據四明文獻
集參本紀

草孫虎臣授清遠軍節

度使加食邑食寶封制 庚申賈似道潰師江上畿

甸震動 丙寅趣文天祥入衛草賜文天祥詔 庚

午令夏貴以所部兵入衛草賜夏貴詔 令省萬壽

將兵入衛草賜省萬壽詔

以上均據四明
文獻集參本紀

時朝士

多棄去侍從班惟楊文仲留詔旌二階文仲疾甚旬

祠命知漳州草楊文仲特授集英殿修撰知漳州誥

王深寧先生年譜

四明叢書
約圖刊本

文仲三上章乞休致改知泉州 呂大圭知漳州草

呂大圭特授祕閣修撰知漳州誥

據四明文獻集
參楊文仲傳

三月除中書舍人兼直學士院

制

彩筆代言地莫重

於修省王堂揮翰職尤重於北門妙選一儒俾當兩

制朝請大夫王應麟若古吉士爲今聞人蘊藉宏深

富諸子百家之學文章爾雅有三代兩漢之風頃嘗

典於絲綸見謂工於黼黻矧當事機倥傯之會茲乃

詞命填委之時惟誥可以回迷民惟詔可以戢悍卒

惟立馬一揮之制各得其體惟狡兔三穴之語切中

其機茲惟汝能不匿厥指昔在元祐軾以紫薇而掌

禁林粵若建炎藻以披垣而兼翰苑罔俾專美其昌

斯文陳譜庚辰草唐震特贈華文閣待制印應雷特

贈端明殿學士誥據四明文獻集參本紀乙酉加張世傑保

康軍節度使草張世傑特授保康軍節度使左金吾

衛上將軍浙西制置副使兼知平江府仍舊帶行樞

密都承旨揚州駐劄御前諸軍都統行樞督府總統

一應軍馬加食邑食實封制據四明文獻集參本紀贈江萬

里太傅益國公草江萬里特贈太傅誥據四明文獻集參江萬里

王深寧先生年譜

三三四明叢書

傳

是月陳宜中起復劉黻草劉黻起復授端明殿

學士知慶元府沿海制置使誥據四明文獻集參劉黻傳黻初以集英修

撰知慶元至似道潰師復投載不起草文天祥特授集英殿修撰都

承旨依舊江西安撫副使誥據四明文獻集參龔開文信國傳事在三月

四月內殿奏對暫權給事中吏部尚書兼掌外制

書行吏左戶兵刑房陳譜正謝賜紫金魚袋兼同修

國史實錄院同修撰兼侍讀制朕監於成憲惟敬學

積厥躬佛時仔肩以光明示我德妙柬多聞之彥俾

居勸誦之班朝請大夫試中書舍人兼直學士院新

兼同修國史實錄院同修撰賜紫金魚袋王應麟高明而沈潛閎通而博雅造詣得儒先之奧游夏淵源文章爲時人之宗卿雲河漢豈惟言語妙天下方將仁義陳王朝爰躋進讀之聯庶幾納誨之助昔蘇軾之在西掖嘗侍邇英而德秀之入翰林亦兼經幄此乃我朝崇儒之意而况新政訪落之初懋乃嘉猷光乃前哲正心誠意之說朕所欲聞陳善責難之恭爾所素講殫爾忠藎輔我緝熙

陳譜

上疏陳十事曰急

征討曰明政刑曰厲廉恥曰通下情曰求將材曰練

王深寧先生年譜

張

三三四明叢書
約園刊本

軍實曰備糧餉曰舉實才曰擇牧守曰防海道且言圖大患者必略細故求實效者必去虛文請集諸勤王之師厚賞以作氣惟能戰斯可守

陳譜

甲辰以高

斯得言加贈江萬里太師諡文忠草江萬里特贈太師誥

據四明文獻集參本紀及高斯得江萬里傳

乙卯

本紀在五
月丁丑

劉師

勇復常州以姚嘗知常州草姚嘗特授帶行太府寺

丞依舊知常州誥

據四明文獻集參昭忠錄

己酉命劉師勇守

平江草劉師勇特授左武大夫依前濠州團練使帶

御器械平江府駐劄諸軍都統制誥

據四明文獻集參本紀

丙辰詔夏貴入衛草賜淮西制置大使夏貴獎諭詔
草夏松特贈保康軍節度使誥

據四明文獻集參本紀

李

庭芝率所部郡縣城扼守日調苗再成戰其南許文德戰其北姜才戰其中將士用命丁卯加李庭芝參知政事草賜李庭芝獎諭詔草李庭芝特授參知政事依舊淮東安撫制置大使兼知揚州淮西策應大使誥 草姜才依前右武大夫特授揚州防禦使依舊建康府駐劄御前諸軍都統制誥草許文德特授揚州觀察使依舊知淮安州淮東安撫使兼淮東策

王深寧先生年譜

三函四明叢書

約園刊本

應使誥草苗再成特授拱衛大夫依前知口州防禦除帶行御器械知眞州誥

以上均據四明文獻集參本紀李庭芝傳

五

月甲戌命李庭芝津遣賈似道歸身終喪草賈諭賈似道終喪詔

據四明文獻集注五月四日按是月辛未朔

己卯草王柏

特贈承事郎誥 加張珏檢少保知重慶府草賜四

川制置使兼知重慶府詔 庚寅草勉諭王爚陳宜

中詔

據四明文獻集原注五月二十日

丙申遣使以元兵至告天

地宗廟社稷撰遣守臣走告南嶽奏告滁州端命殿太祖皇帝神御文 己亥草趙與穡特贈朝請郎直

華文閣話 六月庚子朔日有食之既晝晦如夜星

見雞鷲皆歸十一字據宋史天文志 草日食求言詔據四明文獻集詔又

見三朝 應詔言答天戒五事陳備禦十策錢譜 進

讀三朝寶訓陳譜 丙午言開慶之禍始於丁大全凡

大全之黨在謫籍者皆勿宥從之據本紀 己酉繳還

章鑑曾淵子錄黃言韓震爲逆二人實庇之且淵子

庇翁應龍致有逸罰又嘗竊府庫金以遁庚戌削鑑

一官放歸田里淵子再削一官徙吉州誅翁應龍籍

其家據本紀 甲寅王爚請相留夢炎乞以經筵備顯

王深寧先生年譜張 四明叢書

問陳宜中請相夢炎乞祠草王爚依前少保特授平

章軍國重事一月兩赴經筵五日一朝仍赴都堂議

加食邑食實封制草陳宜中特授左丞相依前兼樞

密使都督諸路軍馬加食邑食實封制草留夢炎特

授宣奉大夫右丞相兼樞密使都督諸路軍馬加食

邑食實封制據四明文獻集參本紀 己未草加李庭芝知樞

密院事兼參知政事誥李庭芝妻徐氏特封永國夫

人誥據四明文獻集參薛應旂續通鑑 辛酉草賜利西路安撫副

使兼知涪州楊立詔據四明文獻集集注 家鉉翁

云六月二十二日

依前直華文閣樞密副都承旨特授知臨安府浙西

安撫使誥

據四明文獻集參
宋季三朝政要

庚申復繳還曾淵子

貶吉州錄黃癸亥貶韶州

據本
紀

七月除試尚書禮

部侍郎兼中書舍人兼書行吏右

制

朕宏濟時艱旁

求眾正夷典朕禮所以立天下之經說代予言所以

見王者之志於昭並命允謂得人朝請大夫試中書

舍人兼直學士院兼同修國史實錄院同修撰兼侍

讀賜紫金魚袋王應麟肅括而宏深高明而篤實銅

川之傳遠矣厥有淵源鐵筆之操凜然不滑涇渭屬

王深寧先生年譜

張

三

四明叢書
約園刊本

更大化服在邇聯其文字可獨行於中朝其論奏可

昭示於當世以崇禮勁節並燭偃月之姦以黼藻偉

詞潤色中天之業若疇時望進貳春卿俾綸掖之兼

行示囊班之增重粵若穆陵之初政惟時建水之名

儒未及分六省之書已擢置少常之列邇今併錫視

昔有加疊五組其輝扶若餘刃之恢拓噫禮信之士

則被廬伸蒐討之威赦令之孚則山東興忠憤之感

體予至意懋爾遠猷

陳譜原注兼給事中黃鑄行
時西掖獨員送給舍行詞

辭免不允制朕當國事多艱之時命卿貳春官掌西

掖豈緩於武而急於文哉昔人謂班朝治軍非禮威
嚴不行詔書之下能令武夫悍卒感泣文事必有武
備豈不信然卿文行粹明論奏剴切足以折姦朋之
鋒植善類之幟卿其爲朕辨上下之分以肅軍容敷
心腹之告以作士氣渙號已敷需章爲贅所辭宜不
允

陳譜原注給
事云云同前

庚午朔江西制置黃萬石移治撫

州詔還隆興府甲戌草勉諭江西制置大使黃萬石
置司隆興府詔

據四明文獻
集參本紀

先生請移買似道鄰

州甲戌移婺州丁丑徙建寧府權直舍人方應發封

王深寧先生年譜

卷四 四明叢書
約園刊本

還錄黃乞竄之嶺南先生與黃鏞又言之不從

據賈
似道

傳參
本紀

辛巳草賜夏貴詔

據四明文獻集原
注七月十一日

癸巳

以夏貴知揚州召李庭芝赴行在夏貴不受代李庭

芝閉門自守草賜李庭芝詔

據四明文獻集參
宋季三朝政要

王

燦喉京學生劉九舉等言陳宜中擅權書宜中徑去

遣使四輩召之壬辰下九舉於臨安獄癸巳草賜左

丞相陳宜中勉諭詔

據四明文獻集參薛續通
鑑原注七月二十四日

丁

酉草賜淮東制置大使李庭芝詔

據四明文獻集原
注七月二十八日

戊戌遣使召陳宜中還朝草再賜陳宜中詔

據四
明文

獻集參
本紀

是月與右史徐宗仁乞追復饒虎臣原官

得旨守資政殿學士致仕

據饒虎臣傳按傳稱禮部侍郎不得其日姑繫於此

草汪立信特贈正奉大夫誥

據四明文獻集

八月正謝

賜金帶

陳

壬寅加夏貴樞密副使兩淮宣撫大使

草夏貴授兩淮宣撫大使知揚州依前開府儀同三

司寧武軍節度使左金吾衛上將軍樞密副使兼侍

衛馬軍都指揮使加食邑食實封制

據四明文獻集參本紀

陳宜中以母老辭回永嘉丁巳遣使召還草勉諭陳

宜中詔

據四明文獻集參本紀宋季三朝政要

加張世傑神龍衛四

王深寧先生年譜

三

四明叢書約圖刊本

廂都指揮使總督府諸兵草張世傑依前保康軍承

宣使帶行樞密都旨特授龍神衛四廂都指揮使誥

據四明文獻集參本紀

草獎諭張世傑詔

據四明文獻集

戊午趙

洪除大理少卿先生封還錄黃言昔內外以寶玉獻

似道淇兄弟爲甚己未遂罷之

據本紀

甲子以文天

祥爲浙西江東制置使兼知平江府草文天祥依前

權工部尚書都督府參議軍事江西安撫使特授浙

西江東制置使兼知平江誥天祥辭免草賜文天祥

辭免不允詔

據四明文獻集參本紀

庚申草張起巖依前武

功大夫復州團練使特升除帶御器械知夔州兼夔
路安撫副使誥草賜知夔州張起巖獎諭詔

據四明
文獻集

原注八月二十二
日是月己亥朔

是月草楊立依前右武大夫加

口州觀察使依舊知涪州誥

據四明
文獻集

九月辛未加

田謹賢福州觀察使楊邦憲利州觀察使趣入衛草
田謹賢特授親衛大夫福建觀察使依舊知恩州兼

御前諸軍都統制誥楊邦憲特授親衛大夫利州觀

察使依舊知播州兼御前諸軍都統制誥

據四明文
獻集參本

紀 辛巳有事於明堂先生以禮部侍郎眡滌濯九

王深寧先生年譜

三十九四明巖書
約園刊本

成黎明肆赦撰明堂大禮赦文首尾詞

據四明文獻
集原注九月

十四日 以明堂恩數加封鄞縣開國伯食邑九百戶

制 嗟臣工而助祭清廟所以頌於周崇禮官而考文

明堂所以圖於漢若稽古誼肇舉宗禋維時持橐之

英相我越紉之事肆均駿惠式協慶餘朝請大夫試

尙書禮部侍郎兼中書舍人兼直學士院兼同修國

史實錄院同修撰兼侍讀賜紫金魚袋王應麟心正

而氣和學博而識茂欽予時命旨疊典詔之文咨汝

秩宗非屑玉帛之末屬中辛之饗報於先甲以思恭

發帝之制則爾潤色於皇猷酌時之宜則爾討論於玉律於昭穆穆皇皇之祀爰賴元元本本之儒矧侍祠而肅然咸秉聰而對越神人歡洽祉福函蒙於邑始封惟祭有澤伯之食四一茲循六典之規禮之儀

三千其懋中庸之學陳譜推明堂任子恩子昌世授

承務郎 草常楙特授端明殿學士提領戶部財用

詔據四明文獻集參常楙傳已丑弟應鳳由淮西

制置司參議官九字據成化四明志以文天祥薦召為太常博

士甫入國門而卒所著有默齋稿及訂正三輔黃圖

王深寧先生年譜張 四十四明嚴書

所著以下據浙江通志 按陳譜此繫咸淳四年據

陳合撰公母陳太碩人墓銘為咸淳九年云應鳳官

至朝奉郎太常博士先五年卒家乘所載為信稿按

家乘陳譜謂其不足據此依家乘非也登科錄載應

鳳在寶祐四年時二十七歲其卒年則四十六其非

咸淳四年卒明矣文信國在四年適為似道劾罷至

九年始為湖南提刑彼時安有薦除陳合墓誌謂先

五年卒者太碩人先應鳳五年而卒非應鳳先陳太

碩人卒也蓋謂與先生為雙生子故必謂卒在四年而實未合至謂詞科漢郡縣山川風俗記為所著書則尤失之今依錢譜附繫於此 庚寅草孫虎臣特贈太尉誥據四明文獻集參 是月草李芾特授祕閣修撰樞密副都承

本紀 旨依舊知潭州兼湖南安撫湖北鎮撫使詔據四明文獻集

十月辛亥以加張世傑為沿江制置副使兼知江

陰軍兼浙西策應使草張世傑依前保康軍承宣使
樞密副都承旨特授沿江制置副使知江陰軍兼浙
西策應使誥草勉諭張世傑誥據四明文獻集參本紀 戊午

奏請立濟王後加封賜諡

陳譜

是月草楊立特授翊

衛大夫依前口州觀察使升帶行御器械知涪州

明文獻集

十一月庚午草陳文龍特授同知樞密兼權

參知政事誥

據四明文獻集參宰相表

癸酉草尹玉特贈濠州

團練使麻士龍特贈高州刺史誥

據四明文獻集參本紀

草

張起巖特授寧遠軍承宣使龍神衛四廂都指揮使

王深寧先生年譜

張

早四明叢書
約園刊本

依舊知夔州兼夔路安撫副使誥

據四明文獻集

除兼禮

部尚書辭免不允制周富有宗伯大小之職大禮則

小佐大之事小禮則大如小之儀大者倡而小者隨

大者專而小者貳也卿博學之識貫穿九流渾灑之

文斧藻兩制言論雖歸於忠厚封駁不避於權豪爰

陟貳卿禮典具備俾攝常伯民譽必隆周官大小之

職悉以付卿昔叔孫不憚口口之難虞廷不聽秩官

之遜亟其祗受奚以辭爲所辭宜不允

陳譜案錢譜繫十一月陳

譜移十月然辭免兼給事中本紀在甲申日若在十月似不應隔二十餘日始有辭免不允之事今雖不

得其日仍依錢
譜附十一月

甲申除禮部尙書兼給事中辭免

不允曰朕未有識知博采羣英孰司禮如珪之賢負

台斗望孰批敕如藩之正號宰相材以卿學質而文
華行端而履潔在詞垣則封駁有直氣居從列則獻

納多嘉謨是用酌之僉言責以二命能貳秩宗必能
長寅清之職能還誥命必能專封駁之長鎮之執五

詔如初軾之陳六事有益佇聞忠告何媿前修矧國
家艱難之時非臣子辭遜之日亟祗成渙毋事沖謙

所辭宜不允

陳譜原注兼權中書舍人方應發
撰時翰苑獨員並送西掖草詔

辭

王深寧先生年譜

聖四明叢書

約園刊本

兼中書舍人從之 丙戌贈濟王太師尙書令進封

鎮王諡昭肅令福王與芮擇後奉祀賜田萬畝

據本
紀

遣先生致祭撰祭濟王文

據四明
文獻集

兼攝吏部尙書

草翁合特授試尙書禮部侍郎誥

據四明
文獻集

草趙

孟傳特授華文閣直學士沿海制置使知慶元府誥
癸巳以張世傑爲浙西制置副使兼知平江府草

張世傑特授保康軍節度使左金吾衛上將軍浙西
制置副使兼知平江府仍舊帶行樞密都承旨揚州

駐劄御前諸軍都統行樞督府總統一應軍馬加食

邑食實封制

據四明文獻集參本紀

左丞相留夢炎用徐夔

爲御史時江陵制置司朱禕孫江西制置司黃萬石皆北降夢炎猶除拜二人先生繳奏曰囊與夢炎同鄉有私人之嫌萬石蠹戾無學南昌失守誤國罪大今方欲引以自助善類爲所搏噬者必攜持以去吳浚貪墨輕躁豈宜用之況夢炎舛令慢諫讜言勿敢告今之賣降者多其任用之士疏再上不報出關俟命再奏曰因危急而紊紀綱以偏見而拂公議臣封駁不行與大臣異論勢不當留疏入又不報甲午遂

王深寧先生年譜

四

四明文獻書約圖刊本

東歸

陳譜參本紀

十二月丁未遣中使譚純德以翰林

學士宣召識者以爲奪其要路寵以清秩非所以待

賢士先生以力辭不赴

錢譜識者下二十五字據本傳

二年丙子五十四歲

是歲宋亡先生杜門不出朝夕坐堂上取經史諸書

講解論辨子昌世甫十歲

陳譜作十二歲依墓誌銘

聽受無倦自

是昌世於名理經制治道之體統古今禮典之因革

殊聞異見靡不悉究

自是以下據黃潛昌世墓誌

三月乙亥

元兵至鄞袁鏞與戰死作悼袁進士鏞詩

據四明文獻集參蔣

景高撰
袁鑑傳

是歲戴表元執弟子禮來受學

據清容集戴先生墓

誌竊按墓誌云咸淳辛未授建康府教授在建康以言語筆札爲己任後二年中秋歸時王公應麟師表一代先生獨執弟子禮竊謂其稱在建康則當王申至乙亥遷臨安府教授其後二年失秩似當在丙子

元世祖至元十四年丁丑五十五歲

袁洪遣其子桷來受業桷年十二歲

五字據至正直記

居門

下十年

五字據清容集師友淵源錄

○按錢陳二譜均繫二十四年丁亥據至正直記繫此

又按錢氏疑年錄稱桷生咸淳三年丁卯吳修謂甫里集伯長生咸淳二年丙寅竊考清容集先夫人行述及外祖母張氏墓誌皆自敘生於丙寅夏六月是丙寅年生之說爲確自丙寅至此年正十二歲

十五年戊寅五十六歲

王深寧先生年譜

四西四明叢書

約園刊本

十六年己卯五十七歲

十七年庚辰五十八歲

八月著通鑑地理通釋成

錢譜案本傳作十六卷今存本十四卷

是

歲長子良學卒官至兩浙運幹年三十三

陳譜

十八年辛巳五十九歲

五月著漢制考成

錢譜按本傳藝文志四卷今存

十九年壬午六十歲

作四明七觀

錢譜案又見鄞縣志三千餘言袁桷亦有七觀作于延祐三年七月趙孟頫

書爲七

作乾道四明圖經辨證

據四明延祐志

二十年癸未六十一歲

二十一年甲申六十二歲

二十二年乙酉六十三歲

二月夢前宰輔

錢譜云謂陳宜中

以太學所上書求作跋語

寤而識之以詩

案宜中在太學上書攻丁大全大全怒取旨削籍編管在寶祐四年見宋

季三朝政要

二十三年丙戌六十四歲

正月著踐阼篇集解

錢譜案藝文志作一卷今存

孔昭

孫爲慶元儒學正以通家子執疑證訛請益於門時

王深寧先生年譜

張

四

四明叢書

約園刊本

教授某恣睢自負語慢先生昭孫憤然疏其謬誕數

十事鳴於憲府

據清容集孔昭孫墓誌銘

案誌稱

已辨其非殆傳鈔刊本之誤今已莫可考證然文中云與稱每連席請益而稱自稱門下十年故繫於此

二十四年丁亥六十五歲

四月作舒文靖先生璘廣平書院記

案陳譜繫德祐乙亥蓋以文末

有乙亥二字也然文中云文靖先生晚始對策典教象山縣岸德祐初元歸老故里題戶丹曰廣平書塾

先生歿門人有像祠於塾奩飾堂序云云其非德祐乙亥可證矣乙字當是丁字之誤今姑移繫於此以

俟考

二十五年戊子六十六歲

二十六年己丑六十七歲

是歲台州胡元敍創建寧海赤城先生羅德業祠作

赤城書堂記

據台州府志

二十七年庚寅六十八歲

城中握蘭橋旁民家穿土得誌石一片其文乃唐開

成四年太原王夫人之墓文謂其曾祖王元浩

錢陳譜同

鄞縣志引宋詩紀事作浩

在玄宗時拜諫議大夫左庶子慕巢由

之志辭疾不就作詩紀之

錢譜

奉化令丁濟重修社

稷壇作奉化社稷壇記

陳譜

王深寧先生年譜

張

吳六

四明叢書

二十八年辛卯六十九歲

是冬肅政廉訪副使陳祥分治廣元路募先生名德

屢爲造廬式之時先生閉門不納客爲之尊禮開說

俾學者師事之

錢譜

案時字下二十字據清容集陳公祥神道碑增

陳祥造

船十有四聯貫巨纜

寧波府志

修州治城東東津浮橋作

修東津橋記

據四明志案原文云由長慶癸卯迨今四百六十九載因繫是年

二十九年壬辰七十歲

三月山長曹漢炎倡建書院於慈湖先生楊文元舊

宅故址成作慈湖書院記

錢譜

四月作觀文殿學士

史宇之墓誌銘

據四明文獻集

八月作奉化縣重修縣治

記

錢諸

九月慶元路肅政廉訪使陳祥重建儒學成

作慶元路重建儒學記陳祥建醫學成作慶元路建

醫學記

錢諸

三十年癸巳七十一歲

八月陳祥建鄞縣儒學成壬寅作鄞縣重建儒學記

修義田柱先賢祠堂成作先賢祠堂記

錢諸繫甲午十二月考原

文無年月惟文中有云自紹熙庚戌迄今百有四年則在癸巳是有顯證錢蓋因狄桂所建祠堂記亦稱先賢祠堂記誤以彼記歲月繫此文也

重錄四明七觀舊稿跋藏於

王深寧先生年譜

張

四明叢書

約園刊本

篋

案七觀跋云余頗識鄉里故事年六十始克爲之後十年篋中得舊稿不忍棄錄而藏之

三十一年甲午七十二歲

十二月丙子狄桂屬郡博士戴友復九先生祠祀甲

午作先賢祠祀堂記並作九先生傳

據延祐四明志按九先生爲楊

適杜醇王致樓郁王說舒璘沈煥楊簡袁燮

是歲先生與舒閻風劉正

仲陳西麓相倡酬於梅墟陳氏之世綸堂輯爲世綸

堂雅集詩卷

據全謝山句餘土音序參情容集鄞縣志

有格社耆英之遺

意

據清容集書詩卷

成宗元貞元年乙未七十三歲

二年丙申七十四歲

正月廉訪使完顏貞改建九先生祠堂於鄞縣尊經

閣之右作九先生祠堂記錢譜 六月十二日戊申先

生卒先期自爲墓銘陳譜 按四明文獻集浚儀遺

伯厚甫字也其先浚儀人居鄞自曾大父始也遺民

不忘舊也世系則先君吏部正奉先妣陳碩人誌銘

可見也先君擢第之歲與弟太常博士應鳳生同日

嘉定癸未七月也學以先君爲師伯仲自爲友閉門

讀書不妄交也年十九第進士乙科淳祐辛丑也年

三十四以博學宏詞擢用寶祐丙辰也初仕衛州西

安簿監戶部百萬倉主督浙西提舉常平鹽茶帳司

添差浙西安撫司幹辦公事登朝出爲添差通判合

州以祕閣修撰知徽州此在外所歷之官也始入朝

主管三省樞密院架閣文字國子錄武學博士太常

寺主簿又爲太常博士祕書郎兼沂靖惠王府教授

著作佐郎兼禮部郎翰林權直宗政殿說書遷著作郎

軍器少監陞學士院權直遷將作監陞權直學士院

兼侍立修注官遷祕書少監兼侍講遷起居舍人兼

編修實錄院同修撰兼侍讀遷禮部侍郎兼中書舍

錢譜

王深寧先生年譜

四四明叢書

約園刊本

全奕憾而在三之報有媿於古之人也銘曰學古而
迂志壹而愚其仕其止如倿如圖不足稱於遺老或
庶幾乎守隅歸從
十二月辛酉葬於鄞縣東四十
先人嚴兢免夫

五里同密陳譜云舊名同谷山子昌世作壙記據四明文獻集宋吏部尚書王

公壙記文曰先生王氏諱應麟字伯厚世居開封之

祥符曾大父諱安道武經大夫保信軍承宣使轉和

州觀察使始居四明之鄞縣妣陳氏龍氏並贈宜人

大父諱希亮朝散大夫妣張氏封宜人父諱擣朝請

大夫吏部郎中兼崇政殿說書累贈正奉大夫妣陳

氏封太碩人先公於嘉定十六年七月庚午與叔父

太常博士諱應鳳生同日登淳祐元年進士第授迪

功郎衢州西安縣主簿八年差監戶部平江府百萬

東倉明年升從事郎十二年差浙西提舉常平茶鹽

司主管帳司是歲丁吏部公憂實祐三年服闋差揚

州學教授四年中博學宏詞科有旨升擢添差浙西

安撫幹辦公事五年主管三省樞密院架閣文字除

王深雪先生年譜張四九四四明叢書

約園刊本

國子錄宣教郎六年除武學博士開慶元年除太常

寺主簿景定元年轉奉議郎添差通判台州四年轉

承議郎召為太常博士五年除行秘書兼沂清惠王

府教授遷著作佐郎度宗登極轉朝奉郎攝直學
士院權禮部郎官兼翰林權直兼崇政殿說書遷著
作郎二年除守軍器少監升兼學士院權直轉朝散
郎遷將作監賜緋魚袋三年兼侍立修注官升權直
學士院遷秘書少監兼侍講遷起居舍人兼權中書
舍人經筵徹章轉朝請郎四年除祕閣修撰主官建
康府崇禎觀五年仍舊職差知徽州吏部公舊治也
六年轉朝奉大夫七年召為祕書監權中書舍人兼
國史院編修官兼實錄院檢討官兼侍講遷起居郎
兼吏部侍郎八年經筵徹章轉朝請大夫兼直學士
院兼同修國史實錄院同修撰兼侍讀賜紫金魚袋
遷禮部侍郎兼中書舍人權禮部尚書兼給事中攝
吏部尚書以明堂恩封鄞縣開國伯食邑九百戶自
是歸諡田里逾二十年號深寧叟以元貞二年六月
戊申卒於正寢享年七十有四嗚呼痛哉娶鄭氏繼

娶李氏先卒並贈碩人繼舒氏封碩人子男二長良學承務郎兩浙運幹羅買官先公十六年卒次昌世女二長適通仕郎史萬卿次適通仕郎戴泳蚤卒孫男文遠曾孫男二琳孫去疾女一昌世不孝忍死將以是年十二月辛酉奉匱窆於陽堂鄉同喪之原從祖父兆先志也葬日薄謹述官爵始末以識罔極之痛云孤子昌世泣血謹記

所著書目 案元阿殷圖荃堂云先生著述之書逾三十種今之存者未得及半其年月略可稽者已按年附繫故復列書目如左

古易考一卷 佚見袁樞師友淵源錄又見浙江通志引經義考此種宋史本傳藝文志均不載

周易鄭康成注 存見前宋志傳均不載

王深雪先生年譜 張 辛四明叢書 約園刊本

詩考一卷 存宋史藝文志本傳均作五卷經義考云六卷序文見四明文獻集稱詩考語略

尚書草木鳥獸譜 佚見倪燦宋史藝文志補無卷數

詩地理考六卷 存宋史藝文志本傳甬上耆舊傳均作五卷按志傳稱五卷或以詩譜地理考附末不列卷數

詩辨 佚見倪燦宋史藝文志補無卷數

詩草木鳥獸蟲魚廣疏六卷 佚見宋史藝文志浙江通志此種本傳不載經

義考詩上有毛字

補注王會篇 存見本傳而藝文志不載舊鄞縣志作王會九州異物獻會解經義考作周書

王會解

集解踐阼篇 存見前

春秋三傳會考三十六卷 佚見宋史藝文志浙江通志此種本傳不載

論語考異二卷 佚見浙江采集書目鄞縣志此種宋史志傳諸書均不載

論語鄭康成注二卷 或謂爲惠氏棟僞託未詳

孟子考異一卷 佚見浙江采集書目鄞縣志此種宋史志傳諸書均不載

六經天文編 存

漢藝文志考證十卷 存宋史本傳志不載

通鑑答問四卷 存至正四明志作五卷

通鑑地理考一百卷 佚見宋史藝文志本傳

王深寧先生年譜 張 至正四明叢書 約圖刊本

通鑑地理通釋十四卷 存見前

漢制考四卷 存見前

困學紀聞二十卷 存

筆海四十卷 佚見宋史藝文志本傳

玉海二百卷 存

蒙訓四十四卷 佚見宋史藝文志而本傳作四十卷壽鏞案李振裕刊本道光府志俱作七卷

小學紺珠十卷 存

小學諷詠四卷 佚見宋史藝文志本傳

補注急就篇六卷 存

姓氏急就篇二卷存

詞學題苑四卷 佚見宋史本傳

詞學指南四卷 存諸先生應詞科六題及詞學所美

目今不具錄 又按鄞縣志以四明文獻集為先生

著作然集本鄭真所輯非祇先生一家言今皆佚僅

存先生詩文五卷國朝陳漁珊張斌舉摺拾他書非

纂增三卷合梓之題深學先生文鈔實則非其舊也

故均不入所著書月 壽鏞案四明文獻集 皆佚

一語非也余依南溟張氏鈔本鈔得二卷

玉堂類稿掖垣類稿四十五卷 佚案墓誌稱再入翰

四十五卷延祐四明志亦作內外制四十五卷宋史

本傳作玉堂類稿二十三卷掖垣類稿二十二卷四

明文獻集選采數十篇餘文皆佚而二書先生自譏

跋語集中猶存一在卷四一在卷五今以史傳核考

王深寧先生年譜 張 至四明叢書

年月依次附繫其無年月可繫者尚有仲秋湖汎吳

山忠清廟設醴青詞隆興府靖安縣管下利澤昭應

善安王屈平特封利澤昭應普安南祐王誥剡門軍

玉帛寺壯繆義勇武安英濟王特封忠壯義勇武安
英烈 王誥

深寧集一百卷 佚見宋史本傳而藝文志不載延祐

四明志作文集八十卷全謝山云一

百二十卷未詳各志及四明文獻集諸書所載凡有

年中之文皆依次附繫其無年月者有代饒禮侍謝

大中大夫表德潤齋記詩考語略序跋袁紱齋答舒

和仲書史鄞州墓誌越大夫贊○以上見四明文獻

集○天興廟記吳刺史澤民廟記澤民廟詩七古○
以上見鄞縣志○寶慶寺記李欽傳諸經通義序載
氏桃源世譜保傅傳序史獨善先生文集跋書
王庭秀磨納集後鄭鈔周禮解義題辭八賢贊○以
上見深寧文集餘篇又案北江詩話陽湖莊刺史
所博學能文生平甚深寧品學輯其文多至數卷未

見

烏世先生次子以恩蔭補承務未及祿而宋亡

錢人譜

皆稱爲承奉公

王厚孫墓誌銘

字昭甫幼端粹韶齔時佗

然不屑與羣兒狎長益純慤視貴游華靡事漠如

也

黃潛撰墓誌銘入元弗杜游其門者多老成博雅之士

浙江通志王厚孫傳

先生所著述蒐輯考訂贊助爲多蓄書

萬餘卷燬於火露鈔雪纂至忘寢食書以復完爲

文一發於本實世俗風情月狀語皆所不道尤精

易筮占驗如前知先生名重當世謂宜錄其嗣人

王深寧先生年譜

張

五至四明叢書

約園刊本

以表盛德薦章交上力辭曰士之大節嗣守爲難

敬身所以敬親肥遯所以無不利矧以介直之資

與世寡諧倘得讀父書求己志以畢此生足矣不

願乎外也平居不自表襮與人交無鉤距亦不苟

爲阿附

黃潛撰墓誌銘

大德辛丑欲廣傳先生遺書以成

先志俾張仲友屬牟應龍序小學紺珠以付梓

小學

紺珠

牟序至治二年八月又遺書應龍曰吾父平生書

最多惟困學紀聞尤切於學者今以其書視子幸

爲序所以作之之意泰定二年肅政司副使馬速

忽僉事孫楫助以入梓

因學紀聞年序

泰定四年卒年六

十一子二厚孫寧孫

黃潛撰墓誌銘

著有靜學文集稿二

十卷

鄞縣志

厚孫字叔載幼而知學八歲能賦詩讀書日記數百言十歲已竟論孟詩書禮記并閱深寧集習經義詞賦操筆立就鄉先生王叔酥趙孟何戴表元聞而異之因就見焉治詩得舒璘李元白原委久益充積博治人多咨問之袁桷自翰林歸問所學對曰近惟讀書記衍義正宗意有所得以其明潔縝

王深寧先生年譜

張

吾西四明叢書約園刊本

密有成法易知而可守也因言世之學者稍涉朱子數書輒詆淳熙然諸老與朱子同時其言論雖不盡合而博聞實踐爲所推許今乃藉口理學以文寡陋漸成虛誕之風宜懲其弊桷著四明志分撰二者與論歷代史高下得失甚備桷歎曰先師之道茲不墜矣嘗爲郡庠訓導演說名理辨析疑難朔望取四書五經關世教者爲之直說抑揚反覆聞者悚然三試不偶棄舉子業用詞學體爲古文本之三代兩漢博以唐宋諸家廉訪副使署郡

直學辭職牟應龍言之乃就拔授象山教授調浦
江教諭踰月卽去官歸奉母時李國鳳以便宜用
遺逸署衢州路教授復薦除邵武路教授福建分
省又升爲儒學副提舉皆不赴貝瓊撰
基誌銘至元中以
先生所著玉海彙失後復得降指揮於慶元路刊
刻至正三年阿殷圖塾堂知其多闕誤久未訂正
迺屬厚孫重加校訂得誤漏六萬餘字玉海
序或讒
袁桷所撰四明志於僉事苦思丁將毀其板厚孫
白王郡守元恭得不毀因屬撰至正續志十二卷

王深齋先生年譜

卷五

四明叢書
約圖刊本

樂陽外
史集

鄉飲酒禮久廢郡守屬與鄭覺民遵儀禮

考訂之晚年益以詩酒自娛論宋季事謂至正史
官多詮次失當且極論陳桎續通鑑之失明洪武

九年卒年七十有七

據此則厚孫生於大德四子
年庚子距先生歿已四年

二陞

錢譜作陸茲據黃潛貝瓊兩墓誌諸陸同
誌銘文中數稱陸名皆不作陸

子二無同名考黃潛昌世墓誌銘云孫三陸同孫
鷹貝瓊厚孫墓誌銘云長陞次驚然則同孫或寧
孫子或幼穉著有遂初彙三十卷貝瓊撰
墓誌銘

寧孫字叔遠

陳譜案寧孫之字徧考誌載皆作叔遠
蓋取諸葛語非有誤惟何以取同祖兄

名爲字可疑錢譜作
叔遠與諸書不合

初治詩後治春秋訂正各傳

異同必格其終始而止其於文章制度尤致意焉
未嘗一造場屋僉事戴東臯按浙東民安其政適
被誣寧孫奮然直之戴復職將薦剡謝不與通

外史

集 至正三年爲慶元路齋長

慶元路王侯去思碑陰

後爲

白鹿洞山長無子以兄子隲爲後

錢譜

隲二子宗傳

中傳宗傳還爲陞後

陳譜

附錄

陳著祭禮部尙書王伯厚文柔兆涪灘之歲孟冬甲辰
契生前進士陳某謹以豕雞祭酒之奠祭於故內翰

王深甫先生年譜

張

美

四明叢書

約園刊本

尙書王公之靈公之聞望北斗泰山公之學問洪河

長江青春大科撼動一世紫霄闊步凌歷兩制凡大

詔令雷風其行凡大典冊日星其光代主之言爲國

之重進而文昌行矣柄用亦旣簡在宵衣之心時不

我與天乎難詎與雲俱飛三島之上言采其薇布衣

蕙帳執經於席問字於庭其淑我鄉幾兩周星誰知

其中難言如海能無知者猶有予在前歲之除去春

之初相看話舊耿耿何如雖不盡言有不盡意余八

十三公七十四自謂予死當居公先公而先之訃音

忽傳季夏聞訃老病憚暑哭於寢外而莫卽路今茲
默暄始獲造門予亦朝露其能久存天高地遠江空
歲晚公兮有知歆予一奠尙饗

袁桷廣招深寧先生乘蚪上征江海殄瘁湘纍遺痛十
載猶一日也柳車爰行瞻望永隔門人袁桷竊取宋
玉招魂述廣招以反其義其詞曰竊獨悲此鬻鬻兮
身鞠恧而莫明服三后之貞則兮秉忠純以內兢繩
古義以自抗兮慄微躬之莫勝懼天命之不吾與兮
晚更號以深寧委靈魄於玄宅兮挾清神以上征重
華慘其無容分矚下矩之險隘侈九夷之曠邈兮申
前聖之遺戒一去而莫返兮八靈孰能以震駭乃命
小臣戴絙秉旄注精高冥而下招曰茫茫封邱腐豕
萃只炳靈奔飛杳交會只嬋媯清芬孰返旆只縱橫
幽房雜龐怪只魂兮歸來其益以駭只東門焚煌平
蕪層陰只靈宮紫芝萎以泯只流鈴搖空訴夸淫只
玄蛇蒼鼠若擾馴只魂兮歸來激越吟只蹠躩蹂躪
白蟬飛只滅方鑿迂傳致以肥只闕青綴白眩纖奇
只析楊黃華司禮儀只魂兮歸來彼相疑只沃隰修

吟鞠薺茂只狂夫冶游胡慙後只南山白石曷以永
年只式擯其微悵周原只歸來歸來其孰能麻魂只
愁雲旋宇陰籟振幕只素空霏塵清晝激雹只虎雉
黃目屏陳設只精鑿後置爛爇施張只伊嗚仰天雜
猖狂只甘腥恣睢禮不可防只魂兮歸來悉無以當
只魂兮乘桴登瀛壖只海觀日浴爛紅殷只哲咨長
裾襲古先只漆書竹簡遂研鑽只崑崙穹隆疑有至
人只妙顏紫韃休德日新只吐珍納和與道爲鄰只
雕題祝髮禮讓興仁只桂蠹咀吞味芳辛只幽蘅嘉

王深寧先生年譜

張

卷六

四明叢書
約園刊本

芷佩孔文只相羊湘纍胥若存只承挹清塵徘徊翩
翻只天光淳耀會弁森扈只肅容展威受多祐只斬
几破觚斯黃輔只龍圖昭回布高矩只開陰蔽陽庶
類蕃嘉只捫歷箕尾建崇牙只翦理姦巫靜無譁只
照示下土循羲媧只河公海神瑰以迅只貝宮鮫室
祕怪雜孕只瓊英琪柯錯續紛只鞭龍誅蛟霈澤湛
潤只魂兮遠游戢凌紊只揚歌舒嘯化幽憤只重曰
嗟所思之不得見兮儼冰雪之遺容繁遲遲而容與
兮松柏日其蔥龍悵幢帷之咫近兮長虬脫焉以逍

風蛻塵居之險艱兮捨崇蘭之新封墳旄迭其和奏
兮聯雲車以陪乘粲琳琅之遺編兮俾泯絕之足證
匪離羣以自絜兮誠不忍夫驚駟超整駕以言從兮
懼見譏乎後聖揖虛漠而言旋兮耕書田以振厲諒
神明不吾欺兮庶終承乎嘉惠千秋兮靡長白雲兮
相望魂兮歸來其毋我忘也

祭王尚書維年月日以清酌之奠祭于內翰給事尚書
先生之靈曰道大如天學廣如漢企而望之自涯而
返末俗濫觴昧彼一貫捨學而言所執愈渙伊洛之

王深寧先生年譜

張

五九四明叢書

約園刊本

盛嗣於乾淳析仁辨義修己治人先民有訓其言淳
淳稽經探本纂史輯聞匪默以高匪誕以守降于叔
季其弊莫救千士一律躡訛踵陋坐曹清談迎事拱
手文散武萎禮弛樂虧孰據其全以爲國毗篤生我
公是宗是師天清景溫前旌後麾窮源崑崙賓日扶
桑磅礴萬類眾曷敢當積澗湜漾舒光煒煌探巖排
碣織巨畢藏若農有秋箱輸廩峙若龍起淵雷震雨
施九招希聲昌歎古味爰薦合宮以享以沿灌膏養
腴心君清澄謙言訪對屈軼在廷羣疑未決神龜示

靈化被姦饗淳風泠泠天運悠邈公亦永歎學絕道
傾死灰莫然獨行誰儔獨立誰言吾非斯人其誰與
傳騶騶里門易窮三陳捨泣而歌謂天莫聞劔失其
光蘭銷其薰柴桑沈冥王官混淪年已逮耆秉燭繼
晷一柱承天四海仰企蔽牛之陰百草茂美謂享大
蠶以淑後土云胡微疾永蛻世塵歲匪龍蛇其理莫
詢訴詞重華蹇茲遺臣曰士之弊逮今弗振柄以蒙
昧請業門下反復可教授以端緒有疑必開有謬必
舉語其平生載出載處冀登斯堂舉觴以祝詎期須

王深寧先生年譜

張

六十四

明叢書

約園刊本

史望公以哭躄躄小子抵掌掉目哀哀吾儕殞首莫
贖死生之原千古一致瘁躬報德匪哀以旣風雨神
交卻立鬼魅秉心靡渝服義靡墜庶幾公魂慰此耿
特嫩如茲觴之志罔愿拜手薦公公其來格矢詞致
誠有淚俱滴尙享

袁桷輓王伯厚先生詩云秋水孕雙蓮英英吐異芬詞
章納雲夢禮樂定河汾丹詔三軍泣清名四海聞西
峯頽落日乘鶴叩蒼雲晚歲艱難意衡門老病身
蜀山迷望帝楚澤痛靈均皮弁終辭詔深衣晚任眞

蓋棺今已定千載有遺民 燕說經生濫齊諧學究
輕微言空有意獨拍已無聲墨澤雞林貴青氈虎觀
榮新銘前進士幽抱付誰明 再世登龍舊淵源可
再窺西山遺正緒東澗結冥知腹笥名空在眉黎壽
竟違重歌妾薄命寒淚滴塵瓶

鄭覺民送王叔載教諭象山四首之一恭維尙書公道
輝燭乾坤望古浩千萬撫拾恣咀吞坐值時運移閉
門守深根春陽熙九萬英矚日盛蕃後學競奔走眾
屬此文孫

王深寧先生年譜

張

空四明叢書

約園刊本

全祖望宋王尙書畫像記往者太原閻丈百詩篤嗜深
寧先生之著述三屬人入鄞求先生之行狀神道碑
墓誌欲附之卷尾又求其畫像欲摹之卷首而皆不
可得先生孫枝在鄞者零落其在紹之上虞者亦不
知其盛與否也予罷官歸同學葛君巽亭爲予言榆
莢村王氏有先生像亟喜往請而觀之亡宋遺民所
云咸淳人物面目當時已等之彝鼎況大儒如先生
乎先生之學私淑東萊而兼綜建安江右永嘉之傳
予於同谷三先生書院記言之詳矣生平大節自擬

於司空圖韓偓之閒良無所媿顧所當發明者有二
其一則宋史之書法也先生於德祐之末拜疏出關
此與曾淵子輩之潛竄者不同先生既不與軍師之
任國事已去而所言不用不_去何待必俟元師入城
親見百官署名降表之辱乎試觀先生在兩制時晨
夕所草詞命猶思挽旣渙之人心讀之令人淚下則
先生非肯愀然而去者今與曾淵子輩同書曰遁矣
矣一則明儒所議先生入元曾爲山長一節也先生
應元人山長之請史傳家傳志乘諸傳皆無之不知

王深寧先生年譜

張

全四明叢書

約園刊本

其何所出然卽令會應之則山長非命官無所屈也
箕子且應武王之訪而況山長乎予謂先生之拜疏
而歸蓋與馬丞相碧梧同科亦與家參政之教授同
科而先生之大節如青天白日不可掩也嗚呼先生
困學紀聞中有取於姚弋仲王猛之徒與楊盛之不
改正朔并謝靈運臨難之詩其亦悲矣而謂士不以
秦賤經不以秦亡俗不以秦壞何其壯也嘗李德林
之以事周者事隋更足爲興王用人之戒今觀先生
之像須眉惆悵端居不樂其當杜門謝客之際乎惜

不令百詩見之也

又宋元學案應麟字伯厚從王子文塾受學先生曰今之事舉子業者一切委棄制度典故漫不省非國家所望於通儒於是閉門發憤誓以博學宏詞科自見假館閣書讀之入元不出學者稱爲厚齋先生

又深寧學派四明之學多出陸氏深寧之父亦師史獨善以接陸氏而深寧紹其家訓又從王子文以接朱氏從樓迂齋以接呂氏又嘗與湯東澗遊東澗亦兼治朱呂陸之學者和齊斟酌不名一師宋史但夸其

王深寧先生年譜

張

空四明叢書
約園刊本

辭業之盛予之微嫌於深寧者正以其辭科習氣未盡耳若區區以其玉海之少作爲足盡其底蘊陋矣王應麟其學侶曰王應鳳韓性其同調曰黃震其子曰良學昌世門人曰胡三省戴表元黃叔雅鄭芳叔袁桷王惟賢孫曰厚孫寧孫胡三省子曰幼文戴表元門人曰袁桷鄭芳叔子曰覺民孫曰駒曰眞

王深寧先生年譜

深寧先生年譜自錢氏陳氏外尙有張氏所輯於錢譜
多所補正與陳譜亦有異同茲併三家印之以資互證
張輯經吳子修學使王雪澄按察校讀當少訛誤矣丙
辰三月存善記

王深寧先生年譜

一
四明叢書
約園刊本

四明叢書

四明叢書
約圖刊本